

NATIONAL ASSEMBLY OF SEYCHELLES*Tuesday 21st March, 2023**The Assembly met at 9am**National Anthem**Moment of Reflection**Mr Speaker in the Chair***MR SPEAKER**

Bonzour tou Manm Onorab, nou zofisye ki pe asiste ou dan Lasanble e manm piblik. Byenveni pour nou travay pour lasemenn. Nou annan plezir, annan en group viziter dan Lasanble avek nou ozordi. E mon a donn laparol Onorab John Hoareau pour donn zot en mo *d'accueil*.

HON JOHN HOAREAU

Mersi Mr Speaker. Bonzour Mr Speaker, bonzour tou dimoun a lekout, bann koleg *MNA* osi, e en bonzour spesyal bann dimoun Beau Vallon. Mon le ozordi akeyir e *welcome* sa bann dimoun *senior citizens* ki sorti Beau Vallon.

Mon pe mazine ki zot ki zot ava pas en bon lazournen avek nou ozordi. E osi zot ava profit sa lokazyon pour zot enterakte avek bann Manm. E osi, pour pran konesans bann prosedir e bann fason ki mannyer Lasanble i deroule. Mersi.

MR SPEAKER

Mersi Onorab. Pour komanse i nesese ki mon adres serten pwen, ki ti leve dan Lasanble, dan sesyon Vandredi pase. E mon fer sa pour mwan klarifye, bann lareg Lasanble, zistifye mon desizyon lo bann prosedir e asir tou Manm ki travay Lasanble, in deroul dapre prosedir korek Lasanble.

Premye pwen, Drwa Repons;

Konstitisyon i donn Manm piblik ki'n ganny afekte par deklarasyon en Manm dan Lasanble en drwa repons. Drwa anba Konstitisyon nou bezwen respekse. Mon sit Lartik 102(6) Konstitisyon; "*Where a person, other than a member of the Assembly, is aggrieved by the exercise*" under clause (1), (Clause 1 se right to free speech) "*Under Clause 1 that person may, in writing addressed to the Speaker, submit a reply to the Speaker and the Speaker shall circulate a*

copy of the reply to every member of the Assembly, and at the commencement of the following sittings of the Assembly, read the reply in the Assembly".

Sa Lartik i fer kler ki en Manm i annan drwa ganny son repons lir dan Lasanble. Pwen *Leader* Lopoziyon se ki sa pa ti ganny apel-e en *Reply*. Me en *Statement*. *PS* Eulentin ti fer kler ki i anvi koriz en keksoz ki'n ganny dir, dan sa Lasanble.

Si in apel li en *Statement*, e i pa'n servi sa mon *Reply*, sa dan mon lopinyon pa fer okenn diferans. Si ou'n dir en dimoun en keksoz, e i adres lo sa menm keksoz, in fer en *Reply*.

Napa nanryen dan sa Konstitisyon ki dir poudir, sa ki sa ki Manm piblik i *submit* an ekrire i devret annan sa mon "*reply*" lo la. Oubyen ki i devret dir in *accordance with Article 106(2)*, tousala i formalite. Sa ki enportan se ki i soumet son *Reply* an ekrire.

Alor mon konsidere ki lobzeksyon ki *Leader* Lopoziyon ki sa pa ti ganny apele en *Reply* pa valab. E lo sa pwen ki *statement* pa ti'n ganny sinyen, mon krwar problem i pa osi grav ki *Leader* Lopoziyon ti le fer krwar. Akoz *PS* Eulentin ti idantifye son lekor klerman dan son *email*.

Byensir i ti mank en pe formalite, e sa mon ti korize par demann *PS* Eulentin pour met son *Reply*, pour met son soumisyon dan laform en let, ki in fer.

Dezyenn pwen, Mosyon Irzan; *Leader* Lopoziyon ti soumet en Mosyon, koman en Mosyon Irzan. E in sit *Standing Order 42* koman lareg ki donn li drwa annan en Mosyon Irzan. Mon pour lir sa morso *Order 42* ki aplike;

"*Unless otherwise provided by these orders or with the prior permission of the Speaker on the grounds of public urgency, no motion shall be moved at a sitting unless at least ten clear days' notice has been given.*"

Donk sa *Order 42* i donn *Speaker* drwa deklar en Mosyon koman irzan, e si en Manm i le ki son Mosyon i ganny konsidere koman irzan, i bezwen demann permisyon *Speaker* an priorite avan.

Si en Manm i soumet en Mosyon, pour sot sa *notice 10* zour avan en Mosyon i ganny pran, i bezwen desizyon *Speaker* - permisyon *Speaker*.

Napa okenn landrwa ki dir ki *Leader* Lopoziyon, oubyen okenn lot Manm i kapab

li menm deklar son Mosyon koman irzan. I senpleman napa en tel privilez ki egziste. *Order* 42 paragraf 6 i dir ki serten Mosyon spesifik i kapab ganny pran san *notice*. E sa i aplik zis pour size ki leve pandan en sesyon Lasanble. Par egzanp pour *adjourn* deba, pour sispann en *Order*, pour retir en *Bill*, ensidswit.

Donk Manm napa okenn privilez pour li kapab deklar son Mosyon koman irzan, e *matter of privilege* leve par *Leader* Lopoziyon ti *out of order*. Mon demann *Leader* Lopoziyon pour etidye pli byen sa bann lord ki i site, e pour evite fer bann deklarasyon ki enterpret en lord dan son fason, e ki konfiz dimoun.

Trwazyenm pwen, Manm sorti an protestasyon; Lensidan Vandredi pase i anmenn mwan reflexion lo sa lareg Lasanble, ki donn Manm en permisyon pour sorti dan Lasanble. Lalwa i otoriz dediksyon saler si en Manm i absan dan Lasanble, san lotorizasyon *Speaker*.

Me Manm i ganny en proteksyon ki mon'n bezwen observe. E mon sit *Standing Order* 9(6) ki ler koumsa, "*Temporary absences by a Member from the Chamber, whether in protest or otherwise, shall not require the leave of the Speaker*".

Savedir, pour Manm sorti an protestasyon, i ganny aksepte anba regilasyon. Me sa ki mon krwar sa *Standing Order* i devret osi e ki i manke, dir ki se sa protestasyon i devret zistifye.

Si Manm i sorti akoz desizyon ki *Speaker* in donner, i devret annan en rezon valab. Mon krwar i pa akseptab ki Manm i sorti lo en fo deklarasyon, oubyen zis lo en preteks.

Alor mon pour demann *Standing Orders Committee* pour reget ankor sa *Order*, si i pa zis donn en leskiz pour Manm sorti san rezon. An dizan sa, mon le dir ankor enn fwa ki mon napa okenn lentere fer Manm sorti dan Lasanble. Mon krwar plas tou Manm i dan Lasanble, pour kontribye dan travay Lasanble. Sa ki absan san rezon pe mal servi dimoun ki'n elekte li.

Mon demann Manm sorti zis ler i nesaser pour mwan gard lord e respe dan Lasanble. An sa ki konsern komanter *Leader* Lopoziyon, ki mon pa *fit* pour vin Prezidan *SADC PF*, mon krwar sa i en komanter arogan e ensolan.

Mersi sa i-mon *ruling* e mon pa pe pran okenn deba, lo sa. *Leader* Lopoziyon si ou annan en pwen pour fer o prelab ou ti'n devre notifie mwan ki ou annan en pwen. Si non, mon pa pe pran okenn deba lo mon *ruling*. Mersi.

Bon mon a pas lo en lot size petet enn pti pli agreab. *En l'occasion de la semaine de La Francophonie, j'ai le plaisir de donner la parole à deux Membres Honorables, pour quelque mot sur ce sujet. D'abord Honorable Philip Monthy et ensuite suivi par Honorable Egbert Aglae. Honorable Monthy.*

HON PHILIP MONTHY

Merci Monsieur le Président. Et bonjour a tous. Cette année, la journée est placé sous le theme, "321 millions de francophones, des milliards de contenus culturels".

Je vais tout d'abord commencer par citer la définition accordée au terme francophonie, un terme apparut pour la première fois en 1880, et c'est le géographe français Onésime Reclus qui l'a employé pour désigner les espaces géographiques où la langue française était parlée.

Et comme définition officielle, on nous dit que la francophonie c'est l'ensemble des gouvernements, pays ou instances officielles qui ont en commun l'usage du français dans leurs travaux ou leurs échanges."

Le gouvernement Français recense 29 pays où lon parle Français officiellement dans le monde, et les Seychelles font biensûr parties de ces 29 états.

Mais en disant cela, Monsieur le President nous savons très bien que la pratique de la langue française a considerablement réduit au fil des années parmi la population Seychelloise, une remarque faite aussi par le Président de la Commission Nationale de La Francophonie hier au cours de la cérémonie officielle pour lancer la Semaine de la Francophonie.

Je vais alors Monsieur le Président, saisir locasion pour encourager les Seychellois a pratiquer d'avantage cette plus belle langue du monde, que nous avons eu la chance de l'avoir en tant qu'une de nos langues officielles. L'erreur est humaine, ce n'est qu'en commettant des erreurs que nous allons progresser.

Avec ces quelques mots, Monsieur le President, je voudrais vous souhaiter et a tous mes collègues députés et au peuple

*Seychellois, une bonne Fête de La Francophonie.
Merci.*

APPLAUSE

MR SPEAKER

Merci Honorable. Honorable Aglae.

HON EGBERT AGLAE

Merci Monsieur le Président. Bonjour chère collègues Honorables, bonjour notre envier qui sont dans la galerie.

Chaque année au mois de Mars, précisément le 20 Mars, tous les pays francophones et aussi les anciennes colonies Françaises célèbrent la fête de la francophone sous un thème commun, comme un moyen de reconnaissance de la langue Française et de nos liens passés avec la France, une de nos anciens colonisateurs.

Cette année, le thème 321 millions de francophones, des milliards de contenus culturels nous ramènent à la mémoire du parcours et de la vie nation francophone.

Malgré les nombreuses souffrances que beaucoup ont traversées à l'heure de la colonisation, de nombreuses bonnes histoires, de nombreux bons souvenirs, de nombreux développements et aides ont été réalisés.

Dans nos secteurs éducatifs aux Seychelles, nous avons vu et assisté au développement de la langue française dans le cadre de notre programme scolaire. Beaucoup de nos enseignants Seychelloise ont eu la chance de poursuivre leurs études à un diplôme supérieur dans le matière Française.

Je profite ce moment pour remercier tous nos professeurs de Français pour leurs efforts continus pour enseigner la langues Françaises et les meilleures pratiques à nos jeunes générations. Nous apprécions votre dévouement et votre patience.

Nous apprécions également l'effort que toute l'institution visant à promouvoir la langue française, qui ce soit par la théorie, la culture, les événements culturels et par l'écriture comme dans les chansons, le poeme et d'autres activités artistiques Françaises, nous vous disons merci et continuez à faire de votre mieux etant que gardien de cette belle langue.

Message pour cette année, nous placons la diversité des cultures

francophones au coeur de les celebrations. Ecoutons, regardons, telechargeons, découvrons, chantons, dansons au tempo et au rythme des imaginaires francophones qui sont d'une richesse inepuisable.

En conclusion, notre parlement faisant également partie de l'association parlementaire française a une rôle essentiel à jouer pour assurer la continuité dans tous les domaines et aspects de la langue Française. Je vous souhaite tous une bonne journée francophone. Merci.

(APPLAUSE)

MR SPEAKER

Merci aux membres Honorables pour vos propos e vos intentions et souhait que j'appuie pleinement, au nom de L'Assemblée.

Mersi, nou a prosede ek nou Order Paper. Mon a pas laparol Madanm Clerk pour fer First Reading serten Public Bills. Madanm Clerk?

MADAM CLERK

Mersi Mr Speaker. Bonzour Mr Speaker. Bonzour tou bann Manm, bonzour tou bann Manm Lasanble Nasyonale e bann dimoun ki a lekout, bann dimoun osi ki dan Galeri. Bonzour a tous.

Sa de Bill ki pe ganny prezante for First Reading bomaten i Electricity Bill avek Utilities Regulatory Commission Bill.

This Act may be cited as the Electricity Act, 2022.

This Act may be cited as the Utilities Regulatory Commission Act, 2022. Mersi Mr Speaker.

MR SPEAKER

Nou a prosede pour pran Private Notice Question. Mon a demann madanm raporter apel delegasyon Minister Lasante silvouple.

Bon byenveni dan Lasanble bonzour Minis pour Lasante Minis Peggy Vidot e delegasyon, Dr Bernard Valentin Principal Secretary pour Lasante, Dr Jude Gedeon Public Health Commissioner. E Ms Yvana Theresine Direkter Zeneral Human Resources e Administration.

Mon a donn laparol Onorab Leader Lopoziyon pour son Private Notice Question. Onorab?

HON SEBASTIEN PILLAY

Mersi Mr Speaker. Mr Speaker la ki mon annan laparol, mon le *raise en matter of privilege* anba *Order 42 nou Standing Orders*. Mr Speaker mon ti a kontan ou dir ek mwan, si posib o kour lazournen, parey mon'n ekrir ou anba en *email* an relasyon avek mon Mosyon, pour fer ki laz Sekirite Sosyal i sorti 65an parey Gouvernman i le fer pour li retourn 63an, pour ou dir mwan *whether* mon Mosyon irzan, oubyen pa irzan aköz ou pa ankor kominik avek mwan lo irzans mon Mosyon.

Me ou zis dir mwan kan ou pe plas mon Mosyon. Sa i mon premye *matter of privilege*. Mon dezyenm *matter of privilege*, mon le met lo rikord ki Konstitisyon i dir, ki ler Speaker i ganny en *Right of Reply*, i bezwen sirkil li avek tou bann Manm.

Sa *Right of Reply* ki nou ti gannyen pa ti'n sinyen e ti napa nanryen ki ti idantifye okenn dimoun lo la.

Me apre ki ou'n koz ek *PS Eulentin*, sa le ki in anvoy en *email* oubyen en *Right of Reply* ki'n sinyen. Sa en *Right of Reply* ki ou'n lir nou pa'n vwar. Me nou'n ganny li 7.10 aswar dan nou *email*.

Savedir sa i an vyolasyon avek Konstitisyon. Parey ou'n dir mon zis pran sa pti letan pour mwan regard Konstitisyon ek nou *Standing Orders*, pour fer sir mon osi mon ganny li byen, parey ou'n demann mwan pou fer.

Mon kestyon pour Minis Lasante i koumsa: -

Mersi Minis pour la pour reponn mon kestyon. E mon swet labyenveni ou bann zofisye ki la, Dr Valentin, Ms Yvana Theresine (Yvana mon mazin ou premye non toultan mon bliy ou sinyatir) e apre Dr Gedeon e byensir Minis Lasante. Mon kestyon i lir koumsa Minis: -

Eski Minis pour Lasante i kapab enform sa Lasanble ki problemn ki Minister Lasante, pe gannyen pou enplimant *Scheme of Service* pou Dokter avek Dantis? Mersi Minis.

MR SPEAKER

Mersi Onorab. Minis ou a prosede avek ou repons silvouple.

MINISTER PEGGY VIDOT

Mersi Mr Speaker. Bonzour Mr Speaker.

MR SPEAKER

Mon rapel delegasyon zofisye silvouple pa bliye met zot mikro *on* ler zot pe koze e *off* ler zot pa pe koze. Aköz nou annan en problemn avek prezervasyon batri. Mersi.

MINISTER PEGGY VIDOT

Non la ki bon. Bonzour Mr Speaker, Mr Speaker, *Leader Zafer*, *Leader Lopoziyon*, Manm Lasanble Nasyonal, manm envite ki isi la ozordi, telespektater, bonzour.

Mr Speaker mon remersye Onorab *Leader Lopoziyon* pour sa kestyon. *Scheme of Service* Dokter ek Dantis ki an viger aktyelman, i an fors depi peryod 2019-2020. Parey tou lezot *Scheme of Service* dan Minister Lasante. Sa *Scheme* i en dokiman ki gid Minister Lasante koman anplwayer e bann Dokter ek Dantis koman anplwaye lo ki fason idealman zot pour progrese dan zot karyer.

Sepandan, pour en Dokter oubyen en Dantis progrese dan sa *Scheme*, i pou'n bezwen deservi en serten nonm lannen;- i pou'n bezwen pas atraver evalyasyon par son Siperyer. Son evalyasyon i bezwen bon, i pour bezwen annan en rekomandasyon pour promosyon ki sa Siperyer i fer. An plis ki sa, i bezwen annan *post* pour sa grad dan lekel sa Dokter oubyen sa Dantis, pour mont ladan. E i bezwen annan finansman atase avek sa *post*.

Promosyon pour serten pozisyon lo sa *Scheme* par egzanp, pour ou vin en konsiltan i nesesisit formasyon spesifik e si ou pa'n fer sa bann formasyon, menm apre en 50an lannen, ou pa kapab mont dan sa pozisyon. Alor sa servis letid adisyonnal i esansyel.

Ler tou sa bann kondisyon i reini Minister Lasante napa okenn difikilte pour enplimant sa *Scheme* aköz sa i en *Scheme* ki ganny negosye, antre tou bann partisip enterese i rebran en konsansis. Me neanmwèn o kour lenplimantasyon sa *Scheme*, dan pratik annandler nou vwar sa bann sityasyon swivan.

Malerezman letan ki nou'n gannyen pour reponn sa kestyon pa'n permet nou rod tou statistik nesesisit pour nou kapab detaye. Nou kapab fourni sa apre, si Lasanble i demande.

Sityasyon ki nou vwar i enkli, en Siperyer par fer evalyasyon ki nesesisit letan ki i fodre. Sa anplwayer pa toultan ensiste li menm pour li ganny evalye letan ki fodre. E

osito ki resours imen i remark sa sityasyon i *comme* sa, i toultan ensiste ki evalyasyon i ganny fer.

En anlwayer pa ganny en bon evalyasyon avek son Siperyer - en lot legzanp; - en Siperyer ki evalye en anlwayer i donn li en bon evalyasyon, me i pa fer rekomandasyon pour en promosyon. Letan rekomandasyon pour promosyon i ariv kot seksyon resours imen, Bidze in fini fer e provizyon pa'n fer pour promosyon sa anlwayer an partikilye.

Nou osi annan ka kot en anlwayer i oule en promosyon. Me i pa ankor zwenn tou bann kriter, oubyen kondisyon pour sa promosyon ki li i ti a swete gannyen. I kapab osi annan serten sirkonstans, ki desizyon Nasyonal, i pran pour pa donn okenn promosyon pour rezyon bidzeter nasyonal e Minister i bezwen alor azir an konformite avek sa desizyon Nasyonal.

Sa i serten bann defi, ki Minister i rankontre dan la pratik.

Me nou toultan pe demann nou le ki responsab pour resours imen, pour adres sa bann defi dan en fason ki zis, ki ekitab, pour ki tou bann parti konsernen i satisfè, me osi pour kominike avek nou *staff* lo zot sityasyon spesifik. Mersi Mr Speaker.

MR SPEAKER

Mersi Minis. Parey pratik ki nou'n adopte mon pour rezerv 10minit a lafen avan 9er pour kestyon siplemanter *Leader* Lopoziyon. Antretan, nou a pran kestyon siplemanter lezot Manm ki letan i permet nou, ki letan i permet nou.

Premye lo mon lalis mon annan Onorab Wilbert Herminie e mon apel li pour son kestyon siplemanter.

HON WILBERT HERMINIE

Mersi Mr Speaker. Bonzour tou Manm koleg Onorab, tou dimoun a lekout e en bonzour spesyal pour Minis ek son delegasyon. Minis mon'n ekout ou repons atantivman.

Me selman mon santi ki serten pwen pa'n ganny touse. An partikilyerman akoz e pour ki rezon ki bann *medical officer* i ankor *still medical officer*, menm si apre 6an, zot sipoze al lo kad *Senior Medical Officer*? Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Onorab mersi pour sa kestyon. Wi, nou realize poudir i annan *medical officers* ki pa ankor monte pour zot vin *Senior Medical Officers*. Menm si zot in ganny plis letan ki sa *Scheme* i spesifye.

E pour sa rezon lamazorite sa bann *medical officers* in ariv sa staz dan sa letan lannen 2020, lannen 2021 e nou pe adres sa sityasyon, nou pe fer nou mye pour nou kapab adres zot dan sa lannen an mezir ki nou travay.

Nou'n fini vwar e nou pe regard tou zot bann rekomandasyon ki zot in ganny fer dan zot bann *appraisal*, e nou pe travay lo la. Resours Imen Departman pe travay lo la.

HON SEBASTIEN PILLAY

(Off-Mic)

MR SPEAKER

State ou point of order Onorab Pillay?

HON SEBASTIEN PILLAY

Mersi Mr Speaker. Mr Speaker, mon pe ganny enformen ki Lasanble pa pe transmet lo radyo, oubyen lo televizyon.

MR SPEAKER

Nou a pran en poz teknik. Reste dan lasal pour mwan permet Madanm Clerk pour verifie e regarde si i annan rektifikasyon. Nou a pran en poz teknik dan lasal. Madanm Clerk.

(technical break)

MR SPEAKER

Problenm i kote *SBC* ki pa pe reisir transmet nou sinyal. Donk pour nou permet piblik swiv nou. Mon pe propoze ki nou pran en poz 5minit. Nou a *adjourn* Lasanble pour 5 minit pandan ki nou teknisyen i verifie avek *SBC* si zot kapab rektifye problenm. Mersi.

(technical adjournment)

MR SPEAKER

(Off-mic)

MR SPEAKER

Ou atrap okenn porsyon ki zot in manke, lo *recording* Lasanble pli tar. Mersi nou a

prosede avek prosen kestyon. Onorab Sandy Arissol.

HON SANDY ARISSOL

Mersi Mr Speaker. Bonzour Minis avek ou delegasyon bonzour tou Manm Lasanble bonzour tou bann dimoun ki pe ekout nou.

Mr Speaker mon ti a kontan demann Minis, anvi ki kestyon i lo *Scheme of Service* pour bann Dokter avek bann Dantis. Mon konnen poudir bann Dokter ek bann Dantis zot fer en louvraz formidab dan Minister Lasante. Me sa ki osi nou bezwen pran kont poudir i annan lezot travayer dan Minister Lasante.

Mon ti a kontan zis demann ou an relasyon avek *Scheme of Service*. Kekfwa ou ti a kapab dir ek nou konbyen *Scheme of Service*, ki Minister Lasante i annan e ki bezwen travay lo la zisteman pour met zot a zour zis parey pour Dokter avek bann Dantis? Mersi bokou Mr Speaker.

MR SPEAKER

Mersi Onorab Minis.

MINISTER PEGGY VIDOT

Mersi Onorab pour kestyon. Onorab wi nou dakor avek ou, wi nou annan en kantite travayer dan Minister Lasante dan tou bann sekter ki tonm anba Minister Lasante.

Zis pour *Health Care Agency*, nou annan en total 32 *Scheme of Service*. Kot *Public Health Authority*, nou annan ankor a 2, kot Minister Lasante avek *DSAPTR* nou annan ankor.

So parey ou dir nou annan en kantite travayer e en kantite *Scheme of Service* pour nou met an aplikasyon. E nou valoriz tou travayer lasante e nou ti a kontan ki ler nou fer, serten revizyon, serten amelyorasyon, nou kapab fer li pour tou travayer, dan don ansanm.

Comme sa ki nou a kapab dir ki nou anmenn en sistenm, ki ekitab, ki zis pour tou. Wi la nou pe koz lo *Scheme of Service* pour Dokter avek Dantis.

E nou osi realize, ki pandan sa bann dernyen letan la, nou'n annan en *freeze* si oule lo revizyon or lo nou *Scheme of Service* dan Gouvernman an zeneral. E nou pe regard laplikasyon sa enn e ki mannyer nou pe fer li e ki kalite problem nou pe gannnen.

Me nou realize poudir, byento Gouvernman pou refer tou sa gran

azisteman saler, ki tou sa bann dimoun, dan tou sa bann *Scheme* pour tonm ladan. E apre sa i ava pli fasil osi pour nou, si i annan revizyon pour bann *Scheme* pour nou fer li, tou an ansanm. Mersi.

MR SPEAKER

Mersi Minis. Onorab Herminie ou pe lev ou lanmen ankor, ou napa drwa en lot kestyon. Selman si ou annan en klarifikasyon lo repons ki Minis in donner, ou kapab poz en klarifikasyon vitman silvouple.

HON WILBERT HERMINIE

Mersi Mr Speaker, wi mon ti annan en klarifikasyon mon ti'n lev mon lanmen avan ki ti annan sa *technical error*. Mon pa konnen si sa i en sabotaz akoz nou pe demann sa kestyon.

Me solman vi ki ou'n donn mwan laparol Mr Speaker, Minis in dir nou koumsa ki sa *Scheme of Service* pe ganny travay lo la. Me solman i pa'n donn nou en dele letan ki nou kapab retournen pour donn sa bann profesyonnel lasante Mr Speaker. Mersi Minis.

MR SPEAKER

Minis ou nobou donn en letan kontinyen met an aplikasyon?

.

MINISTER PEGGY VIDOT

Mersi Mr Speaker. Mersi Onorab. Onorab mon pa'n dir sa *Scheme of Service* pe ganny travay lo la. Akoz *freeze* i ankor egziste lo *Scheme of Service* pour nou fer revizyon.

Me solman sa ki mon'n dir, poudir sa bann *medical officers*, ki pa ankor ganny zot promosyon, se sa bann ki nou pe travay lo la pour regarde depi ki zot la si zot in *meet* kriter, si in annan rekomandasyon pour zot promosyon e regarde si nou annan, nou lanvlop finans i permet nou, pou fer li.

So sa ki mon dir nou pe travay lo la, me pa *Scheme* an antye. Mersi.

MR SPEAKER

Mersi mon a pran kestyon Onorab Audrey Vidot.

HON AUDREY VIDOT

Mersi Mr Speaker. Bonzour Mr Speaker tou Manm Onorab Minis ek ou delegasyon tou dimoun ki a lekout. Minis eski ou kapab dir

avek nou Lasanble, pour ki rezon petet bann zenn spesyalis ki sipoze lo *Senior Registrar*, pe ganny mete lo en nivo petet enn pti pe pli ba pour lemoman.

Si sa *Scheme* ki i klerman dir letan ki ou fini spesyalizasyon, sipoze vin en *Senior Registrar*, eski i annan spesyalis ki annan plis apepre 4an la ki'n *graduate* ki ankor lo *Registrar* e zot pa ankor kalifye. Si ou kapab eklersi sa? Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker, mersi Onorab. Onorab *Scheme* i donn nou en gid kan ki dimoun i kapab progresse, e ki zot bezwen pour zot kapab progresse. Ou'n byen dir poudir en dimoun pour li progresse pour li vin *Senior Registrar*, i bezwen montre poudir in fer en letid pli avanse dan sa domenn e ki si i *meet* kriter pour sa e ki lezot kriter ki nou annan dan *Scheme* par egzantp ki i ganny rekomann-de par son *Supervisor*, nou annan pozisyon, nou annan sifizaman larzan, i pour kapab ganny promote.

E alor baze lo tou sa kriter, nou regarde ki mannyer nou fer pour nou promot sa bann dimoun. E mon krwar ou'n demann mwan en kestyon spesifik, si i annan ki nou pa pe promote, pour lemoman?

Mon pa konnen si i annan ki nou pa pe promote, mon realize poudir resours imen i pe vwar tou sa bann ka koumsa e zot pe pran aksyon kot si aksyon pa'n ganny pran pandan sa de lannen presedan. Akoz nou lanvlop fiskal pa ti permet. Mon ti konnen poudir sa lannen ki annan ka ki in ganny diskite e ki resours imen i pe adres sa bann problem. Mersi.

MR SPEAKER

Mersi Minis. En klarifikasyon Onorab silvouple vitman.

HON AUDREY VIDOT

Mersi Mr Speaker. Minis savedir kot resours imen, zot pour konnen poudir ki kantite ki ti annan plis ki 4an ki zot merit al lo promosyon. Eski zot in fer provizyon pour Bidze, pour zot kapab osi ganny sa loportinite? Vi ki ou'n dir zot pa pe fer li la. *Thank you.*

MR SPEAKER

Mersi Minis.

MINISTER PEGGY VIDOT

Onorab mersi pour ou kestyon, pour ou klarifikasyon. Dan Bidze ki nou gannyen, nou sey zer li pour nou kapab adres tou sa bann keksoz koumsa ki kapab leve. Me nou toultan konnen poudir nou annan en *ceiling* e i annan zis en serten kantite ki ou kapab promote. E sa i pour baze parey mon'n dir, si nou annan larzan, si nou annan pozisyon. Mersi.

MR SPEAKER

Mersi, mon a pran kestyon Onorab Loze.

HON JOHAN LOZE

Mersi Mr Speaker. Bonzour Mr Speaker. Bonzour tou dimoun a lekout e espesyalman nou bann *senior citizens* anler dan Galeri. Mr Speaker resaman nou'n tande ki zot pe fer en *special package*, pour atrakte bann spesyalis etranze. Be mon kestyon pour Minis Mr Speaker;

Minis si ou kapab fer en *special package* pour atrakte spesyalis etranze, kwa ki pe anpes ou fer en *special package* pour retenir spesyalis Seselwa? Akoz lenformasyon ki nou, nou annan, se ki la dan sa klima difisil ou annan ou trwa spesyalis Seselwa ki'n kite, in *resign* in ale. Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab pour ou kestyon. Onorab nou pe - parey mon'n dir nou pe regard tou nou sityasyon e i annan de spesyalis ki pa neserman fasil pour atir zot, pour vin travay en landrwa kot zot pe travay, zot pe ganny en serten kalite *package* e pour sa i pou fer, nou bezwen fer sir si nou oule la kalite, nou kapab osi vin avek en keksoz ki pour kapab atir zot.

Parey ou'n dir si nou kapab al fer en *special package* pour nou spesyalis ki pe vini. Eski i annan posibilite pour fer li pour Seselwa. Parey mon dir nou pe toultan. En *Scheme of Service* i la pour gid nou a en serten moman. Me i pa en dokiman, ki zis ou'n fer i reste la. I en dokiman ki ganny revwar, e ki ganny aziste anmezir nou ale.

Par egzanp sa enn ki la in ganny aziste diferan fwa dan bann lannen presedan. E pour nou, pour vwar kisisa ki nou bezwen donner pour en spesyalis, i en keksoz ki dek ki nou annan en nesosite pour nou arive reviz nou *Scheme of Service*, nou ava fer li.

Me pour lemoman bann spesyalis ki pe vini, parey ou dir mwan 3 spesyalis ki'n ale, aköz nou pe pran *special package* pour 3 spesyalis ki pe vini, i en kestyon ki kekfw ki mon pa konn tou detay lo la. Me mon ava demann *HR* pour dir mwan si nou'n annan sa bann spesyalis ki nou'n atire lo *special package up to now*.

MR SPEAKER

Eski. Minis eski ou pe pas laparol avek ou *HR* la an se moman pour klarifye sa?

MINISTER PEGGY VIDOT

Silvouple Mr Speaker si *HR* i annan.

MR SPEAKER

Ok tre byen. Madanm ou a kapab pran laparol. Si ou annan en repons.

DG HUMAN RESOURCES AND ADMINISTRATION YVANA THERESINE

Mersi Mr Speaker. Mersi Onorab. kekfw zis pour fer resorti i tou depan ler nou pou fer *interview* avek en Dokter spesyalis dan pei deor, i menm prensip ki ganny fer pour lokal.

So ler ou pou fer *interview* - ordinerman *HR* pa fer *interview* lo li menm. I fer *interview* an kolaborasyon avek bann spesyalis dan sa spesifik *field*.

Par egzanp si nou pour rod pour *surgeon*, pou annan spesyalis dan sa *field* - sa en ki ansarz ki ansarz sa *unit*. Ki prezan ler zot fer *interview* zot ki deside, determinen, ki nivo nou pour kapab pran sa Dokter, depandan son leksperyans, depandan son spesyalizasyon ki annan.

Si nou bezwen pran li aköz son nivo ki ete, si nou bezwen pran li lo nivo *Senior Medical Registrar*, konsiltan, ouswa *Senior Medical Consultant*. So koumsa ki marse, e i menm parey pour Seselwa, ler zot ganny zot promosyon zot promosyon i depan dapre zot spesyalizasyon, dapre zot konpetans. Ou'n kapab fer en *training* be selman si ou pa ankor demontre konpetans, i annan en posibilite ou Siperyer pa neserman pour rekomande.

So i annan tou sa bann laspe, ki mars ladan. Mersi.

MR SPEAKER

Onorab ou annan en klarifikasyon. Ou ganny permet silvouple. Nou annan lezot Manm ki pe atann, fer vit.

HON JOHAN LOZE

Mersi Mr Speaker pour ou lendilzans. Mr Speaker la apre ki mon'n tann bann repons, mon le en keksoz i ganny klarifye e i sorti kler. Eski nou pe ganny dir, ki nou bann spesyalis Seselwa napa konpetans, napa kapasite, napa abilite kalifikasyon, se sa rezon ki zot pe *resign* par grap e zot pe ale? Mersi Mr Speaker.

MR SPEAKER

Mersi Onorab. i annan en ensinyasyon ki ou'n fer lo dernyen ki en pe pa apropiye. Minis ou annan en repons.

MINISTER PEGGY VIDOT

Mr Speaker mersi. Mersi Onorab, eski nou'n dir sa? Non. Nou'n pa'n dir poudir, nou Seselwa napa konpetans. Nou Seselwa napa abilite, e zot pa profesyonnel. Nou'n dir toultan - e mwan mon'n dir toultan. Poudir mon valoriz tou traver lasante, tou nou profesyonnel lasante, e mon annan en gran respe pour zot.

(APPLAUSE)

MINISTER PEGGY VIDOT

Zot pe kontribye pour gard nou Nasyon an bonn sante. Zot pe kontribye enormeman pour reetablir lasante dan dimoun, ler ki zot in *unfortunately* ganny en problemm maladi.

Alor mon demande ki nou donn zot, zot respe. E ou komanter lo zot pe kit par grap, sa i pa vre. Mersi.

MR SPEAKER

Mersi Minis. Mon a pran kestyon Onorab Conrad Gabriel.

HON CONRAD GABRIEL

Mersi Mr Speaker. Bonzour Mr Speaker. Bonzour Minis ek ou delegasyon. *Welcome* bann dimoun dan *Gallery*. Mersi zabitan Pointe Larue, ki pe ekout nou e tou piblik an zeneral.

Minis atraver dyalog la, nou pe konpran poudir i annan gro problem dan Minister Lasante. Nou bezwen admet, sa i an relasyon ek *Scheme*, e kondisyon travay bann Dokter ki pe fer ou Minister ganny bokou kritike.

MR SPEAKER

Prosed ek ou kestyon silvouple Onorab.

HON CONRAD GABRIEL

Enn pti moman Mr Speaker.

MR SPEAKER

Wi, wi ou pa pe antre dan en deba lo -?

HON CONRAD GABRIEL

Yes. Non-non mon....

MR SPEAKER

Lo Minister avek Minis la?

HON CONRAD GABRIEL

... annan mon *right* koman en..

MR SPEAKER

Prosed avek ou kestyon.

HON CONRAD GABRIEL

Ok. Minis an vi ki i annan bokou fristrasyon, dan sa *Scheme* e nou'n menm aprann ki'n annan Dokter ki'n aparaman vini pour fer *head surgery* lo pasyan e in vwar li pe bezwen pe retourn kot li san ganny okenn transpor pour asiste li.

An vi ki zot annan en *transport allowance* R2000 pour *on call*, eski ou ti kapab dir nou si sa i akseptab? Or eski pa ti a pli bon sa bann Dokter i ganny *allocate* ek en transpor oubyen fer sir zot ariv kot zot on *time*? Sa ti a ede sov lavi. Mersi.

MR SPEAKER

Onorab ou kestyon i enn pti pe an deor *ambit* kestyon orizinal. Petet Minis si ou le klarifye ou kapab donn li en klarifikasyon.

MINISTER PEGGY VIDOT

Mersi Speaker. Mr Speaker mersi Onorab. Onorab ou pe demann mwan en kestyon ki dir i en kestyon spesifik si mon'n konpran ou. Lo transpor, ki *part of* tenm kondisyon travay bann Dokter ek Dantis.

O komansman letan mon'n dir poudir sa *Scheme* ki an aplikasyon an se

momman, ti ganny formen e diskite avek tou parti konsernen enkli tou bann Dokter ek Dantis, swa dan zot fason endividyel ou sinon *through* zot lasosyasyon zot reprezantan.

E sa in ganny fer letan ki sa ti ganny fer, ti akseptab, ti vin par konsansis. Alor tousala ti'n vin ladan. Me si sa i bann kondisyon ki ankor valab la, i en kestyon ki nou ava vwar dan lefitir dek ki i dir, nou kapab reviz *Scheme*. Mersi.

MR SPEAKER

Mersi Minis. Bon mon'n prolonz Kestyon Siplemanter bann lezot Manm par 5 minit an konsiderasyon sa letan ki nou'n manke. Me prezan mon pour pas lo Kestyon Siplemanter *Leader* Lopoziyon loter kestyon orizinal. Onorab Pillay.

HON SEBASTIEN PILLAY

Mersi Mr Speaker. E mersi pour prolonz sa pti letan 5 minit pour sa kestyon, ki dan mon lopinyon, i en kestyon tre enportan. Sirtou moral e kondisyon travay bann spesyalis. E sa ki pe fer bokou dimoun ozordi montre bokou fristrasyon, sirtou bann dimoun ki annan bann kondisyon kronik, ki pa pe ganny sans vwar spesyalis. Nou annan bann dimoun dan Galeri ki parfwa, bann dimoun dan sa group laz i bezwen vwar spesyalis ki ganny difikilte.

E mon pa krwar i akseptab Minis, pour ou bomaten dir nou ki ou ankor lenformasyon ki ou pa konnen, i annan lenformasyon ki zot ankor pe rode. E ki zot pa'n ganny letan pou prepar zot - ki mon ti'n krwar ti'n devret en lenformasyon ki ti annan avek komann.

MR SPEAKER

Onorab ou pe fer e n largiman avek Minis silvouple. Ou kestyon.

HON SEBASTIEN PILLAY

Mersi Mr Speaker. Mon osi note ki kote *LDS*, pa pe demann okenn kestyon an sa ki konsern bann spesyalis.

Prezan mon premye kestyon Mr Speaker i koumsa, Mr Speaker mon ti a kontan klarifye avek Minis, Minis eski ou kapab dir nou, mon annan sa *Scheme of Service* devan mwan la e mon pe gete li, *Ok*?

Dapre sa ki nou ti sipoze pe vwar en progresyon dan karyer nou bann spesyalis

Seselwa. Sa ki pe arive sa progresyon, pa pe arive.

Alors mon pour demann ou, dan ki dele letan ki ou Minister pour kapab retourn kot Lasanble e dir avek nou ki zot in komans travay lo en plan progresyon ki ava fer ki bann diferan kad, ki trouve anba sa *Scheme*, bann spesyalis oubyen bann Dokter ava pe bouz *accordingly* lo sa *Scheme*?

Akoz mon pa krwar poudir sa en size ki fek pe ganny diskite ozordi. I en size ki bokou bann spesyalis in raport avek *Management* Minister Lasante pandan sa dernyen 2an.

Dezyenmman Mr Speaker, Minis i dir avek nou koumsa poudir i en kestyon bidzeter. Alors mon pour demann Minis sa, eski ou pour pare pour demann Gouvernman en Bidze Siplemanter pour adres sa bann difikilte finansyel ki ou pe gannyen vizavi progresyon bann Dokter ki dapre Lalwa, dapre zot *Scheme* i devret pe arive, en Bidze Siplemanter ki mwan mon donn ou mon langazman ki nou kote latab pour siporte, si ou pe fer li pour adres sa bann defayans? E nou pe demann ou dan bann lezot landrwa kot i annan mankman, pour fer parey.

Bann lezot *Scheme* ki Onorab Arissol, sel Manm lo lot kote latab ki'n annan kouraz pour demann en kestyon, mon felisit li, mon felisit li. E mon demann ou si i annan bann lezot landrwa ki annan bann *Scheme* ki zot bezwen, larzan anmenn en Bidze Siplemanter nou ava siport ou e sa bann dimoun i ava ganny peye. E nou ava enn fwa pour tou aret tann sa bann konplent ki nou pe gannyen lo Minister Lasante! Mersi Mr Speaker.

(APPLAUSE)

MR SPEAKER

Mon a koriz Onorab Pillay lo en pwen, se ki i annan Manm *LDS* ki'n lev lanmen, zot non i la lev lanmen. Me mon pa pe ganny letan donn zot laparol pour zot kestyon. So sa ou'n dir sa de fwa konmsi ou pe ensiste lo la. Mon krwar i napa en lakizasyon valab. Minis, Minis ou a prosede avek repons silvouple.

MINISTER PEGGY VIDOT

Mersi Mr Speaker. Mersi Onorab pour ou kestyon. Onorab mersi pour ou *pledge* pour si nou vin avek en Bidze Siplemanter pour

aranz lapey travayer lasante an antye, ou pour siporte. Mersi pour sa.

Me parey mon pe dir sa *Scheme of Service* i en gid. I en gid ki ed nou pour nou vwar ki mannyer dimoun i progrese dan zot karyer. Pandan sa de dernyen lannen, wi in annan serten group dan sa *Scheme* li menm li, ki pa'n arive ganny zot promosyon, parey kekfw *Scheme* in dir zot bezwen gannyen or "zot kapab gannyen" - pa "bezwen gannyen."

Pour zot kapab ganny sa, fodre diferan kriter ti kapab ganny arive lo la. Enn sa bann kriter se eski i annan plas dan Bidze pour *accommodate* sa. *Ok* nou ti dan letan *COVID* e sa ti ganny fer. Nou'n osi realize poudir ti annan en bann ki pa ti'n ganny rekomandasyon dan zot *appraisal*. Keksoz ki mon dir mon napa pour prezante, se konbyen dan sa bann diferan group ki'n tonm ladan dan sa *Scheme*.

I pa en kestyon ki mon pa konnen ki mannyer *Scheme* i ganny enplimante. Wi, nou kapab, nou pe travay lo la sirtou nou group, sa bann group *medical officers*. E sa nou krwar nou kapab pare menm avan *Zen*, pou fer sir ki sa i regle baze lo sa ki nou kapab fer e ki kriter ki zot, zot in *meet*.

Si ou poudir mwan eski nou kapab travay lo 32 *Scheme*, dan *Health Care Agency* ant la avek *Zen*, mon poudir ou i pa pour neserman posib. Me selman i en keksoz ki nou pe kapab vwar.

Nou konpran poudir i annan en travay ki pe ganny fer deza dan Gouvernman an antye, e kekfw sa pour afekte en pe sa kantite *Scheme* ki annan.

Alor pour nou, nou pa vwar li nesese *right now* pour nou fer en travay konpreansiv lo tou *Scheme* e apre si annan en pe *Scheme* ki pe ganny met ansanm. Nou pe atann e vwar e tou sa travay i a ganny fer.

Alor pour mwan dir ou wi, mon pour kapab vin avek en Bidze Siplemanter pour saler lo tou *Scheme* ki nou annan lo Minister Lasante, avan Zilyet, sa i pa pour posib.

Me si dan laplikasyon *Scheme of Service* pour Dokter ek Dantis ki nou santi poudir nou pa pe kapab fer promosyon, progresyon aköz nou finans. Wi, mon pare pour al kot Finans pour demann larzan an plis e si fodre ki i vin dan Lasanble pour nou gannyen. Mon a dir mersi tou Manm Lasanble ki ava vot an faver. Mersi.

MR SPEAKER

(Off-mic)

HON SEBASTIEN PILLAY

Mersi Mr Speaker. Mon annan en klarifikasyon. Mon premye klarifikasyon i lo sa bann *Scheme of Service* e progresyon dan *Scheme of Service*; pa en nouvo *Scheme*, progresyon dan *Scheme*. Saverdir en dimoun ki en *junior officer, junior dental officer*. I monte i vin en *medical dental officer*, i monte i vin en *Senior Medical Dental Officer*. I monte i vin en *Senior Medical Officer level one* i monte, i monte siksesivman.

Progresyon dan *Scheme* anba Lalwa Lanplwa napa nanryen ki'n *freeze*. Sa ki'n ganny *freeze*, se lentrodiksyon en nouvo *Scheme*. So alors mon bezwen demande, ki pe arive ki Minister Lasante pa pe kapab lyez avek *Public Service Bureau* pour li konpran ki ou annan en lobligasyon anba kondisyon ki ou'n met anba Dokter ler zot in kalifye pour vin dan Minister Lasante ek bann Dantis, pour zot progresse la sa *Scheme*.

E eski ou pare pour koman Minister Lasante, pour komans angaz imedyatman *Public Service Bureau* pour rezourd sa *anomaly* ki pe ganny kree dan sa *statement Scheme* in ganny *freeze*?

Akoz Minis mon bezwen dir ou, mon fek ganny en mesaz la, i annan pasyan ki pe ganny *call* ki sipoze fer loperasyon Vandredi pase, in ganny kontakete pour pa vini aköz serten lekipman in kase.

Konmsi sa ki mwan mon le fer, se mon le aret tap Minister Lasante e rod en fason pour ki dimoun ki al kot Minister Lasante i ganny en servis ki zot konfidan ladan e ki ler zot sorti zot lasante i ganny aranze. Mersi Mr Speaker.

MR SPEAKER

Mersi Onorab. Minis repons pour sa klarifikasyon.

MINISTER PEGGY VIDOT

Mersi-mersi Mr Speaker. Mersi Onorab. Onorab mersi pour ou lankourazman dan sans ou pe siport Minister Lasante pour nou pa ganny tape. Me progresyon *Scheme* parey ou'n demann mwan, progresyon pe ganny fer. Ou dir mwan si mon'n pare pou al kot Biro toudswit *Public Service Bureau*. Mon an diskisyon avek *Public Service Bureau even*

avan kestyon i ladan. Nou pa'n dir poudir promosyon in ganny *freeze*.

Akoz sa sirkiler ki ti sorti, ti fer kler poudir promosyon pa'n ganny *freeze*. Me selman, promosyon i ganny fer *according to* keksoz ki i annan en plas. Si komela en dimoun, pa'n ganny rekomande par son *supervisor* pour li progresse.

I en kriter ki menm si ou annan larzan, menm si progresyon i dan *Scheme* i pa kapab gannyen. Si en dimoun i napa en kalifikasyon ki sa *Scheme* i demande, i pa pe kapab gannyen. Nou pe fer nou mye pour nou aranze.

Lo kote keksoz ki nou'n napa, se plito sa finansman e sa nou pe regarde, nou pe diskite. E parey mon dir sa nou pe kapab adres li menm avan Zen. So se sa ki mon'n dir e sa langazman ki mon kapab donn ou. Mersi.

Lot bout si ou dir mwan en lekipman, in kase. En lekipman in kase i arive parfwa. Me nou annan en group dimoun ki pe travay lo keksoz koumsa, ki fer i kapab ganny aranze. Me i pa neserman aköz en *Scheme* Dokter pa'n ganny enplimante. Mersi.

MR SPEAKER

Mersi Minis. Nou a termin la avek *Private Notice Question*. Nou annan en kestyon *Urgent Question* lo *Order Paper*. Me vi ki nou annan delegasyon ki konsernen la, nou a pran li deswit. E *Urgent Question* se par Onorab Churchill Gill. Onorab?

HON CHURCHILL GILL

Mersi Mr Speaker. Bonzour Minis ek ou delegasyon. Bonzour bann envite dan Galeri. E tou Manm Lasanble e dimoun ki pe ekout nou.

Eski Minis i kapab eksplik sa Lasanble pou benefis zabitan Praslin: -

Akoz ki Lopital Baie Ste Anne pa pe kapab pran okenn apwentman pou fer *ultrasound*?

Ki pou arive avek bann dimoun ki bezwen fer *ultrasound* pandan sa letan ki apwentman pa pe ganny pran? Mersi.

MR SPEAKER

Mersi Onorab. Minis ou repons?

MINISTER PEGGY VIDOT

Mersi Mr Speaker. Mersi Onorab pou ou kestyon. Mr Speaker, pandan mwan Fevriye

- depi le 15 Fevriye ek pandan mwan Mars sa lannen, lakantite radyolog ki an servis ki ti kapab fer *ultrasound* in redwir sorti 7 pou vin 4.

Sa se prensipalman akòz sa bann radyolog ti bann korperan e zot Kontra in fini e zot ranplasan pa ankò arive.

Minister Lasante ti alor deside pou ofè servis *ultrasound* zis kot Lopital Sesel pandan sa dernyen mwan, ziska ki nou ganny en radyolog ouswa en teknisyen ki fer *ultrasound* i arive.

Pasyan Praslin ek La Digue ki bezwen fer *ultrasound* pe ganny sa servis kot Lopital Sesel si sa i irzan. Dek ki nou ganny plis radyolog nou pou rekomanse, re ofè sa servis Praslin parey ti ete avan.

Mon ti ava kontan soulinyen poudir *ultrasound* lo bann madanm ki annan en problem *gynecology*, ou si non en rezon obstetrik sa pe kontinyen ganny fer parey ti fer oparavan.

Ranplasan pou 2 *post* radyolog pou arive mwan prosen. Nou pe kontinyen fer nou *recruitment* pou lezot group ki radyolog ou si non radyografer.

An se moman nou annan 4 radyolog e nou demann pou bann diferan zimaz dyagnostik i aprosan 4 par zour pou Praslin e aprosan 150 par zour lo Mahe.

Pou sa kalite demann, Minister i bezwen apepre 7 radyolog an permanans. Me malgre sa mank evidan, nou kontan pou dir ki aktyelman nou annan 3 Seselwa spesyalis dan sa domenn. Mersi Mr Speaker.

Pou dezyenm parti ou kestyon Onorab. Pandan sa letan ki apwentman pa pe ganny donner lo Praslin pou pasyan Praslin ek La Digue, nou pe dir poudir bann ki bezwen vit i pou kapab desann Mahe pou fer. Bann ki nou bezwen anmenn Mahe nou pou kontinyen anmenn.

Me nou annan en *waiting list* e dek ki nou ganny dimoun nou pou desann an permanans, nou pou kontinyen nou servis parey ti ete.

Me an menm tan nou pe regarde ki mannyer nou kapab travay avek sa 4 ki nou annan la, pou nou ofè en pe servis menm si pa parey ti ete avan. Pou nou kapab diminyen kantite dimoun.

Pou lemoman nou annan 88 dimoun Praslin ki bezwen *ultrasound*. Nou annan 15 La Digue. Mersi Mr Speaker.

MR SPEAKER

Mersi Minis. Onorab Gill ou annan siplemanter?

HON CHURCHILL GILL

Mersi Minis pou ou larepons. An premye lye sa bann dimoun ki zot Kontra in fini, nou ti deza annan zot Kontra, nou ti konnen kan ki i sipoze fini.

Mon mazine petet pou lefitir nou kapab travay lo la ase boner. Akòz parey ou'n mansyonnen 88 i ase sibstansyel.

Prezan eski i annan en plan travay pou sa 88, ki mannyer pou ganny dil avek? Si ou kapab eksplik sa en mannyer dimoun Praslin i ava konpran ki fason bann ki lo *waiting list* zot pou kapab ganny sa servis ki zot bezwen.

Apre dezyenm, eski ler, ou'n dir nou poudir petet dan en tre kourt dele bann ranplasan pou vini.

Me si an ka i ariv ankò *delay* ek sa bann ranplasan, ki ou Minister pe anvizaze fer koman en *plan b*? Mersi.

MR SPEAKER

Mersi Onorab. Minis repons *please*.

MINISTER PEGGY VIDOT

Mersi Mr Speaker. Mersi Onorab. Wi Onorab mon dakor avek ou ki koman Minister, koman par nou zesyon nou konnen kan Kontra pe fini. Alor nou kapab fer sir ki nou ganny dimoun ler enn i fini pe ale lot in arive.

Par fwa i annan keksoz ki pa dan nou kontrol. Par egzanp letan nou pe ganny en korperan, nou depan en pe lo sa partner pou li anvoy son dimoun menm si nou konnen poudir tou lede kote i konnen ki dat. Me nou, nou pa kapab kontrol tro sa kan ki zot, zot deside anvoye.

Nou kapab annan sa diskisyon ek zot, nou kapab dir zot. Me nou bezwen ennler zis akseptè, akòz se sa ki zot, zot in kapab fer li koumsa.

Pou ou lenformasyon nou ti deza fer tou diskisyon, tou bann proses pou nou kapab anploy en radyolog ki ti pou'n ariv isi.

Me malerezman sa dimoun i *decline* son - pran sa pozisyon vreman *at the last minute*. Nou ti espekte li par egzanp *last week* e i *decline last week*.

Ankò i keksoz ki pa dan nou kontrol. Wi nou pe met an plas en fason pou nou fer sir ki nou *clear* tou sa bann *waiting*

list ki nou pou annan Praslin dek ki nou kapab. Dek ki sityasyon i permet.

Eski nou annan en *plan b*? Wi nou annan en *plan b*. Mon'n toudswit la semenn dernyen, antre an diskisyon avek en lopital kot zot ava kapab donn nou en, sa ki nou ava dir en *locum* - en dokter ki vini pou en letan spesifik pou vin donn nou sa servis.

Alor wi nou annan *plan b* e dek ki enn pa marse nou kapab tonm lo nou *plan b*, mersi.

MR SPEAKER

Mersi Minis. Wi Onorab Pillay ou annan en siplemanter.

HON SEBASTIEN PILLAY

Mersi Mr Speaker mon kestyon i spesifik pou Praslin. Minis eski nou kapab ganny en *commitment firm* avek ou, nou bezwen ganny en *commitment* akoz depi bomaten nou pe ganny, nou pa pe kapab ganny en *commitment firm*.

E nou rol se *press* ou pou aksyon. So, e ki ou kapab dir nou ki ou pe al fer ler ou sorti dan Lasanble vi ki i annan sa problem ki *o going* pou fer ki sa bann pasyon ki ankor, sa bann dimoun ki ankor lo sa *waiting list* i kapab ganny *attended to*?

E si i annan serten kondisyon ki si sa *ultrasound* i kapab ede pou sov zot lavi, zot a ganny sans dekouver sa.

Akoz par egzanp 2 semenn pase nou ti annan problem ek *mammogram* kot Lopital. I annan dimoun in al dan Lenn e zot in war poudir zot in ganny kanser.

So, i annan en nesite pou nou kapab *push* en *call for action*, ler ou annan en *waiting list* sa kantite dimoun. So ki garanti eski ou pe donn Lasanble ki ou pou al regard dan sa problem e ki ou pou al met an plas en mezir *until* ki ou ganny ou spesyalis, pou kapab dil ek sa *backlog* i egziste lo Praslin?

Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Onorab mon'n dir ki sa ki nou pe fer, *ok*. Ou dir mwan eski ler nou sorti isi nou pe al travay lo la. Nou pe travay lo la depi avan nou'n vin isi. Depi avan nou'n ganny kestyon.

Parey mon fer resorti nou pe regarde si i annan posibilite ki sa, enn ant sa 4 radyolog ki isi, i pou kapab al Praslin ennlr avan sa radyolog ki nou pe gannyen mwan prosen i arive.

Sa i - mon pa kapab dir ou mon pou fer li akoz deza i annan serten problem. Nou annan isi aprosan 150 ka ki pe ganny vwar par zour. E nou pou bezwen fer serten laranzman.

An menm tan nou annan dimoun *at the moment* ki pa neserman byen ki annan serten, *you know*. Annan serten kondisyon ki pe anpes li travay toulezour, tou letan lafason ki i ti pe fer.

Nou pou bezwen pe fer sa. Mon pa kapab dir ou mwan prosen, semenn prosenn mon pe anvoye. Sa ki mon kapab dir ou nou pe travay lo la e sa se lasirans ki mon ava donn ou, i si posib nou pou fer li.

Me si konmela dan sa 4 mon annan en ki al *off sick*. Menm mon'n dir ou poudir mon pe anvoy en dimoun Praslin semenn prosenn, mon pa pou kapab.

E pou sa rezon ki mon bezwen pe regard keksoz ansanm avek *Management HCA* pou nou vwar kan i pou posib nou pou fer li. Mersi.

MR SPEAKER

Mersi. Mon ava pran kestyon Onorab Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou Onorab avek tou bann dimoun ki pe ekoute.

Mr Speaker taler mon'n ti lev mon lanmen mon pa ti ganny sans pou mon koze parey ou pe dir. La mon'n ganny en pti sans mersi bokou.

Minis mon konpran poudir sa bann radyolog i bann korperan. Petet ou kapab dir nou ki pei zot sorti?

Aprè depi kan eski Sesel i annan korperasyon avek sa bann pei ki nou pe koz bann radyolog pe vin Sesel? Petet akoz mon pe ekoute ou ava krwar fek komanse depi 2020. Sey dir nou donn nou en pti pe leksplikasyon. Mersi.

MR SPEAKER

Mersi. Mon ava rapel bann Onorab nou pe kestyonn servis lo Praslin silvouple.

Minis si ou kapab donn li en repons vitman silvouple.

MINISTER PEGGY VIDOT

Mersi byen Mr Speaker. Mersi Onorab pou ou kestyon. Dan sa 3 korperan ki'n ale, nou ti annan 2 ki Sinwan sorti Lasin. E 1 ki sorti Cuba.

Ou'n demann mwan depi kan nou annan korperasyon avek sa 2 pei? Mon napa sa dat egzakt avek mwan, me solman kekfwa mon ava demann PS anvi ki in la pou en bon pe letan si i annan egzaktteman kantite lannen. Mersi.

Mr Speaker si ou permet mon PS i ava -

MR SPEAKER

Wi mon ava permet PS. PS zis donn en dat si ou annan.

PS BERNARD VALENTIN

Mon napa Mr Speaker. Me selman mon konnen depi, mon annan 30an dan Minister Lasante mwan personnelman. E korperasyon avek sa 2 pei in la toultan depi ler mon la. Mersi.

MR SPEAKER

Mersi. Onorab Labrosse in lev lanmen. Eski ou kestyon i lo Praslin, servis?

HON RICHARD LABROSSE

Wi Mr Speaker. I lo servis lo Praslin, wi.

MR SPEAKER

Wi prosede, wi.

HON RICHARD LABROSSE

Mr Speaker Minis dan son larepons in fer sorti ki i annan 3 Seselwa an se moman ki pe pratik sa louvraz. Me mon kestyon i pou al ler i pe koz lo Praslin. Pa zis lo Praslin me dan Sesel an zeneral.

Ki Minister Lasante pe fer li menm pou ankouraz plis Seselwa pou enterpret en tel louvraz parey? Mersi.

MR SPEAKER

Avek sa repons mon pou termin kestyon la. Akoz bann kestyon pe debord kestyon orizinal.

Minis ou kapab adres son kestyon.

MINISTER PEGGY VIDOT

Mersi Mr Speaker. Mersi Onorab. Wi Onorab sa 3 ki mon'n dir zot radyolog e zot normalman pou ou vin en radyolog ou bezwen fer ou letid medsin avan. E sa i en spesyalite ki ou fer ler ou'n fini kalifye.

Me nou annan lezot travayer osi ki fer keksoz parey *ultrasound*, parey *x-ray*. E sa se bann radyografer osinon *sonographer*.

I bann diferan pozisyon ki parey ou dir nou bezwen ankouraz plis Seselwa pou pran en karyer dan sa domenn.

E an se moman nou napa etidyan ki pe aprann pou zot vin en radyograf ou sinon en *sonograph*.

Me nou pe kantmenm ler nou pe al dan bann lekol dan bann landrwa esey fer bann etidyan konnen poudir i annan sa bann karyer ki zot kapab pran e ankouraz zot pou pran.

Me i bann - nou konnen ki i annan en bann profesyon dan lasante ki pa tro vizib alor zanfan pa tro pran sa karyer. Me nou bezwen kontinyelman ankouraz zot. Mersi.

MR SPEAKER

Mersi. Mon pe termin sa sesyon la e mon profite pou mon donn sa pti git letan lo nou prosen sesyon akoz nou annan 8 kestyon pou Minis ki pe swiv.

Nou pou rebran travay Lasanble 11er mwen 10 - 10.50. Mersi. Mersi delegasyon Minis ek ou bann zofisye e bonn kontinyasyon.

(BREAK)

savrina

MR SPEAKER

Bon pou sesyon kestyon mon a demann Madanm Raporter pou apel Minis pou Later e Labita ek son delegasyon silvouple.

Bonzour e byenveni Minis Billy Rangasamy Minis pou Later ek Labita. E osi zofisye ki pe akonpany li Mr Jitesh Shah *CEO Seychelles Infrastructure Agency*. Mrs Angela Servina *CEO Seychelles Planning Authority* e Mr Steve Mussard *Deputy CEO Property Management Company*.

Nou komans avek kestyon bann Manm. Mon annan 8 kestyon lo lalis, mon pou prolonz sesyon en pti gin. Me selman nou pou annan en maksimonm 15minit par kestyon. Premye kestyon i pou Onorab Desheila Bastienne. Onorab ou kestyon silvouple.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou Manm Onorab e bonzour tou dimoun a lekout espesyalman zabitan Perseverance.

(A) Minis, sa *moratorium* ki'n ganny enpoze dan Ile Perseverance boner lannen pase ziska ozordi ti an rezilta serten konstriksyon ilegal, e osi bann miray ki bann propriyeter pa'n respekte norm rekomande par Biro *Planning*:

Ou kapab donn nou Lasanble, enkli zabitan Ile Perseverance en leklersisman lo dele *moratorium*?

(B) Ou kapab dir avek nou Lasanble ki pou arive avek bann zabitan ki'n swiv Lalwa e fer zot laplikasyon, e ki zot laplikasyon in fini ganny aprouve depi lannen pase e zot ankor pe esper laprouvasyon ou Minister? E trwazyenmman;

(C) Eski Minis i kapab konfirm avek nou Lasanble si i annan okenn zabitan dan Ile Perseverance ki'n ganny lotorizasyon pou konstirir miray pandan sa letan ki sa *moratorium* i ankor anfors? Mersi.

MR SPEAKER

Mersi Onorab. Minis repons silvouple.

MINISTER BILLY RANGASAMY

Mersi Mr Speaker. Mr Speaker avek ou permisyon avan mon demar mon repons mon demann ou permisyon pou mwan demann Senyer pou gid nou dan sa Lasanble ozordi la nou dan en nouvo lasal ki nou a travay dan linite, dan lanmour, dan larmoni-

MR SPEAKER

Minis mon pa pe tann ou byen eski ou mikro i byen plase, i *on*?

Pou byennet nou pei ki lespri sen i gid nou dan nou tou nou deliberasyon. Mersi Mr Speaker.

Mr Speaker permet mwan pou remersye Onorab Bastienne pou son kestyon. An repons premye parti kestyon Mr Speaker, mon oule refer sorti ki sa *moratorium* i reste anfors an se moman.

Parey mon'n fer resorti dan Lasanble oparavan, mon ladministrasyon pe fer son mye, son mye pou seryezman met en lord dan sa dezord ki'n arive malerezman dan sa

zoli vilaz Perseverance pandan tro bokou letan, tro bokou lannen.

Bokou travay teknik ti pe ganny fer pandan sa *moratorium* in fini konplete. E in pran bokou, bokou resours diferan Departman tel ki *SIA*, *PMC*, Departman *Survey*, Departman *Planning*, *PUC* pou analiz sa size profesyonnelman.

I domaz parske sa in met nou retar dan nou bann travay ki nou ti annan pou fer nouvo travay, me par kont i en sityasyon i nou bezwen adrese. Nou oule ki senpleman sa zoli vilaz Perseverance i ganny fer byen annord pour ki tou zabitan dan sa vilaz i a kapab zouir.

Fodre note Mr Speaker ki travay in konsantre plis dan sa bann servis koridor, kot bokou konplent ti pe ganny anrezistre par bann zabitan zot menm e bann lezot Lazans Gouvernman tel ki *PUC*.

Miray, *extension* lakaz eksetera in ganny konstirir par lao sistenm drenaz, sistenm tiyo ki nou apel sistenm *sewage*. E *challenge* ki nou annan defi ki nou annan se si nou bezwen adres bann blokaz sistenm pou delo kabinen eksetera.

Maintenance sa i ganny severman afekte, sa nou pa pou kapab les pase e ferm nou lizye koman en departman serye e en Gouvernman responsab. Tre byento nou pou vin devan avek fason pou regle sa bann dezord met an plas bann *guidelines*. E nou pou envit tou zabitan Perseverance pou ini e travay ansanm dan lentera zot zil.

Pou dezyenm parti kestyon Mr Speaker, mon konfirman ki tou bann zabitan ki'n swiv Lalwa e ki'n deza annan zot laprouvasyon avek Lotorite Plan pou okenn devlopman, zot a kapab soumet sa ki nou apel *commencement notice* pou avverti Lotorite Plan ki zot pe al komans zot konstriksyon.

Lotorite Plan li akote mwan i annan *CEO* Lotorite Plan, zot ava organiz zot pou komans *monitor* swivi sa devlopman. Pou trwazyenm parti kestyon larepons lo mon kote Mr Speaker se wi, i annan serten zabitan ki ti'n deza met zot plan avek Lotorite Plan avan ki *moratorium* ti vin anfors.

En desizyon par Lotorite plan lo sa bann laplikasyon pa ti ankor ganny pran letan *moratorium* ti ganny anonse. Me pandan peryod ki *moratorium* ti an fors Lotorite Plan in pran desizyon lo sa detrwa

laplikasyon sa i anviron 5 aplikasyon miray par egzanp.

So an konklizyon Mr Speaker nou pou bezwen met en bon lord. Mon krwar zot tou atraver tou kote labab i zot satisfè ki Ile Perseverance i en zoli vilaz. Me par kont sa bann dezord nou pa pou kapab akseptè.

So alors nou pou bezwen met en bon lord avek korporasyon e kolaborasyon tou bann zabitan Ile Perseverance Lotorite Distrik e tou bann departman konsernen pou nou travay ansanm pou byennet vilaz Perseverance.

An mezir ki nou pe travay ansanm nou pou byensir annan serten fleksibilite e les bann zabitan ki'n swiv tou prosedir apropriye e ki'n ganny zot aprouvasyon Lotorite Plan an ekri, pou demar zot proze dapre zot laprouvasyon.

Finalman permet mwan Mr Speaker, pou remersi Onorab Bastienne e bann *DAs*, *SIA* Lotorite Plan Departman Plan *Survey*, *PMC*, Departman Lakaz, *PUC* eksetera ki'n kontinyen persevere pou Ile Perseverance.

Zot in donn tou zot sipor pou travay ansanm e pou met latet ansanm e rod fason e solisyon pou met sa lord ki tre nesese dan sa vilaz. Mersi Mr Speaker.

MR SPEAKER

Mersi Minis. Siplemanter Onorab Bastienne.

HON DESHEILA BASTIENNE

Mersi Mr Speaker. Wi mon annan siplemanter. Minis sa bann problem konstriksyon ilegal *encroachment*, blok *pathway*, i pa fek arive sa dernyen 2an. I en pratik ki ti pe ganny fer en bon pe lannen pase kot okenn aksyon pa'n ganny pran e tou dimoun ti pran li normal.

An vi ki da Minister Later ek Labita ti sipoze annan zofisye ki *monitor* si i annan bann konstriksyon ilegal ki pe ganny fer dan bann *Housing Estates*. Me nou pa konnen kwa ki'n arive.

Eski ou koman Minis Labita ozordi ou kapab donn nou Lasanble en lasirans ki anba ou *watch* sa legzersis *monitoring* lo bann *Housing Estate* pou ganny pran o serye, pou kapab anpese ki sa bann tel aksyon ek lenkonvenyans pa repete dan le fitir?

E dezyenman, mon dezyenm keston, Minis pou leklersisman tou zabitan Perseverance e tou dimoun ki pe swiv sa

sityasyon *moratorium*, eski ou kapab donn en leklersisman lo ki sirkonstans ki ou Minister ti dekouver dan sa bann konstriksyon ilegal ki'n permet ou Minister enpoz sa *moratorium*?

E osi Minis eski ou kapab konfirm avek nou Lasanble si tou ou zabitan ti okouran zot ti napa drwa fer okenn konstriksyon san laprouvasyon, ni blok okenn *pathway*, ni azout okenn morso avek zot lakaz san permisyon Minister letan ki zot ti pe siny zot Lagreman? Mersi.

MR SPEAKER

Mersi Onorab. Minis repons *please*.

MINISTER BILLY RANGASAMY

Mersi Mr Speaker. Pou sir mon pa kapab fer komantr sa ki'n arive avan mon letan dan lofis. Mon sagren ki sa in arive.

Me selman mon kapab donn ou mon lasirans ki Lotorite Plan anba nouvo *Physical Planning Act* pou fer zot travay dan en fason drwat e onnet e direk, pou *enforce* kot travay dan lavenir si zot bann kalite travay i ganny fer dan en fason ilegal e pa anliny avek aprouvasyon plan.

Lo dezyenm parti keston;- Sirkonstans ki nou ti dekouver sa problem. Mon pou les *PMC* elabor lo la e si i annan lezot plan mon ava azoute avek ou permisyon Mr Speaker.

MR SPEAKER

Mersi Minis. *CEO PMC* i kapab, *Deputy CEO* i kapab adrese?

DEPUTY CEO PMC STEVE MUSSARD

Mersi Mr Speaker. Bonzour Mr Speaker. Bonzour tou Onorab.

Onorab Bastienne problem ki nou ti pe rankontre Perseverance konmkwa ki *moratorium* ti ganny met an plas ti annan en kantite konplent lo sa bann parey ou pe dir dan bann konstriksyon dan sa koridor - sa koridor kot parey ou dir i annan bann *services*, bann lenfrastruktir.

E sa pa zis ti en problem lenfrastruktir ti en problem ant bann vwazen osi tou. Kantite konplent ti pe ogmante de zour an zour.

E pou reponn ou lot bout keston lo si bann zabitan ti okouran pou pa fer konstriksyon dan sa bann koridor. Mon pou dir ou wi, dan nou lagreman lakaz ler en

dimoun pe sinyen ti annan osi nou ti apel sa en *State Covenant*, ki donn ou bann gidans lo ki manner ou pou fer ou miray ouswa ou *extension* dan sa bout koridor ouswa bout devan.

So sa ti ganny mete - ti ganny donnen ler ou ti siny ou lagreman sa. So si pou reponn ou kestyon direktman se wi, ti annan sa gidans ki ti donnen avek tou ban zabitan. Mersi Mr Speaker.

MR SPEAKER

Mersi *Deputy CEO*. Bon nou a posede. Minis oule azout keksoz lo la?

MINISTER BILLY RANGASAMY

Wi. Mon ti oule zis azout en keksoz an zeneral mon demann leskiz Mr Speaker lo mon kote mon'n bliye dir bonzour. Ou bonzour e Lasanble bonzour e tou dimoun a lekout en leskiz.

Zis en pti bout pwen siplemanter lo sa pwen, osi letan *PMC* ti pe komans travay lo zot bann, ki manner ou apel sa lavant later, zot fer serten travay arpantaz lo *site* pou verifye, zot ti komans o profon komans dekouver sa bann kalite problemn *encroachment*, travay dan koridor.

E mon ti donn en lenstriksyon pou fer en *drone survey* aköz mon ti pe ganny diferan *vibes*, mon dir be konmsi kan manner ki lanplè sa problemn? So mon ti donn en lenstriksyon lekip pou, se sa *moratorium* ti vin an plas pou nou fer en *drone survey* pou nou analiz sa problemn an detay o pli profon. Mersi Mr Speaker.

MR SPEAKER

Mersi. Mon a ganny letan pran siplemanter Onorab Pillay.

HON SEBASTIEN PILLAY

Mersi Mr Speaker. E bonzour Minis ek ou delegasyon. Mr Speaker mon pe sey ganny en konpran kwa ki nou pe *press* Minis pou aksyon. So mon ti a kontan klarifye.

Mwan mon'n ganny sans koz avek en serten group zabitan Perseverance, en bon pe zot. E sa ki zot ti a kontan konnen se, eski Minister enn ;- pou les annan konstriksyon en miray otour zot propriyete?

Akoz i annan zot i konsernen ki zanfan i tay dan semen e prezan dan semen transpor i pas vit e la ou kapab ganny en aksidan ki arive.

Dezyenmman ou'n koz lo sa *statement* ou'n dir nou tre byento. I fer dezyenm Minis ki dir nou tre byento. So eski - ? Vi ki ou'n deza annan bann eksper tre kalifye la devan zot bann teknisyen tre prominan dan zot domenn, eski ou kapab dir nou par tre byento ki ou pe sey dir nou?

Dan ki dele letan zabitan Perseverance pou ganny kominike en larepons ki pou dir zot, ou kapab fer ou miray oubyen ou pa kapab fer ou miray? Mersi Mr Speaker.

MR SPEAKER

Mersi Onorab. Minis ou adres sa 2 pwen silvouple?

MINISTER BILLY RANGASAMY

Wi, mon dir mersi *LOTO* pou son kestyon - bon kestyon. Alors avek ou permisyon Mr Speaker mon a donn *CEO* Lotorite Plan pou ed nou elabor e klarifye sa sirtou premye parti kestyon.

MR SPEAKER

Mersi. *CEO* silvouple.

CEO PLANNING AUTHORITY ANGELA SERVINA

Mersi Mr Speaker. Bonzour tou Manm Lasanble. Bonzour Onorab *Leader* Lopoziasyon.

Repons ou kestyon se ki wi, tou bann zabitan Perseverance i kapab bann ki - parey nou pe dir - i reste dan ban lakaz ki nou apel *semi-detached* oubyen *terrace housing*, zot kapab fer laplikasyon pou miray i pa fek komanse toultan in leka.

Me normalman ki arive zot bezwen rod en *written consentement* avan avek *PMC*, avan ler ki zot *proceed* kot nou pou vin *submit* zot plan detaye pou zot miray. Pour bann baraz propriyete i diferan. I annan i *submit* miray i annan i *submit fencing*, i annan i *submit picket* - diferan.

So i annan posibilite, mon konnen ki dan lepase sete Biro Lenfrastruktir ki ti pe *submit* sa bann plan pou bann dimoun, me la zot kapab rod en *draftsman* oubyen en arsitek prive pou fer li.

Parey partou dan Sesel i annan *guideline* lo oter, *set back* avek balizaz bann keksoz koumsa ki nou donn zot. Nou'n aprouv en kantite *already* miray avek

fencing dan Perseverance. So wi zot kapab *submit* zot plan. I lese. Mersi.

MR SPEAKER

Mersi *CEO*. Minis ou ti pou azout keksoz lo dezyenm pwen? I ti'n demann kestyon lo dele letan.

MINISTER BILLY RANGASAMY

Wi, lo dele letan. Sa i en kestyon ki ase *challenging*. Mwan mon dezir se nou akseler sa o pli vit posib Onorab.

E mon pe fer mon mye posib pou nou kapab finaliz nou propozisyon avek Konsey Minis pou nou tonm dakor lo en plan pou nou bouz devan lo la e pran en desizyon.

So mon pe prevwar tou keksoz i mars byen ki nou kapab tonm dakor lo lafen Avril pou nou kapab pran sa desizyon. Mersi.

MR SPEAKER

Mersi Minis. Onorab Pillay. Klarifikasyon silvouple. Pa pran bokou letan.

HON SEBASTIEN PILLAY

Mersi Mr Speaker. Mersi pou ou lendilzans tre direk.

Mon'n ekout tou lede Minis avek *CEO* Lotorite Plan. Me sa ki mon *still* prezan pe rode se zabitan pe i oule dil avek problemn vandalizm, bann problemn *intrusion* lo zot propriyete eksetera, ki zot oule met en *fencing of some sort*.

Ou, ou pe dir nou zot kapab *submit* plan, Minis i dir nou dan en gro dele letan zot sipoze kapab ganny larepons. Me si zot kapab *submit* kote problemn i ete? Si problemn i avek *PMC*, eski *PMC* i kapab dir nou atraver Minis Mr Speaker pou mwan pa fer sa long.

Eski kan ki zot pou komans donn bann dimoun laprouvasyon pou zot *go ahead*, bann ki annan en rezon pou zot sey protez zot propriyete ouswa zot lakour, ouswa ot zanfann kont lanvironnman kot zot ete? Mersi Mr Speaker.

MR SPEAKER

Mersi. Minis oubyen Deputy?

MINISTER BILLY RANGASAMY

Wi, mon ti krwar mon'n reponn sa kestyon lo parti (b) Onorab parske mon ti dir bann dimoun i annan zot bann aprouvasyon e annord e an ekrir, zot kapab komans soumet

zot *commencement notice*. E zot travay dan sa bann landrwa ki tou keksoz i annord.

Laspe bann desizyon kot i konsern bann travay ki'n ganny fer dan lepase, ki ilegal dan bann koridor *utilities* ki annan bann *extension*, i annan bann *encroachment* eksetera, sa ki mon'n dir ou koumsa mon'n partaz ek Lasanble ki nou pou annan sa dele letan - mon pe espere ver lafen Avril nou a kapab dan en pozisyon pou nou vwar en fason organize mannyer nou fer sa. Mersi bokou.

MR SPEAKER

Mersi. Onorab Larue ek Onorab Roucou, mon regrete mon pou napa letan pou lot siplemanter. Mon a pas lo kestyon Onorab Egbert Aglae.

HON EGBERT AGLAE

Mersi Mr Speaker. Bonzour Minis ek ou *panel*. Minis kestyon i *comme* swivan ;

Eski Minis i kapab dir ek sa Lasanble ki prosedir e kondisyon final pou bann *tenant* lakaz *Beoliere* Dan Limon an sa ki konsern *reroofing* zot twatir lakaz? Mersi.

MR SPEAKER

Mersi Onorab. Minis ou repons silvouple.

MINISTER BILLY RANGASAMY

Mersi Mr Speaker. Mr Speaker permet mwan remersi Onorab pou son kestyon.

Onorab mon annan plezir pou dir ou ki *tender* pou sa proze *reroofing* pou sa 22 *unit* Dan Limon, in ganny konplete. E *PMC* in komans konsiltasyon avek bann zabitan sa lannen menm, pou donn zot detay sa proze. Par egzanp kou sa proze, kondisyon repeyman e bann travay ki nou pou fer.

Ziska prezan *PMC* in reisi ganny en kontrandi avek 9 sa bann zabitan. I annan 22 an tou e zot sa bann zabitan zot in dakor ek sa bann kondisyon sa proze. *PMC* i ankor pe kriy bann lezot zabitan pou diskit kondisyon sa proze, san ankor sa lezot 13.

Kan sa 9 zabitan i siny zot lagreman avek *PMC*, *PMC* pou degaze pou donn lenstriksyon kontrakter pou komans travay lo sa 7 lakaz avan e i a kontinyen kan lezot osi zot siny zot lagreman.

Antretan mwan koman Minis responsab mon le seryezman envit e ankouraz tou bann zabitan dan sa bann diferan *housing estate*, i pa zis Dan Limon.

Onorab i diferan *housing estate* enkli ou distrik osi ki pe ganny afekte avek problemn *concrete roofing tiles* pou en bon pe letan. I pa en keksoz nouvo Onorab parey ou konnen.

Pou silvouple vin devan e siny zot Lagreman e modalite peyman, pour ki *PMC* i a kapab demar sa travay o pli vit posib.

Mon Minister pou fer tou son posib pou fasilite sa proze. Lazans lenfrastruktir *SIA* pe donn zot lekspertiz teknik. *PMC* osi pe zot osi zot pe donn zot sipor teknik. Anmenn bann kontrakter serye lo sa bann Kontra rekouver lakaz e *supervise* byen tou sa bann travay. Nou pa oule tonm dan menm latrap ankor.

Mr Speaker prenon kont, prenon kont ki i annan 756 lakaz nasyonalmann ki annan sa problemn twatir, firanmezir ki lekonomi i kontinyen amelyore dan lavenir, mon Gouvernman pou swiv sa size pros e devlop en model vyab ki i a permet nou adres sa konsern nasyonalmann.

Pou terminen Mr Speaker, mon ti a kontan reasir bann propriyete ki nou pe kontinyen met bokou resours e bokou travay for pou nou amelyor zot kondisyon lakaz e konfor zot lakour. Fransman verite nou ti a kontan pe met sa travay pou konstrir nouvo keksoz.

Me bokou resours teknik pe bezwen al regle sa bann kalite problemn ki'n la pou en pe letan. I kas koul parey nou dir be selman nou bezwen fer li, nou determinen pou fer li.

E mwan koman Minis mon anvi ki sa i ganny regle, mon napa en baton mazik pu fer li *over night*, me selman mon determinen pou nou kapab fer li. Mersi Mr Speaker.

MR SPEAKER

Mon remarke nou ti devret annan en sanzman zofisye pou sa seri kestyon e nou pou dir orevwar Mrs Angela Servina e Mr Denis Barbe i sipoze antre pou sa bann kestyon la. Mersi madanm.

(Mrs. Barbe was excused from the House)

MR SPEAKER

Bonzour e byenveni Mr Denis Barbe *PS* pou *Housing*. Onorab Aglae ou annan siplemanter?

HON EGBERT AGLAE

Mersi Mr Speaker. Minis mersi pou ou bann larepons. Minis selman mon ti a kontan met devan ou ki letan sa problemn ti pe ganny met devan avek *PMC* dan lefase, nou ti fer en legzersis kot nou ti pas kot tou lakaz *DA* ek mwan menm.

Kot nou ti war lekel bann gravite ki ti pe priyorite akoz zot ti pe kas li an de *lot* pou fer - sa ti lefase sa.

Dan ou leta Minis in vini, e mon ti a swete ki letan legzersis ti pe ganny fer la, Lotorite Distrik ti a ganny osi enkli, akoz vi ki i annan zis bann let ki pe ganny met anba laport dimoun e dimoun pe *call* Lotorite Distrik. So mon ti a kontan- annou aziste pou nou kapab travay ansanm pou koumsa.

So mon kestyon premye Minis, eski bann kondisyon ki ou'n site Minis ki ou pa'n al an detay ladan akoz dan lefase baze lo kantite letan ki sa tenan kt dan sa lakaz, ti annan bann pousantaz kot i konsern peyman baze lo kou proze ki ti ganny met devan. E sa ti ganny fer par Minister atraver *PMC* ki ti dir ki poudir be vwala bann kondisyon si ou par lao 15an vwala kantite ou repeyman, ou *subsidy*. Eski nou pe *do away* avek sa la, mon ti a kontan konnen kot sa bann dimoun ou pe a donn zot kot zot menm zot ou pou bezwen pe pet zot *full payment*? Akoz sa problemn i pa zot problemn, lafot. I en problemn striktirel baze lo kalite materyo ki ti ganny servi dan lefase Minis.

Dezyenmman Minis mon ti a kontan petet demann ou, ki kou proze final pou sa ban proze akoz letan mon pou retourn ankor en pti gin dan lefase - mon konnen pri lavi in monte avan sa ti pe kout 60 a R75mil pou rekouver enn sa bann pti lakaz - i pa gro lakaz li. Ozordi mannyer mon pe konpran bann ki'n ale pou al get zot bann lagreman, i pe dir zot pe ariv ant 100 a R115mil pou enn sa bann pti lakaz.

Eski ladan ou pe dir mwan Minis poudir zot in evalye li dapre sa kou ki kontrakter in donn zot, ouswa estimasyon ki zot, zot in fer zot menm baze lo kou konstriksyon ozordi? Mersi.

MR SPEAKER

Mersi Onorab. Minis repons silvouple.

MINISTER BILLY RANGASAMY

Mersi Onorab pou ou kestyon siplemanter. Mon donn ou mon langzman ki *PMC* malgre

zot annan zot prop *Board* me solman zot ton anba mon Minister mon bezwen travay etrwatman avek distrik pou nou travay ansanm pou nou rod solisyon ansanm pou nou angaze ek kanmarad pou nou demar.

Pa zis dan nou distrik, dan tou distrik. Mon ekspekte nou fer parey Onorab adres sa bann problem *re roofing*. Sa ti premye - ou ti donn sa kontribisyon, en keksoz ki mon *believe* bokou ladan mwan osi.

Kot i konsern sa size modalite peyman i en *commitment* ki aparaman ti dan lansyen ladministrasyon. E mon ti fer resorti dan mon repons ki firamezir ki lekonomi i amelyore, Gouvernman pou swiv sa size pros e devlop en model vyal ki a kapab permet nou a fer sa konsern.

Par kont antretan mon ti a voudre petet sa parti kestyon ki *PMC* i adres lo son kote mannyer i pe adres sa epi nou lo kote Gouvernman nou firamezir ki keksoz i amelyore nou pou revwar sa *equation*, sa formil ki'n ganny met an plas.

Solman mon a vi ki *PMC* pe fer sa dyalog ek bann zabitan mon a demann *Deputy CEO* pou eklersi sa pwen silvouple Onorab. Mersi Mr Speaker.

MR SPEAKER

Mersi Minis. *Deputy CEO* i kapab azoute.

DEPUTY CEO PMC STEVE MUSSARD

Mersi Mr Speaker. Mersi Onorab pou ou kestyon. Kondisyon pou Dan Limon i reste parey. *Scheme* Modalite Repeyman i ankor parey i ankor parey, napa sanzman pou le moman.

Pou Dan Limon *Scheme* i dir ou si ou par 2018 ou lakaz i plis ki 15an ou pey 100poursan, sa kou sa proze. E Dan Limon i tonm sa kategori kot zot sipoze pey 100poursan.

E proze li menm li, i pa en pri ki nou'n determinen, nou'n *tender out*, nou'n fer bann travay evalyasyon pou regarde lekel ki pli meyer, prenon kont sa travay li menm. E pri osi tou. E pri ki nou pe diskite avek bann zabitan la i pri dapre *tender* pou sa proze.

Mon pa oule al dan detay filannegwir aköz bann pti detay personnel, sa mon kapab diskite ek ou pli tar, selman i dapre *tender*. I pa en pri ki nou'n envante. Mersi Mr Speaker.

MR SPEAKER

Mersi *Deputy CEO*. Mon rapel bann Manm ki kestyon lo siplemanter i bezwen lo *reroofing*, lakaz Dan Limon. Ou annan en klarifikasyon Onorab Aglae? Ale, wi?

HON EGBERT AGLAE

Mersi Mr Speaker pou donn mwan sa pwen klarifikasyon.

CEO mwan sa ki petet mon pe demande pou konsider *ok*, se ki nou vwar Gouvernman i vwar, Minister i vwar, aköz sa keksoz in *drag* ki sa bann letan ki in ariv ozordi in sot 15an. E la nou pou pe pini en group dimoun ki pa zot lafot aköz in *drag*.

Mon pou met blanm osi en pti pe lo ladministrasyon lepase aköz zot osi i annan en ta pou zwe ladan.

(APPLAUSE)

HON EGBERT AGLAE

Me selman- me selman, *the onus* i lo sa Gouvernman la pou onor sa bann langazman ki ti fer, ki letan in pase pou zot kapab donn aköz si ou pe gete laplipar pa pou kalifye pou ganny *subsidy* la.

Be annou gete ki mannyer nou pou donn zot en *subsidy*, aköz i pa zot lafot si letan in pase in pase ! Mersi.

MR SPEAKER

Mersi. Mon krwar komanter Onorab i pa en kestyon me Minis sirman in note son rekomandasyon. Mon a pran kestyon Onorab Labonte.

HON ANDY LABONTE

Mersi Mr Speaker. Bonzour Minis avek ou *panel*. Bonzour tou Manm koleg Onorab e bonzour tou dimoun ki anler dan Galeri e tou dimoun ki a lekout.

Mr Speaker kestyon i lo *reroofing* e prensipalman Beoliere. Mon note ki Onorab Aglae in aksepte e rekonnet poudir i en problem ki ladministrasyon avan ki'n koze e naryen pa'n ganny fer pandan tou sa bann letan. E la nou ladministrasyon in erit sa.

E dan menm lespri, mon ti a kontan ki petet Minis i eksplik nou si Gouvernman aktyel i pe mazin revwar petet sa Polisi ki'n ganny mete ankor par Gouvernman avan, ki si ou lakaz i plis ki 15an ou bezwen pey *full price* pou ou fer *reroofing* ki menm parler i plis ki-

Sa total pou zis fer *reroofing* i plis ki ou lakaz li menm li ki ou'n aste e sa i osi enkli ou zabitan La Rivière Anglaise ki pe fer *reroofing* lo zot. Mersi.

MR SPEAKER

Mersi. Minis si ou annan en repons lo *reroofing* Dan Limon silvouple?

MINISTER BILLY RANGASAMY

Mon krwar mon pou bezwen zis kontinyelman re vin pare mon laliny repons kestyon, se Gouvernman pou bezwen pran kont tou sa bann pwen ki nou'n fer sorti e re rod en modalite repeyman ki rezonnab.

Me selman i en keksoz ki nou bezwen analize firamezir ki lekonomi i amelyore. E nou kontan an tou 756 fanmir nou kontan zot, nou bezwen rod fason pou sey adres sa problemn. Me parey Onorab in fer resorti i en vye problemn. I domaz, me i en vye problemn.

Pou le moman ki mon'n, mon laliny ki mon'n dir koman Minis responsab se, bann zabitan vin devan. Zot oule zot lakaz i ganny adrese sa problemn koule i la, lekip teknik pe get sa proze lo en-

Parkont mon a fer resorti ki i annan fanmir, i annan fanmir ki'n pran lo zot menm, zot realize zot lakaz i prive zot in rebran zot lakaz lo zot menm - pa bokou me i annan ki'n fer sa pa.

Gouvernman letan nou pe get li ek *PMC*, nou pe get proze lo en gro lanpler, lo en lot volim. So nou kapab ganny pli bon pri, nou pe get tou bann mekanizm ki mannyer nou kapab fer sa pri desann. *SIA* -

Se sa ki mon'n dir mon pou vin devan avek en modalite pli efektiv posib pou nou war ki mannyer nou kapab fer sa aköz desann *to the maximum*. E mon'n fer resorti ki lekip pou bezwen *supervise* sa travay byen pou nou pa fer bann menm fot, lo seleksyon materyo eksetera dan lavenir.

So mon pe met tou lanfaz ki bann dimoun pa les zot pas ankor plis letan kot bann Kontra in ganny fer, nou'n ganny bann bon pri, siny zot lagreman louvraz a ganny fer. Sa premye pa omwen.

Sa ki mon pe sizere avek bann zabitan. Fer sa premye pa lakour i ava, zot kondisyon lakour i ava amelyore, lakaz pa a koule epi nou ava revwar firamezir ki sityasyon pei i amelyore. Mersi Mr Speaker.

MR SPEAKER

Mersi Minis. Mon napa letan pou lot siplemanter. Mon a pas lo kestyon limero 3 Onorab Naidu.

HON SATHYA NAIDU

Mersi Mr Speaker. Bonzour Minis ek son delegasyon, bonzour tou koleg Onorab. Mr Speaker kestyon i lir *comme swivan*-

Eski Minis i kapab enform Lasanble ki pozisyon lavant *unit* bann blok flat pou bann zabitan ki pe reste dan *Housing Estate* Dan Koko St Louis ki ti pou resevwar zot lavant depi 2017?

MR SPEAKER

Mersi Onorab. Minis ou repons ?

MINISTER BILLY RANGASAMY

Mr Speaker parey Onorab in fer resorti wi, i annan en retar depi en bon pe letan lo sa size. Sa ka Dan Koko parey dan plizyer distrik, mon konpran i relye avek sa program ki ansyen administrasyon ti anonse "Annan pou prop lakaz."

Malgre laz sa program e laz sa bann lakaz Dan Koko, i malere pou dir ki mon'n dekouver ler mon pran lofis ki bann prosesis lavant later pa ti ankor konplete.

Me parkont depi environ Avril, Me 2021 ler ou'n pouse ou menm pou sey adres sa problemn, alert mwan ki i annan en problemn, mon kapab reasir sa Lasanble ki bokou travay in ganny fer pou akseler e konplet enn fwa pour tou, sa bann prosedir.

Pour ki tou zabitan i a resevwar zot lavant enn fwa pour tou Dan Koko. An premye lye menm si arpantaz in ganny konplete lo teren, *PMC* in bezwen transfer sa bann later kot sa bann blok ti'n ganny konstrir ki ti lo *SHDC* lo Gouvernman e finalman lo *PMC*.

Sa in pran en pe letan pou konplete e bann prosedir legal ki nou'n bezwen pas ladan. An paralel an prenon kont la sa bann *flat* in nesese pou *SIA* - Lazans Lenfrastriktir reprodwir tou sa bann plan lakaz anliny avek provizyon dan *Condominium Act*.

Mr Speaker mon oule fer resorti ki ti napa - ti napa okenn desen lo sa proze ler mon ti pran plas Minis.

So dan sa letan 2an, malgre nou annan en kantite travay nou annan en kantite proze pou nou devlope, kantite

nouvo *design* pou nou fer nou bezwen *go back to the drawing Board* parey nou'n dir e reprodwir sa bann plan. Nou'n fer li parske nou anvi regle sa problemn pou nou bann zabitan.

Me malgre serten bon progre lo travay teknik nou'n fer fas osi avek en nesosite pou sanz avoka ki ti pe travay lo sa dosye - en lot defi me nou'n sirmonte. Akoz nou determinen plis ki zanmen pou regle sa bann retar e fristrasyon pou plizyer lannen.

Mr Speaker ozordi mon la devan sa Lasanble e mon annan en gran plezir pou konfirman ki nou travay teknik in konplete e *PMC* ek son avoka in reisir konplet tou formalite e fer peyman *stamp duty*. I reste zis pou lanrezisteman sa 5 blok formalize avan ki *PMC* i a kapab apel bann zabitan enn par enn pou siny zot lavant.

Mon espere sa pa vin en problemn lasirans apre. Mon an dezir, mon espere e mon pe ankouraz nou lekip pou nou rekonnet sa avan lafen Zilyet 2023.

Mon war Onorab Lemiel in regard mwan byen, i pe note. Me selman lentansyon i la tou dezir i la pou nou fer li. Toudmenm Mr Speaker mon oule remersye tou bann zofisyete ki'n profesyonnelman debrouye pou fer rev sa bann zabitan Dan Koko vin vre. E osi ou menm Onorab mon konnen ou'n pous for e tou bann zofisyete distrik.

E nou lapriyer se nou a kapab a lafen selebre ansanm tre byento e nou sant sa pti sanson "*Plutôt tard que jamais.*" Mersi Mr Speaker.

MR SPEAKER

Mersi Minis. Onorab Naidu siplemanter?

HON SATHYA NAIDU

Mon napa vreman en siplemanter Minis in vreman konpreansiv dan son repons. Lenformasyon ki'n ganny fer resorti i pou dimoun Dan Koko e vi ki en dele letan in ganny etabli, mon swe Minis e se nou pou kapab *attend* sa lobzektif. Mersi.

MR SPEAKER

Mersi Onorab. E Minis mon asire in note. Mon a pran siplemanter Onorab Roucou.

HON MICHEL ROUCOU

Mersi Mr Speaker. Bonzour Minis ek ou lekip. Minis baze lo keston ki ou'n donner lo lavant pou bann zabitan Dan Koko.

Eski sa i enkli pou bann larestan landrwa tou ansanm bann larestan landrwa kot bann zabitan pe esper zot lavant tou?

E osi Minis si ou kapab dir nou pou en zabitan parey bann zabitan Dan Koko, bann ki ankor pe sper zot lavant, ki mannyer i marse sa zafer lavant si mon pe reste dan en *block flat* eski mon bezwen esper tou mon bann larestan vwazen fini peye pou mon kapab ganny mon lavant? Mersi.

MR SPEAKER

Mersi Onorab. Minis ou a donn en klarifikasyon.

MINISTER BILLY RANGASAMY

Mersi bokou Mr Speaker. Mr Speaker i annan en pe laspe teknik. So avek ou permisyon mon ava demann mon zofisyete *Deputy CEO* pou *PMC* pou adres sa keston Onorab. Mersi bokou.

MR SPEAKER

Tre byen. *Deputy CEO*.

DEPUTY CEO STEVE MUSSARD

Mersi Mr Speaker. Mersi Onorab Roucou pou ou keston.

Dan Koko i en legzanp tipik avek bokou nou bann *housing estates*.

Si ou annan bann *housing estates* ki en pti pe byen preski bann menm laz parey Dan Koko bokou sa bann *estate* napa desen, napa bann desen ki kapab permet nou bouz en pti pe pli vit. E sanmenm sa ki ou war prosedir pou Dan Koko en legzanp in tard sa kantite.

Pou lezot *estate* nou annan en plan devan nou, nou asize tou le semenn nou'n fer en rankont tou le semen avek sa tim ki travay lo pou bann zafer *condominium* e pou nou kapab annan en *roadmap* parey nou dir.

Zis pou reponn ou keston lo prosedir pou bann vye *estate* ki nou bezwen fer, fer desen tou sa bann *unit* enn par enn byen detaye. Sertifye par en *surveyor*.

Dezyenmman nou bezwen *survey* sa propriyete aköz parler dan en *estate* ou war i annan 4, 5, 6 blok. Nou bezwen fer arpantaz, fer *survey* ki sak blok i tonm lo en *parcel* lo li menm.

So sak blok i annan en *parcel number* e osi petet si i annan *parking* si i annan lezot lenfrastruktir kot sa osi i ganny separe. Sa i ganny re anrezistre kot Rezistrar ler i fini

trournen e la nou kapab nou anrezistre osi sak blok lo sa *parcel* nou anrezistre sa bann *unit* osi tou ki ganny anrezistre i ganny sertifye.

E la de la kan tousala in fini la nou kapab komans fer lavant, nou komans kriy bann zabitan pou zot siny zot lavant. Sa i en pe bann diferan letap kot nou war nou kot ou pou war *process* i en pti pe tarde.

Be *going forward* devan diskisyon ki nou gannyen avek *SIA* pou bann nouvo *estate* sa bann desen, bann zafer desen arpantaz sa i ganny fer davans. E la nou kapab vitman fer sa travay kot nou kapab anrezistre ouswa donn lavant dimoun kan i fini peye.

En lot pti konsern ki ou'n leve se ki si nou bezwen esper tou dimoun fini dan sa *block of flat* pou nou kapab komans *process* later. Posibleman ler mon ti antre *PMC* mon ti war i annan sa tandans, ki nou espere tou dimoun i fini dan sa blok avan nou kapab bouze.

Nou'n dir non, sa *process* pa bezwen espere sa nou kapab komans fer li la. E se sa ki ou war nou pe dir ek ou nou pe zwenn tou le semenn pou nou kapab fer marse fer bouze sa bann dosye. Pou dir ou fransman i annan en kantite i annan en pros 100tenn *estate* bann blok lakaz kot nou bezwen fer sa prosedir.

So travay en kantite travay pou entans be nou konnen poudir avek Minister avek sipor Minister avek *SIA*, nou annan en plan devan nou konmsi pou nou kapab bouze. Konmsi ki bann dimoun ki ler i fini peye la i pa bezwen atann sepa konbyen lannen ankor, pou nou kapab komans sa prosedir apre la.

Nou pe sey fer li proaktivman ki ler ou fini peye, en dimoun i fini peye la nou kapab fer son laranzman fer li ganny son lavant. Mersi Mr Speaker. Mon espere i kler Onorab.

MR SPEAKER

Mersi *Deputy CEO*. Mon a pran kestyon Onorab Pillay.

HON SEBASTIEN PILLAY

Mersi Mr Speaker. Mr Speaker lefe ki bann zabitan Dan Koko in vot pou bann *MNA SNP* e *LDS* pandan bann dernyen eleksyon i paret ki zot pa'n lager for pou sa size. E mon kontan war sa enn ki la pe fer en pti zefor

bann avan pa'n fer so-

Sa ki mon ti a kontan demann Minis, Minis i ankor en dezyenm fwa nou ganny en *statement* avek ou ki *non-committal*.

Sa lannen nou lo kote Lopoziyon nou oule *press* ki nou ganny bann *timeframe* dan ki sa bann keksoz pou ganny adrese.

So eski ou kapab donn nou en *commitment* lo en *timeframe* lo kan ki sa problem ki nou pe fer fas avek Dan Koko pou komans ganny adrese?

Savedir eski i pou dan sa lot prosen 2 mwan, 3mwan? Kan ki *PMC* pou komans *call* bann dimoun pou fer bann diskisyon ek zot? Eski dan sa 5mwan ki la?

So nou a konnen kekfw ki par milye lannen nou a konnen si bann travay in fini ganny fer, pour ki sa bann problem i ganny adrese ki sa bann zabitan in komans ganny zot bann lavant? Mersi Mr Speaker.

MR SPEAKER

Mersi. Minis repons *please*.

MINISTER BILLY RANGASAMY

Wi. Mersi Onorab pou ou kestyon. Mwan mon ti'n met sa pwen dan mon larepons, mon ti dir ki nou pou komans apel tou bann zabitan pou siny zot lavant e nou anvizaze fer sa pa pli tar li lafen Zilyet 2023.

Petet letan mon ti pe eksplik sa, ou pa ti port atansyon Onorab. Me solman mon ti fer sa pwen en? Mersi bokou.

MR SPEAKER

Mersi Minis. Klarifikasyon Onorab, wi?

HON SEBASTIEN PILLAY

Mersi Mr Speaker. Savedir ou pe donn nou en lasirans ki lafen Zilyet 2023 ki sa travay pou ganny konplete?

MR SPEAKER

E mon krwar in dir sa Onorab. Mersi.

HON SEBASTIEN PILLAY

Non mon oule ganny en lasirans Mr Speaker.

MR SPEAKER

Be in dir sa in egzaktaman dir ...

HON SEBASTIEN PILLAY

Wi Mr Speaker, avek tou respe Minis i la i kapab donn Lasanble en lasirans lo la. Si en travay ki in fer.

MR SPEAKER

Sa kestyon in fini reponn. Mon a termin lo sa kestyon la e nou a bouz lo prosen kestyon limero 4 ki osi pou Onorab Sathya Naidu. Onorab.

HON SATHYA NAIDU

Mersi Mr Speaker. Mon konnen ki degre zefor mon predeserer in met dan tou bann demars, me malerezman nou pa ti dan Gouvernman.

Alors ozordi i dan Gouvernman lapros i diferan.

(APPLAUSE)

HON SATHYA NAIDU

E menm zot prop koleg lo lot kote latab in admet ki zot i *fail* pandan 15an.

MR SPEAKER

Ou kestyon prezan.

HON SATHYA NAIDU

Ok Mr Speaker. Eski Minis i kapab enform Lasanble lo travay ki *Seychelles Infrastructure Agency* e *PMC* i anvizaze fer kot *Ex-Geers Housing Estate* dan distrik St Louis, an vi ki i annan en gran degradasyon dan leta lenfrastruktir sa bann *unit*? Mersi.

MR SPEAKER

Mersi Onorab. Minis repons?

MINISTER BILLY RANGASAMY

Mersi Mr Speaker. Mon oule dir mersi Onorab pou son kestyon e pou fer- *ok*. Mon okouran ki li osi i met en kantite zefor pou *solve* sa problemn *Ex-Geers* e bokou- e sa pa zis dan distrik St Louis i partou dan Sesel. I annan bokou problemn.

Mon konnen Onorab Vidot i annan kot li kot *Eden Village*, i annan Glacis partou. *Eden Village* i Roche Caiman. So an prensip i sa problemn ki nou apel *concrete spalling* bann beton ki pe dekoke vi ki bann feray pe rouye.

Depi Septanm 2022 Lazans Lenfrastruktir in fer en evalyasyon konpreansiv. Apre ki nou'n analiz sa sityasyon nasyonalmann in fer en evalyasyon konpreansiv pou tou bann *unit Ex-Geers* spesifikman. Nou'n prepar en plan

renovasyon ase detaye avek son kou pou sak *unit* endividuelman.

Fodre pa nou bliye ki tou sa bann *unit* i prive e tou bann zabitan in fini peye e aste zot lakaz. Ankor enn fwa i annan en travay ki nou'n bezwen fer en *diversion* lo nou bann plan travay ki nou ti annan devan nou, pou nou al rod fason pou rod solisyon. Nou pare pou fer sa aköz nou la pou nou travay pou sa pep.

Mr Speaker vilaz *Ex-Geers* in ganny konstrir plizyer lannen pase e sa pa en keksoz nouvo. I konpri 4 blok 6 *unit* savedir 24 *unit* an tou. 24 *unit*. Minister in fer serten analiz e nou'n determinen ki reparasyon i posib.

So tou bann travay teknik in fini konplete par *SIA - Lazans Lenfrastruktir. PMC* lo son kote in fer provizyon bidzeter e la finalman proze in pare pou al lo prosesis *tender*.

Mr Speaker a sa pwen, permet mwan fer resorti ki in annan plizyer konplikasyon ki'n vin avek sa kalite travay dan sa bann lakour – ou kapab mazin en - sa bann lakour in fini etabli. Dimoun pe viv ladan zot annan zot pake, zot annan zot lakour, i se zot, prezan ou pou al ammenn en kontrakter vin tay anndan se zot.

So pou plizyer lannen- sa bann fanmir in la pou plizyer lannen sa bann defi e konplikasyon par egzanp mon a sit detrwa Mr Speaker avek ou permisyon i *comme swivan*;

Ki laranzman re lokasyon ban zabitan konzwentman avek zot menm bann zabitan zot menm e osi avek Lotorite Distrik pou fer pandan travay renovasyon entansif. Savedir kote nou pou deplas sa bann dimoun pou nou fer sa bann kalite travay?

Sa bann travay pou enkli ase entansif. Ou bezwen fer bann travay ki pou annan bokou lapousyer e i annan bann pake dimoun ki la ki ou pou fer ek sa bann pake, ki mannyer ou pou *secure* sa bann keksoz? Enn.

Modalite e plan repeyman sa i enportan. Modalite e plan repeyman prenon kont sa bann lakaz i prive pou travay renovasyon par bann zabitan wi. Letan nou get li dan son totalite nou kapab ganny en oli bann pri posib aköz nou pe get lo volim travay.

Letan nou pe ko bann kou pou mobiliz kontrakter, nou pou kapab ganny pli

bon pri be solman i bezwen annan en modalite pou fer repeyman.

E trwazyenmman - so sa plan renovasyon li menm setadir sekans travay e dirasyon par *unity* i 1 mwan, 2 mwan, 3 mwan? Konbyen? Ou pa kapab zis vini pran tou *unit* komans travay e fer dezord, nou bezwen travay dan en fason organize.

Nou pou bezwen zwenn ban zabitan Onorab avek Lotorite distrik e mon sir ou pou ed nou dan sa demars, pou nou fer sa diskisyon e rod solisyon ansanm, pandan mwan Avril - mon pe koz ou mwan prosen la, en?

So, an vi ki bann travay teknik ki'n ganny fer, nou'n konnen mannyer nou pou adres li teknikman, me selman i annan sa bann dyalog ki nou bezwen fer ek nou bann zabitan.

Mr Speaker nou anvizaze pran menm lapros lo bann lezot landrwa tel ki Vilaz *Seaview Estate* dan distrik Glacis. An gro Mr Speaker Minister pe pran sa 2 proze koman proze pilot, pou determinen meyer fason nasyonanman mannyer nou pou kapab adres sa problemn *concrete spalling*. Mersi Mr Speaker.

MR SPEAKER

Mersi Minis. Siplemanter Onorab Naidu.

HON SATHYA NAIDU

Yes Mr Speaker. Zisteman lo sa size kou sa konponan kou konbyen eski i pou arive antou e *on average* par *unit* prenon kont sak *unit* i diferan lo lafason ki sa problemn *spalling* i zot pe rankontre?

E dezyenmman lo model repeyman, ki bann fason eski zot pe mazinen ki bann dimoun pou kapab antre dan en Lagreman avek bann departman respektif? E ki pou arive avek bann si an ka zot trouve zot fer *means testing* par egzanp e zot napa neserman le mwayen? Akoz i annan en posibilite ki sa osi i kapab leve.

What is the way forward with regards to this? Mersi.

MR SPEAKER

Mersi Onorab. Minis? *Panel?*

MINISTER BILLY RANGASAMY

Mersi Mr Speaker. Mr Speaker avek ou permisyon mon pou demann Lotorite *SIA* reprezante par zot *CEO* la pou eksplik en pti pe lo bann zafer kou.

Aprè lo bann laspe lagreman, *means testing* eksetera mon ti a prefere ganny konsey mon *PS* pou Lakaz akote mwan lo sa size. Mersi Mr Speaker.

MR SPEAKER

Tre byen nou a pas laparol avek *CEO* Shah.

CEO SIA JITESH SHAH

Mersi Mr Speaker. Mersi Onorab pou ou kestyon. Onorab i pou en pti pe difisil pou mwan devwal sa lenformasyon la akoz i pou en prose ki nou pou al lo *tender*.

Me selman ki mon kapab dir ou, i definitivman en lenformasyon ki mon kapab *share* avek ou direktman e osi ler nou pou zwenn ek bann zabitan an Avril, nou pou bezwen met sa kou devan zot. Selman pou mwan donn en *figure* la dan medya ler i en keksoz ki nou pe anvizaze *tender soon*, i pa pou tro apropiye.

MR SPEAKER

Tre byen. Minis oule pas laparol avek *Deputy CEO* oubyen *Panel?* *PS?*

PS DENIS BARBE

Mersi Mr Speaker. Bonzour Mr Speaker e bann Manm Onorab. Lo bann *case* vilnerab firanmezir ler nou pou *rollout* nou pou bezwen *means test* tou bann dimoun ki'n zwenn sa bann paramet.

Nou annan bann paramet ki nou deza pe travay lo la pou *set up*. E si i pou annan en nesosite ki sa bann kliyan i zwenn sa bann paramet, nou annan en *budget line* pou bann *case* vilnerab.

Sa prezan nou ava get konbyen zot i annan, balans ki avek kou pou nou kapab gete lenpak bidzeter pou nou kapab gete prezan ki mannyer nou kapab *at least* ede. *Thank you.*

MR SPEAKER

Klarifikasyon Onorab?

HON SATHYA NAIDU

Yes Mr Speaker. Lo dele letan ki pou pran depi ler zot anvizaze komans sa demars silvouple.

MR SPEAKER

Mersi. Minis? *Panel?*

MINISTER BILLY RANGASAMY

Mersi Onorab. Lo kot i konsern sa konversasyon avek nou bann zabitan, ansanm nou planifye fer sa mwan Avril. I tou depan ki nivo sa - konmsi kan mannyer keksoz i devlope.

Nou ti a voudre zabitan i, nou ti a *unite* e nou ti a kapab regle li o pli vit posib, me i pou tou depan mannyer nou konversasyon i deroule. I pou difisil pou mwan konmsi fer konklizyon si i 3mwan, si i 6mwan. Mon priye i o pli vit posib. Mersi Mr Speaker.

MR SPEAKER

Mersi Minis. Mon a pran kestyon Onorab Henrie.

HON GERVAIS HENRIE

Mersi Mr Speaker. Bonzour tou dimoun. Minis Mr Speaker dan son larepons Minis in mansyonn St Louis avek *Seaview* Glacis koman 2 proze pilot ki zot pe al fer.

Me dan *procurement plan* ki'n ganny pibliye an le 13 Fevriye sa lannen, i annan plizyer bann landrwa enkli Roche Bois, Mont Buxton ki *PMC* par egzanp in endike ki zot oule fer sa travay *spalling*.

So mon anvi konnen si malgre sa *procurement plan* ki nou kapab trouve lo *sit web* Minister Finans i pa neserman pou arive, akoz Glacis avek St Louis i priyorite pou si vreman i annan larzan ki zot pou kapab gannnen pou fer travay dan lezot distrik ki osi annan sa problemn. Mersi.

MR SPEAKER

Mersi Onorab. Minis?

MINISTER BILLY RANGASAMY

Mersi Onorab pou ou kestyon. En bon kestyon, mon pou avek ou permisyon Mr Speaker mon a demann *Deputy CEO PMC* eksplik sa. Akoz i en pti pe dan son laliny bidzeter an prensip en.

MR SPEAKER

Tre byen. *Deputy CEO* ou annan laparol.

DEPUTY CEO PMC STEVE MUSSARD

Mersi Mr Speaker. Mersi Onorab pou ou kestyon. Mont Signal ler nou ti pe fer nou revi, ler nou ti pe fer nou plan investisman pou 2023 ziska 2025, pou nou prezant ek *Board*, Mont Sinyal ti en landrwa kot nou ti war ki i demande – i demande en pe travay

lo la, akoz ti'n ganny bokou afekte lo term son laparans.

Ki nou ti oule fer, ki nou pou war dan sa *procurement plan* se ki nou ti anvi investir en pe larzan pou nou fer en *facelift* sa *estate*.

Parey nou pou war dan sa bann nou plan *procurement* nou pou war poudir i annan en kantite *estate* ki'n la, en bon pe letan kot ou pase ler ou pase parsel, ou tann tou kou bann Onorab pe dir ek ou 15an, 20an, 13an pa ankor fer naryen, pa'n tous ditou.

So in en kantite *catching up* pou nou fer koman *PMC*. E Mont Signal i enn, Roche Bois i en lot ankor dan ou distrik ki nou'n met li koman bann *estate* kot i demann en pe latansyon.

I pa neserman pou nou al adres *spalling* akoz nou bezwen en pe lentervansyon avek nou *partner*, *SIA* ki pou ed nou, donn nou sa gidans. Selman nou ti oule fer en *facelift* konplet lo sa bann *estate*. Mersi Mr Speaker.

MR SPEAKER

Mersi. Wi Onorab, ou annan en klarifikasyon.

HON GERVAIS HENRIE

Wi mon annan klarifikasyon akoz mon kestyon anfet pa'n ganny reponn. Mon kestyon sete lo sa *procurement document plan* ki pibliye ki en dokiman piblik, zot met tou sa bann lentansyon.

Mon kestyon sete, eski zot pou ganny larzan sa lannen ki konmsi akoz nou pa anvi *raise the hope of* nou bann *constituent*. Nou anvi konnen wi pou fer ouswa pa pou fer.

Akoz sa size spesifik ki pe ganny adrese, i form parti the *procurement plan* - non solman Glacis avek St Louis, me lezot distrik mersi.

MR SPEAKER

Mersi. *Panel?* Minis?

MINISTER BILLY RANGASAMY

Mr Speaker mon ava demann avek ou permisyon *Deputy CEO* pou klarifye sa pwen.

MR SPEAKER

Silvouple *Deputy CEO*.

DEPUTY CEO PMC STEVE MUSSARD

Mersi Mr Speaker. Onorab tou sa proze ki ou war lo nou pa'n *procurement* savedir, ki *Board* in aprouve pou nou antreprann sa bann proze. Si - *well* nou lentansyon se ki fer li sa bann letan parey nou'n mete, akoz nou'n met li par *quarter*, byensir tou plan ou bezwen - "*nothing is cast into stone*" parey nou dir.

Nou bezwen adres li en pe si nou bezwen pous li en pe pli deryer, nou ava fer sa laranzman. Me selman si ou war i lo nou plan pou sa lannen swa 2024 swa 2025, savedir ki annan lo sa larzan ki nou'n bidzete. Mersi Mr Speaker.

MR SPEAKER

Mersi *Deputy CEO*. Mon a pran kestyon Onorab Pillay.

HON SEBASTIEN PILLAY

Mersi Mr Speaker. Mr Speaker an relasyon ek kestyon ki'n ganny demande lo ou *cashflow* akoz si sa pe tonm anba *cashflow PMC* pou kouver sa bann depans, mon ti a kontan ganny klarifikasyon avek *panel*, konbyen dan sa bann travay ki pou ganny kouver anba okenn Bidze ki Minister Lenfrastriktir i annan?

Akoz ler mon pe regard Bidze la *currently*, mon pa pe vwar lespas pou kapab konplet tou sa bann proze finansyerman. So petet ou kapab klarifye ek mwan si i annan okenn plan par Minister pou vin rod okenn Bidze siplemanter pandan sa lannen, pour ki nou kapab ganny larzan pou fer sa bann proze.

Prezan an relasyon avek *Seaview Estate* sa i en demann ki pe *ongoing* e mon konnen in ganny pase dan sa Lasanble a plizyer repriz.

So eski parey ou pe fer avek St Louis, i annan en *timeline* ki ou'n etabli pou annan diskisyon avek bann lokater, sirtou Mr Speaker ki lefe i annan 2 *flat*, 2 *unit* ki'n brile dan *Seaview* pandan letan nouvo Gouvernman, ki pa ankor ganny *attended* to ditou.

So eski nou kapab ganny en klarifikasyon lo kwa ki pou ganny *prioritise* Mr Speaker? Mersi.

MR SPEAKER

Mersi Onorab. Minis?

MINISTER BILLY RANGASAMY

Mersi Mr Speaker. Ankor enn fwa mon pou bezwen demann *Deputy CEO* pou klarifye sa laspe. Mon'n kapab konfirman kot i konsern parey mon ti mansyonnen pour size *Ex-Geers* ki travay teknik ti'n konplete *PMC* in fer provizyon bidzeter e finalman proze in pare pou al lo prosesis *tender*.

So pou konfirmasyon parey mon'n fer resorti, pou Dan Koko li i korek, *Ex-Geers*, *sorry excuse me Ex-Geers* pardon. *Ex-Geers*. Me par kont mon a les *Deputy* klarifye pou *Seaview*. Mersi Mr Speaker.

MR SPEAKER

Mersi Deputy.

DEPUTY CEO PMC STEVE MUSSARD

Mersi Mr Speaker. Mersi Onorab. Pou *Seaview* nou annan en pti pe larzan ki nou'n mete de kote, nou'n met en pe larzan nou. Pou sa lakaz brile nou osi nou annan en pti pe larzan ki nou'n gannyen atraver lasirans. Pa bokou akoz lakaz in ganny asire a en pti ki ba - so nou annan en pti pe larzan.

Selman bokou sa bann lakaz in ganny aste zot prive e mon krwar si mon pa tronpe nou bezwen fer menm diskisyon avek *Ex-Geers* parey nou pou fer avek *Ex-Geers*, pou nou kapab antreprann sa bann travay.

E tou - i pa en travay ki sitan senp, nou bezwen ale diskite sa bann dimoun. Si nou annan bann ki bezwen sorti posibleman si nou kapab - Ou konnen i telman teknikman en pe *complex* pou nou antreprenan menm sa travay menm li menm li i pa en travay fasil.

Akoz i en nou pe koz bann demann striktirel, ki bezwen ganny antreprann *supervise* byen. E mon krwar sa dialog osi nou bezwen antre avek *Seaview once* ki nou fini avek *Ex-Geers*. Sa mon krwar lentansyon ki nou anvi fer sa lannen. Mersi Mr Speaker.

HON SEBASTIEN PILLAY

Mr Speaker. Tre, tre vit. Avek ou permisyon, eski mon kapab ganny langazman *PMC* avek Minister, pou zwenn avek Lotorite Distrik e donn zot en *time frame* sirtou lo sa 2 *flat*? Akoz Lotorite mon konnen tou dimoun pe ganny presyon lo sa 2 *flat* ki'n brile. Kan ki zot pou kapab dil avek sa sityasyon?

E si nou etabli en modalite ki pe marse avek *flat Ex-Geers* akoz nou opa koman avek serten *flat* dan *Seaview at least* ki prezan nou ava annan en problem ki pli

redwir, ler nou ariv pli devan olye pou nou vin rezourd *the whole* problemn.

E prezan nou pou war ki i pou ganny difikilte akoz sa bann zabitan pe rankontre serten difikilte?

Mon zis pe met sa avek *panel*, pou zot konsidere ki an ka zot imedyatman lo la. Mersi.

MR SPEAKER

Mersi. Eski Minis oubyen *CEO* i kapab donn zot langazman? *Deputy CEO* pou donn en langazman? Oubyen ou pou konsidere?

MINISTER BILLY RANGASAMY

Mr Speaker nou a konsidere. I en pwen ki'n met devan. Mon ti zis anv zis eklersi ki sa bann lakaz i prive e *PMC* ki pe zer sa landrwa, so i pa pou- son laspe bidzeter pa pou aparet dan Bidze nou Minister, me i pou en keksoz ki *Board PMC* pou pran desizyon.

Me nou'n pran sa 2 vilaz *Ex-Geers* avek *Seaview* parske zot 2 bann vilaz ki ase kritike nou'n met bann zefor teknik pou nou analiz sa 2 vilaz o profon. E se sa ki mon'n apel sa koman sa proze pilot, pou nou kapab ganny sa modalite pou nou atak bann lezot.

Petet menm annan bann *guidelines* ki nou kapab partaz ek bann zabitan, kan manner pou fer sa travay. Mersi Mr Speaker.

MR SPEAKER

Mersi Minis. Bann lezot Manm mon regrete nou pa kapab pran plis siplemanter lo la. Prosen kekyon akoz prezans bann zofisye nou pou al o kekyon limero 7 dan non Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi tou dimoun. Mon kekyon i al koumsa: -

Eski Minis responsab pour Lenfrastriktir i kapab donn detay Lasanble a propo proze koneksyon bann zabitan *Ex-Pool Estate*, Baie Lazare, lo sa *sewage treatment plant (STP)* ki zot anvizaze fer? Mersi.

MR SPEAKER

Mersi. Minis.

MINISTER BILLY RANGASAMY

Mersi Mr Speaker. Mersi Onorab pou ou kekyon. Malerezman sa proze in ganny en

pe retar dan faz *tender*. In annan diferan konplikasyon pou nou sirmonte. Bann konplikasyon teknik.

Me mon lekip in osi byen apresye ki kantite zefor ki ou'n mete Onorab osi dan, e Lotorite Distrik anver sa proze. E pou li ariv kot i ete ozordi.

E ozordi mon annan gran plezir pou anonse ki sa proze pe finalman ganny pibliye. Annefe in ganny pibliye yer Lendi le 30 Mars pou *tender*.

E nou anvizaze demar proze komansman Me 2023. Mersi Mr Speaker.

MR SPEAKER

(Off-mic)

HON FRANCIOS ADELAIDE

Mersi Minis pou ou larepons. E lo lapar zabitan Baie Lazare, mon ava dir ou avek ou lekip mersi akoz in en proze ki en bon pe letan nou'n espere. E nou zabitan osi mon krwar zot pa'n mal pas dan bann problemn.

So esperon ki la zot pe tande. E nou ava get zot. E Minis mon ti ava kontan ki parey ou'n donn nou sa garanti, se ki ler i ariv bann keksoz koumsa bann retar si lo *tender* se ki zot annan bann kominikasyon sorti kot zot departman.

Akoz ki i fer, bann zabitan zot krwar poudir *MNA* avek *DA* pa pe travay. Ouswa bann lezot soz. *So*, mon ti ava kontan ki zot pran sa a lavenir pou zot kominike e met bann dimoun dan perspektiv ki manner keksoz i ete.

Me solman mon vremen apresye. *Hopefully* nou ava war sa proze komanse. Mersi.

MR SPEAKER

Mersi Onorab pou ou rekomandasyon. Mon ava pran kekyon Onorab Aglae?

HON EGBERT AGLAE

Mersi Mr Speaker. Minis lo size Bidze pou sa bann proze *STP*, mon ti ava kontan petet demann ou eski sa i pe konpri, mon konnen kekyon i lo Baie Lazare.

I fer 2an ki nou pe koz lo *STP* larzan i ganny mete pa'n ganny depanse. Eski bann lezot landrwa ki'n ganny *earmark* parey kot Port Glaud osi i pou i pou *feature* lo zot bann program pou sa lannen? Mersi.

MR SPEAKER

Mersi Onorab. Minis?

MINISTER BILLY RANGASAMY

Mersi Onorab Aglae pou ou kestyon. Vi ki *Deputy CEO* dan son kapasite osi teknik koman en enzenyer dan sa laliny kot i konsern *STP*. E i pe vwar sa bann vilaz kot i annan sa problemn, mon a les li donn en pti repons lo sa pwen Onorab.

MR SPEAKER

Mersi. *Deputy CEO* ou annan laparol?

DEPUTY CEO STEVE MUSSARD

Mersi Mr Speaker. Mersi Minis. Onorab Port Glaud i osi i annan enn de *estate* ki nou pe ganny en bon pe *challenge* avek problemn desarz parey ou okouran.

Enkli lezot distrik osi. Si mon pou fer en pti re koleksyon la, nou annan plis ki 70 *estate* ki nou pe ganny sa *challenge*.

E nou pe sey, pa pe seye nou pe pouse pou nou kapab adres sa bann *estate* enn par enn. I pa sitan fasil *but* nou determinen pou nou kapab rod solisyon pou sa bann *estate*. Prenon kont poudir *PUC* napa sa rezo, sa *network* son sistenm desarz kot i kouver Mahe.

Nou ti ava swete ki *PUC* i kouver Mahe. Konnen poudir zot mersi Bondye ki nou kapab adres sa problemn *once and for all*, be i pa leka. E nou bezwen rod bann problemn lokalize pou sak *estate*.

Mon kontan pou kapab dir ou ki Baie Lazare nou'n kapab adres li. En problemn ki ti la bon pe letan kot *PMC* ti pe war li pe ponpe tou le semenn 3 fwa par semenn.

Nou'n kapab adres sa. Kan Tobrouk nou'n adres li *partly*. E Port Glaud nou pa ankor *sort of* pou nou vwar li dan son totalite. Regarde teknikman. Selman nou pou vini Port Glaud pou sa enn de *estate* ki nou pe ganny problemn avek.

E mon pa kapab dir ou nou pou kapab *solve* li la, la, la. Selman nou pou rod solisyon pou li, pou Port Glaud. Parey nou pou fer pou lezot *estate*. Mersi Mr Speaker.

MR SPEAKER

Klarifikasyon?

HON EGBERT AGLAE

Klarifikasyon wi. Si nou pou regard dan liv Bidze sirtou 2021. I annan 7 proze kapital *STP*. Petet *PS* Barbe i pou okouran. 7 proze.

E par lanmenm la dan sa 7 ki ti pe bidzete i enn pou Port Glaud. Sa ki mon pe demande. Pa en letid pou al gete la mon. Ti annan en komitman ki annan 7 ki ti pou ganny fer nasyonalmann e enn ladan ti pou Port Glaud.

Mon anvi konnen si sa pou materyalize se tou?

MR SPEAKER

Sorry please? Minis ou pare pou en repons lo la? Eskize mon pa swiv kestyon Onorab Aglae. Minis ou repons.

Ale proceed.

MINISTER BILLY RANGASAMY

Onorab mon krwar mon pou bezwen petet pran en pti rankont avek ou personnelman pou mwan vwar sa size. Nou ava diskite nou ava rod fason.

Tou fason parey mon dir nou pou tap tou pou tou pou nou regle sa bann problemn. *PMC* pe rod lot kalite solisyon alternativ. Zot annan en sistenm *birock* ki zot pe travay lo la ki pran mwens lespas dan vilaz. Par egzanz mon krwar zot in fer sa dan Kan Tobrouk apre Dame Le Roi.

So par ler lespas napa, me selman i annan bann alternativ ki nou pe rode, pou nou rod solisyon pou nou kapab egzekut sa bann proze dan en dele letan ki rezonnab.

Be selman toudmenm lo ou ka spesifik pou Port Glaud, annefe mon anvi vin vizit ou pou nou fer enn de, get enn de bann sityasyon lo ou teren, lo ou kote osi. Parey lezot koleg Onorab osi atraver latab. Nou ava kapab petet analiz sa pwen.

Mersi bokou.

MR SPEAKER

Mersi Onorab Loizeau, ou kestyon ti lo *sewage treatment plant*?

HON NORBERT LOIZEAU

Mersi Mr Speaker mersi. Vi ki nou pe koz lo *STP* desarz, vi ki bann landrwa parey pou lemoman Baie Lazare kot pa ankor met sa sistenm, eski *PMC* i kapab dir nou eski vre zot pou annan en kanmiyon ki pou ponp sa bann dil an atandan ki parey *Leader* Lopoziyon ti dir lot fwa?

Si vreman zot pou annan sa gro kanmiyon ki pou ponp sa bann zafer ana tandan ki *STP* pou ganny enstale dan sa landrwa? Mersi.

MR SPEAKER

Mersi. Nou pe depas en pe kestyon lo Port Glaud. Me ou'n ariv lo - Silvouple!

Nou'n ariv lo *Treatment Plant*. Minis mon ava apresye si ou adrese.

MINISTER BILLY RANGASAMY

Mr Speaker mon pou les, sa i en vilaz *PMC*. I en travay ki *PMC* pe fer. Mon ava prefere ki san ki mon enterfer dan zot larepons zot ava partaz ek nou e Onorab kot nou'n arive lo sa pwen. Mersi.

MR SPEAKER

PMC ou annan en repons?

DEPUTY CEO STEVE MUSSARD

Mersi Mr Speaker. Mersi Onorab Loizeau pou ou kestyon.

Lentansyon se wi nou ti met en propozisyon avek *Board* pou nou kapab annan nou prop kanmiyon ponpe.

Akoz nou ti pe fer sa? Ler nou - sirtou ler mon ti antre lofis nou pa analiz bann kou ki *PMC* i pas ladan - Sorti 2019, 2020, 2021, 2022, nou war parey mon'n dir ou zis mon tourn mon repons ki mon ti dir Onorab Aglae avan. Nou annan plis ki 70 *estate* ki annan *challenge sewage*. E tou le 70 *estate* la, ki nou fer nou, nou zis ponpe. Pey kanmiyon, pey en servi. Pey bann kontrakter prive pou ponpe.

Konmsi la, ler ou gete la dimoun ki reste lo *estate* zot vini se zot servi zot, fer zot bezwen desarz, bennyen. Delo i ale dan en tenk, *PMC* i pase i ponpe.

Konmsi pou mwan sa i en pti pe en krim. Konmsi ou konnen nou pe depans sibstansyelman. Mon pa pou al dan detay lo kou par lannen. Selman mon kapab dir ou sif in monte.

E nou pe pran de milyon e milyon pou nou zis ale ponpe, ponp desarz kot dimoun pe servi. Ou bezwen gete ki manner, ou bezwen balanse. Ou bezwen gete ki manner ou kapab fer sa *process* mars en pe pli efektiv.

Cost effectiveness pou pe koze la. I pa vedir ki *PMC* i annan lentansyon rod 2 kanmiyon ki nou pe *solve* tou problemm ponpe lo Mahe. Sirtou lo Mahe en, sa 70 *estates*.

I enposib. Nou pou *still* bezwen bann kontrakter prive. Sa i inevitab sa. Nou pa

pou kapab zanmen krwar ki *PMC* i aste 2 kanmiyon personn pa pe ganny travay ankor. Pa pou arive sa. I enposib parey mon dir ek ou.

So lentansyon se ki, ki nou ti met avek *Board* se nou ti zistifye e *cost savings* ki i pou anmenn *PMC*. Ki nou kapab pran sa larzan retourn bann lot proze fer nou manda. Renouvle bann *estate*, gard, *maintain* sa bann *estate* dan en pli bon leta. Gard sa larzan en pti pe plis.

Nou pou *still* parey mon dir ek ou, nou pou *still* annan sa konponan. Sa porsyon kot nou pou bezwen rod bann kontrakter prive. Mersi Mr Speaker.

MR SPEAKER

Mersi *Deputy CEO*. Onorab William nou'n depas size soz la. Eski ou ankor lo *treatment plant*? Silvouple.

HON WAVEN WILLIAM

Mersi Mr Speaker pou ou *indulgent*. Mr Speaker laport in ouver so mon pou antre en kou.

Mr Speaker sa size koneksyon avek *treatment plant*, mon anvi demann ek Minis par lefe ki ou la. I annan en laponp nou pe espere pou konekte bann zabitan *ex-Troyan* avek sa *sewage treatment plant* Barbarons. Silvouple pe al lo 3an la, sa laponp pe ganny fer? Pe vini? Ki bor i ete pou lemoman? Mersi.

MR SPEAKER

Mersi. Minis ou annan en klarifikasyon lo la?

MINISTER BILLY RANGASAMY

Mr Speaker en bon kestyon ki Onorab in partaz ek nou. Mon a les *CEO* Lazans Lenfrastriktir eksplik nou kot nou'n arive. Mersi bokou.

MR SPEAKER

Thank you. CEO.

CEO JITESH SHAH

Mersi Mr Speaker. Mersi Onorab pou kestyon. Onorab nou'n ganny pa mal difikilte avek sa laponp. Selman nou'n ganny dir aprezan par *supplier* poudir sa laponp pou ariv dan pei *hopefully within 6 weeks*.

Selman nou annan en lot laponp ki fek antre dan pei 2 semenn pase. So nou pe al servi sa tanporer pou nou kapab fini

louvraz laba akoz i reste zis pou nou fini konstriksyon sa tenk.

So, i ava ed nou pandan sa 6 semenn pou nou fini sa konstriksyon. Sa lot laponp ki'n vini pou en lot proze *actually*. Nou pe al servi li tanporerman la zis pou nou kapab fini sa louvraz *and then* nou ava transfer li lo son lot proze *when* sa enn nouvo i vini, pou nou kapab met sa *pump station operational*.

So nou pe targete *that within 6-week time* tou keksoz i fini laba. Mersi.

MR SPEAKER

Mersi *CEO*. Mon asire Onorab in apresye sa bon nouvel.

Bon nou pou bouz lo prosen kestyon. E nou annan en sanzman delegasyon zofisye. Mr Steve Mussard nou pou remersye li pou son partisipasyon e nou pou demann Mr Gerard Hoareau *Acting Principal Secretary Lands* pou antre.

Bon bonzour e byenveni Mr Gerard Hoareau *Acting PS Lands*. Nou pe pran kestyon limero 5 ki dan non Onorab Rocky Uranie. Me dan son labsans otorize son kestyon pou ganny demande par Onorab Churchill Gill.

HON CHURCHILL GILL

Mersi Mr Speaker. Bonzour Minis k ou delegasyon. Kestyon Onorab Uranie i lir koumsa: -

Eski Minis i kapab donn en detay nou Lasanble ki zistans sa demars ki ti pe ganny fer pou rode e fer later *land bank* lo La Digue vin a dispozisyon, bann Digwa ki napa later e ki anvi aste en kare? Mersi.

MR SPEAKER

Mersi. Minis repons silvouple?

MINISTER BILLY RANGASAMY

Mersi Mr Speaker pou sa kestyon. Mon ti pe adres sa kestyon direktman avek Onorab. Me atraver ou Onorab Churchill mon ava fer mon mye posib pou mwan partaz en pti pe sityasyon La Digue avek Lasanble.

Mr Speaker, sa kestyon i tre enportan. E mon le avek tou senserite enform sa Lasanble e tou zabitan La Digue, ki mon Gouvernman i konsyan ki nou annan en defi lo size lozman e later La Digue. Later Gouvernman.

Si mon tras en pti pe demann. Nou pe koz nou en demann 71 kare later e ladan 3 in kalifye anba sistenm pwen 2020 - *LPS 2020*.

E i annan 80 ka lakaz abordab. E dan sa 80 ka nou annan 24 zabitan ki pe pey zot *HSS*. So an tou nou annan en bon santenn dimoun aktiv pe rod en solisyon lozman La Digue.

Se pou sa rezon ki mon Minister pe seryezman tap tou pou tou, pou rod bann solisyon ki soutenab.

Mr Speaker an vi dyalog ki Minister ti'n fer avek distrik an Oktob lannen pase avek Onorab Uranie ki ti *involve* osi, bann letid teknik ek bann zofisye distrik, Ladministrasyon Distrik letid teknik ki nou'n fer ti montre ki sa proze *landbank* dan sa rezyon Sitadel i pa vyab.

I pa vyab finansyerman. E i annan bann konplikasyon lanvironnman ki vin avek, eksetera.

Malerezman Gouvernman parey mon'n dir boner napa kare later rezidansyel alternativ ki soutenab pou devlope lo La Digue. Sa i en fe Mr Speaker.

Par kont pou nou oner nou komitman pou sa detrwa dimoun ki'n kalifye anba sistenm pwen 2020, Minister pe eksplor posibilite environ 4 a 6 kar later adisyonnal dan zanmerant proze lakaz 24/24. Pres dan *border* Union Estate - dan sa rezyon la.

Mr Speaker, mon asire ki ou ava dakor ek mwan ki mon Gouvernman napa gran swa. Koman en Gouvernman responsab pou bezwen met plis lanfaz pou aste later prive, me ki fer sans pou devlope dan en fason abordab. Parske nou pe servi larzan *taxpayers*. Dan en fason abordab pou nou ed plis fanmir Digwa kot i posib.

Dan sa menm loptik, mon ti ava kontan profite pou envit okenn propriyeter prive ki serye lo La Digue ki zot lavant i kler e zot teren i rezonnab, pou silvouple konsidere vin devan e apros Gouvernman e nou ava ganny en dyalog serye.

Mr Speaker, mon swete ki Onorab Uranie e bann lekip dan distrik, bann zabitan ki pe ekout mwan, e bann zofisye teknik dan distrik, i ava kapab ed nou ek sa demars.

Zisteman Mr Speaker nou espekte finaliz bann prosedir neser pou aste en morso later prive, pou ede soulaz sityasyon

lozman bann Digwa tre byento. E mon aprann ki sa lavant pe byen ale e byento nou ava finaliz li.

Osito ki mon Minister i konplet sa tranzaksyon later Mr Speaker, mon Minister i ava dan en pli bon pozisyon pou planifye e prezant en bon proze, an konsiltasyon avek distrik e bann Lazans konsernen. E nou ava kapab devlop sa proze ansanm.

Sa nou santi i ava kapab omwen ed nou soulaz en swasantenn zabitan La Digue. En 60tenn fanmir La Digue ki pe espere en pake lannen. Parey lapros mon Gouvernman dan tou distrik mon anvizaze ki nou travay ansanm e konzwentman devlop en zoli proze pou La Digue.

En proze lakaz abordab e *mid-range condos*. Avek bokou leksitasyon mon konvenki ki sa lapros e sa proze, i ava ed nou regle lamazorite problemn lozman La Digue parey mon'n fer resorti en 60tenn fanmir ki byen merite e ki malerezman pe espere pou en bon pe letan lo La Digue.

Mersi Mr Speaker.

MR SPEAKER

Mersi Minis. Onorab Gill ou annan siplemanter, pwen?

HON CHURCHILL GILL

Mersi Minis pou ou larepons. Minis parey ou'n fer sorti i annan 100 *active application*. E sa morso later mon ti prezan dan en miting kot ou ti anons sa, ti fer Praslin avan. Kot *MNA* La Digue ti desann ek Lyezon.

Ou'n fer konpran dimoun La Digue ki ler sa later prive i fini ganny aste ou pou annan apepre 60 fanmir ki pou benefisyé, e sa i pou reste 40.

Eski ou kapab fer dimoun La Digue konpran sa bann ki pa pou gannyen dan sa 60, ki ou Minister i anvizaze fer pou zot dan le fitir? Sa i enn.

Apré dezyenm, eski sa bout kot ou'n dir i difisil, i *challenging* pou kapab devlope, eski ou pe koz sa bout later Grand Anse?

Kot li ti deza annan serten travay ki ti pou komans ganny fer, me selman ziska konmela i pa ankor ganny fer? Mersi.

MR SPEAKER

Mersi Onorab. Minis ou pare pou adres sa 2 pwen?

MINISTER BILLY RANGASAMY

Wi. Mersi Mr Speaker. Mersi Onorab pou sa kestyon. Pou premye parti kestyon mon ava reponn mwan menm. Dezyenm parti kestyon kot i konsern sa later ki ou'n mansyonn dan rezyon Grand Anse mon ava les *PS* Barbe oubyen si i nesese *Acting PS Lands* Mr Hoareau i ava reponn.

Me parey mon'n fer resorti dan mon larepons, an vi ki napa later Gouvernman, i pou nesese pou nou ganny lasistans en bann propriyeter prive. Nou ava tap tou pou tou pou regle sa 60tenn.

Bann ka ki merite ki lontan zot pe espere. E sa lezot balans dizon en 40tenn avek bann nouvo tranzaksyon later ki nou ava kapab espere fer avek serten propriyeter prive. Si i rezonnab i ava ed nou annan en dezyenm faz solisyon pou zot osi.

Sa nou plan Onorab en? Mersi bokou.

MR SPEAKER

Mersi. Lekel ki pou adrese prezan, *PS*? Byen.

PS DENIS BARBE

Mersi Mr Speaker. Mon osi anvi aport latansyon Onorab avan mon reponn sa dernyen bout, poudir i annan en serten group bann dimoun La Digue ki pa pe aktivman pey zot *Scheme*.

So si zot pa pe aktivman pey zot *Scheme* nou pa pe kapab *plan* pou zot. Nou bezwen *plan* pou bann dimoun ki aktiv e bann *plan* ki annan – bann ki annan laplikasyon.

So, ti ava bon nou ankouraz zot osi. E mon plis ki sir ki distrik osi pe fer li avek nou bann *housing officers*. Pou zot kapab pey zot *Scheme* pou nou kapab konnen egzaktaman ki total lanpler, bann ki pa pe peye, ki pa enterese, nou ava konnen poudir nou pa bezwen fer en provizyon pou zot.

Dan sa ki konsern sa porsyon later Grand Anse Onorab. E nou'n fer serten travay, en serten *desktop analysis*. Nou pe war poudir baze lo kantite kare ki nou pou kapab gannyen avek kou konbyen i pou kout nou, pou servi sa bann *plot* i pa pou vyab.

So nou pa pou kapab kontinyelman eksplor li. Nou bezwen met resours ek lenerzi dan lot alternativ.

MR SPEAKER

Mersi. Ou annan en klarifikasyon Onorab? Ale.

HON CHURCHILL GILL

Klarifikasyon se pou sa bout later prive ki an negosyasyon. Si zis petet ou kapab donn sa bann dimoun en nide dapre ou baze lo diskisyon ki pe ale, dan konbyen letan ankor ki i posib pou konklir sa tranzaksyon, pou zot kapab ganny en nide e ki kantite letan zot pou kapab espere? Mersi.

MR SPEAKER

Mersi. Mon mazinen *PS* i ava pran sa rekomandasyon. Ou le adres sa la *PS*? Wi?

PS DENIS BARBE

Tou negosyasyon nou'n fini ganny fer. Nou'n tonm dakor lo bann kondisyon ki enkli pri.

E lo kote sa *private owner* in fini *sign-off*. Dosye pe desann kot nou pou nou kapab siny lavant e pou li ganny anrezistre.

E sa i ava permet nou ganny lokipasyon *of* sa teren pou nou kapab komans sa prosedir konsiltasyon an lyen avek konsepe proze ki nou, nou annan lo sa later.

MR SPEAKER

Mersi *PS*. Bon nou pou reste lo *landbank* La Digue silvouple. Onorab Woodcock ou annan en kestyon lo la?

HON WAVEL WOODCOCK

Wi Mr Speaker bonzour. Bonzour Minis, delegasyon. Tou Manm e tou dimoun a lekout.

Minis mon kestyon i kot i konsern sa propriyete prive. Eski Minis i asire ki sa later ki'n ganny idantifye, pa pou ganny konteste par bann Digwa konmkwa i later zot granpye ki Gouvernman ti pran apre koudeta 1977?

Aprè mon dezyenm kestyon i Minis ou'n fer resorti poudir i annan en *challenge*. Gouvernman napa ase later e sirtou lo La Digue.

Mon kestyon i - i annan anviron mon krwar en karant ekek bout later ki pe ganny vann. E sa i enkli lo La Digue osi. Sa later i pou parti *United Seychelles* ki zot pe rod vann.

Mon kestyon i eski ou pa kapab antre dan en negosyasyon avek sa parti pou sa bann bout later ki zot pe sey vann, petet zot kapab rann Gouvernman, par lefe ki i annan en bann ki zit in ganny pou selman R1? Mersi Mr Speaker.

MR SPEAKER

Mersi Onorab. Minis ou annan repons?

MINISTER BILLY RANGASAMY

Mr Speaker, mersi pou sa kestyon Onorab Woodcock. Mon ava les *PS* Barbe tras en pti pe sa tranzaksyon pou sa later, ki nou pe al finaliz son bann tranzaksyon sinyatir eksetera, pou nou transfer. Mon ava les li eksplik nou aköz in pas dan en prosesis.

Aprè sa dezyenm parti kestyon i pa en kestyon mon pou kapab reponn dan Lasanble la.

Parske i annan serten konponan investigasyon lo sa bann later. E mon pa pou dan en pozisyon pou mwan pronons mon lekor lo la ozordi. Mersi bokou.

MR SPEAKER

Mersi Minis. *PS* Barbe i ava pran sa premye pwen.

PS DENIS BARBE

Mersi Mr Speaker. Tou tranzaksyon ki Gouvernman i pe antreprann sirtou lo kote pou aste later, nou bezwen satisfè nou lekor poudir sa dimoun ki pe apros Gouvernman i annan en *clear title*.

I annan en *clear title* e sa verifikasyon i pa zis fer lo kote kot Minister, i osi koman nou'n noter *Attorney Zeneral* osi i bezwen satisfè son lekor poudir wi nou'n ganny proteze dan bann tranzaksyon ki nou pe fer. *Thank you*.

MR SPEAKER

Mersi *PS*. Nou a termin la pou sa kestyon. E nou ava prosed avek kestyon limero 6 dan non Onorab Audrey Vidot.

HON AUDREY VIDOT

Mersi Mr Speaker. Minis kestyon i lir *comme swivan*;

Eski Minis i kapab enform sa Lasanble ki'n arive avek sa plan devlopman lo limero parsel V5150 ki 7144met – kare dan distrik Roche Caiman?

E pou lenformasyon piblik nou pe koz kot *ex-Kazern* ti ete Roche Caiman.

MR SPEAKER

Mersi Onorab. Minis repons silvouple?

MINISTER BILLY RANGASAMY

Mr Speaker mersi. Mon remersye Onorab osi Vidot pou son kestyon.

Mon le enform Onorab ki sa kare later parey in fer resorti ki nou apel *ex-Fiennes* oubyen *ex-Kazern* i enn ki delika.

I en ka aktiv ki ankour Ankour an se moman. E kot i konsern plan devlopman, wi mon konpran ki ti annan en plan devlopman lo sa sit. Mon Minister ti pe travay lo la.

Me anvi ki sa ka i Ankour e sa ka i ankour aktiv Ankour, pou lemoman e tou sa kantite travay ki Minister i annan pe sey devlop bann nouvo proze, Minister pa pe met okenn resours adisyonnèl, teknik, pou fer plis travay lo la. Akoz nou pa konnen ki larout i pou pran finalman.

Par kont nou ti ava voudre kapab regle sa e devlop en keksoz pou distrik Roche Caiman dan sa rezyon lavil la, an deor lavil eskiz mwan.

Me i pa posib pou mon pronons mon lekor ozordi lo sa size. I date en bon pe letan. Malerezman Mr Speaker parey mon fek dir mon pa pou kapab fer plis komantr lo la an se moman. Mon a dir ou mersi Mr Speaker.

MR SPEAKER

Mersi Minis. Onorab ou annan siplemantr?

HON AUDREY VIDOT

Yes, Mr Speaker. *Minister* tou an respektè ou pozisyon lo sa sityasyon, mon konpran. Me konsern ki pe ganny souleve par Roche Caiman kominote, se ki plizyè dimoun pe konplènt ki sa landrwa i ganny abandonnen e i pe soutir en kantite aktivite anti-sosyal.

E nou pe regarde nou konpran poudir dan lepase Minister ti pran responsabilite pou *maintain* sa landrwa.

Me antretan ki ou'n dir ki zot pa kapab fer okenn devlopman, lekel ki pou pran responsabilite pou *maintain* sa landrwa e pou anpese ki i annan sa bann aktivite anti-sosyal ki ganny soutire dan sa landrwa? Mersi.

MR SPEAKER

Mersi Onorab. Minis eski ou kapab adrese sa?

MINISTER BILLY RANGASAMY

Wi Mr Speaker mon kapab adrese, me an vi ki *PS Barbe* ti ava oparavan ti konpran en pti pe istorik sa *site*. Mon ava prefere les li eksplik nou lo la. Mersi Mr Speaker.

MR SPEAKER

Thank you. PS Barbe.

PS DENIS BARBE

Mersi Mr Speaker. Onorab dernyen netwayaz ki nou ti fer lo *site* mon krwar i 2017. E sa letan *advice* legal ki nou ti'n gannyan baze lo staz ka ki ti'n prononse devan Lakour, nou ti dan lokipasyon sa teren.

Savedir nou ti kapab antre fer serten netwayaz. Nou panse pou adres en pti pe ou konsern, nou bezwen *still* ganny *advice* legal pou gete si nou kapab antre pou fer en pe travay, san ki i *prejudice* en pti pe sa ka ki nou annan devan Lakour.

So nou ava rod en pti pe gidans legal avan. Si i posib nou ava antre nou ava gete. *Thank you.*

MR SPEAKER

Mersi *PS*. Bon nou termin la lo sa kestyon. mon annan en dernyen kestyon. Mon remarke ki Mr Gerard Hoareau pa lo lalis delegasyon. Me selman i *welcome* pou li reste akonpany nou, pou sa dernyen kestyon. I dan non Onorab Francois Adelaide.

HON FRANCOIS ADELAIDE

Ankor enn fwa mersi Mr Speaker. Minis mon kestyon i al koumsa;

Eski Minis responsab pour Lakaz i kapab donn detay Lasanble lo dezyenm faz proze konstriksyon lakaz *ex-Hunt*, Anse Aux Poules Bleues, Baie Lazare? Mersi.

MR SPEAKER

Mersi Onorab. Minis.

MINISTER BILLY RANGASAMY

Mersi bokou Mr Speaker. Mersi Onorab pou ou kestyon. Onorab parey ou konnen provizyon in ganny fer dan Bidze 2023 pou sa dezyenm faz proze *ex-Hunt*.

Annefe proze sa lannen i en proze ki, en Bidze ki eksitan. Nou annan en kantite proze atraver diferan distrik.

Me kot i konsern *ex-Hunt* an se moman sa proze in fini ganny soumet kot Lotorite Plan. E ti annan serten pti lamannman ki nou ti bezwen fer par bann komantr ki Lotorite Plan in partaz avek nou.

E Lazans Lenfrastriktir pou travay lo la, pou rann sa proze pli soutenab dan tou son laspe.

Menm i en proze Gouvernman nou *still go through that* prosesis avek Lotorite Plan pou nou ganny zot komantr sorti kot diferan lazans.

Nou'n osi konplet bann desen enzenyer pou sa proze e nou QS pe prezan prepar bann sa ki nou apel *Bill of Quantities*.

Savedir tou keksoz pe get normal pou nou kapab al lo *tender* an Avril. Sa i anliny par kont avek travay ki SIA ti annan, son program travay *timing wise*. E Gouvernman pou 2023.

E parey mon ti'n fer resorti nou annan en program lakaz, konstriksiyon lakaz. Bann lozman *social housing, mid-range condos*. Vreman eksitan ki nou pe pous for. Me nou annan en program travay dan ki sekans zot vini e *ex-Hunt* li par kont mon kapab konfirm ou i lo target, i lo program.

Mersi Mr Speaker.

MR SPEAKER

Mersi Minis. Siplemantr Onorab Adelaide.

HON FRANCOIS ADELAIDE

Yes, Mr Speaker. Minis petet pou lenformasyon piblik sirtou bann zabitan Baie Lazare. Eski ou kapab dir nou apepre konbyen *unit* nou espekte gannnen dan sa dezyenm proze?

E vi ki i ti annan, mon konnen poudir Gouvernman i annan en stratezi ki zot donn en pe lo kota nasyonan mon krwar ler ou fer bann proze lakaz.

E vi ki nou Baie Lazare i annan apepre pre 3an 4an nou pa ankor ganny okenn proze lakaz. E nou annan en pti lalis ki pa tro ptipti.

Eski petet nou pou kapab gard tou nou lakaz pou safwasi? Mersi.

MR SPEAKER

Mersi Onorab. Minis ou repons *Please*.

MINISTER BILLY RANGASAMY

Mersi Onorab pou ou kestyon. Mon zis kapab konfirmen i annan 16 *unit* an tou. I annan 8, de lasanm e 8, trwa lasanm.

Sa size *national quota* i enn ki en batay toultan letan nou pe fer alokasyon. I enn ki nou ti ava kontan kontinyen

ankouraze. Me prenon kont ki parey ou'n fer resorti i fer detrwa lannen, ou pa ankor ganny en proze dan ou distrik.

Tousala i bann keksoz ki nou kapab balanse. Be par kont an zeneral mon kontan ankouraz tou bann Onorab, bokou zot kote tou lede kote latab in partaz peryod alokasyon lakaz avek nou dan Komite.

I annan toultan en batay. Me solman nou bezwen ed kanmarad kot i posib vi ki i annan sa *National Quota Scheme* an plas.

Fotespere nou pa ganny tro bokou batay letan nou ariv kot ou Onorab. Mersi bokou. Mersi Mr Speaker.

MR SPEAKER

Mersi. Wi ale si ou annan en klarifikasyon.

HON FRANCOIS ADELAIDE

Wi, wi. *Ok* Minis mon dakor. Be selman akoz mon pe dir ou sa. Dapre konpran i annan 2 ki pe sorti dan sa premye faz akoz i annan en pe problem avek zot lokasyon mon krwar. Mon pa konnen si ou okouran.

So savedir nou annan forse 14, 14 lakaz. E petet si ou kapab dir nou pou donn nou en pti gin lespwar Minis. Mon konnen ou'n dir *tender* pe al, tre prosennman pe vini. Petet kan nou espekte vwar konpilsyon sa proze e *at least* i ava donn bann dimoun en pti git lespwar e zot ava konnen ki byento pou al dan en lakaz? Mersi.

MR SPEAKER

Mersi Onorab. Minis dat konpilsyon?

MINISTER BILLY RANGASAMY

Wi, wi mon ava les *CEO* Lazans Lenfrastriktir repons sa Mr Speaker avek ou permisyon.

MR SPEAKER

Mersi. *CEO*.

CEO JITESH SHAH

Mersi Mr Speaker. Mersi Onorab. Onorab nou pe prevwar sa koman en proze 10 mwan. So parey nou'n dir *tender* nou pe espekte pou komanse an Avril.

Si tou keksoz i al byen avek prosedir *tender* nou pe espekte komansman Zen nou pou annan enn kontrakter lo *site*. So si nou *work forward from there* avek 10 mwan nou pe get Avril lannen prosenn pou sa proze konplete.

MR SPEAKER

Mersi. Mon annan enn de bann siplemanter. Onorab Pillay.

HON SEBASTIEN PILLAY

Mersi Mr Speaker. Premye siplemanter i konsern lefe ki sa bann lakaz pe ganny fer Baie Lazare, eski dan zot lankadremen konsider *national quota*, zot pe konsider bann dimoun ki esansyelman viv dan sa rezyon an se ki konsern *national quota*?

E dezyenman an relasyon avek sa bann lamannman ki zot in fer pou plan proze, eski sa bann lamannman pou osi fer ki nou *avoid* ganny bann problemn parey nou'n gannyen kot *ex-Pool Housing Estate* ki konsern sirtou bann size desarz, bann size-

Bann problemn ki leve apre ki kout en problemn lizyenn dan bann *housing estate*. Par egzant kot *ex-Troyan* ozordi nou *still* annan sa basen ki annan delo ladan ki pe koz problemn pou bann zabitan.

So eski sa bann lamannman in enkorpor sa bann keksoz ladan? Mersi Mr Speaker.

MR SPEAKER

Mersi Onorab. Minis repons silvouple?

MINISTER BILLY RANGASAMY

Wi Mr Speaker i annan en laspe teknik lo sistenm *design sewage* eksetera. Mon ava prefere *CEO SIA* i reponn sa keston. Mersi bokou.

MR SPEAKER

Mersi. *CEO*.

CEO JITESH SHAH

Mersi Mr Speaker. Mersi Onorab pou keston. Mon pe reponn sa dezyenm bout en, premye bout lo *quota PS Barbe* i ava pran.

Lo kote bann sistenm desarz, lo tou nou bann nouvo proze ki nou pe fer, nou pe sey nou mye. *Unless* nou pe fer zis en blok en landrwa, nou pe fer nou mye evite pou nou servi bann sistenm *septic tank* avek *soakaway*.

Laplipar *estate* nou pe, swa nou pe enstal en *STP* oubyen nou pe konekte kot i annan en *network PUC* nou pe konekte direktman lo *network PUC*.

Sa i *obviously* nou opsyon prefere. Akoz i pa vin avek okenn *maintenance*, oubyen okenn lezot konplikasyon.

Parey si mon pou koz par egzant lo sa enn *ex-Pool*. *Ex-Pool* li menm i annan en *STP* ki ti ganny fer avek faz enn. Li i ti ganny *design* pou sa faz *2 as well*. I ti ganny *design* pou sa de blok an plis.

So anefe enn fwa ki sa de blok i konekte lo la nou pou aktyelman war ki son performans pou *actually improve*. Akoz son *flow* pou baze lo son *design capacity* ki i ti ganny *design*.

So pou sa enn ki la i deza annan provizyon. Pou bann larestan ki nou pe fer - parey mon'n dir nou pe sey nou mye pou nou fer swa *STP* oubyen konekte li direk lo laliny *PUC* kot nou fer ou bann proze. Mersi.

MR SPEAKER

Thank you. Lekel ki pou. *PS Barbe* pou kontinyen?

MINISTER BILLY RANGASAMY

Mr Speaker mon ti ava zis kontan ranforsi avek Lasanble osi, ki mon'n eksprim mon konsern avek *PUC*, ki mon panse i ti plis ki ler pou vwar nasyonalman mannyer nou kapab vremen pous en pe lo bann *regional sewage treatment plant*.

Parske sa i enn nou bann defi primer ki mon vwar dan pei fransman verite. E mon konnen *PUC* i annan son *master plan*. Bokou fwa in konplikasyon bidzeter.

Me si nou ti kapab komans parey zot pe fer La Digue, parey pe fer La Digue vremen kontan. E anefe sa par kont pe ed nou kapab devlop sa sit La Digue, ki nou fek koz lo la taler lo en fason pli efikas.

Parske nou kapab konekte, nou kapab tir bann pli pti kare later sa pti bout pou *landbank*. Parske nou kapab konekte lo en sistenm *network*, ou konpran mon ou?

E kot i posib nou pe fer sa osi vin en realite. Par egzant Point Larue Onorab Gabriel i konn byen. Nou pe konekte sa *Mirabelle Estate* to sistenm *PUC*.

So si nou ti kapab ganny plis sa sistenm rezyonal dan pei ti ava ed nou *move* lo lot nouvo menm fason ki nou kapab devlop nou bann teren.

Pou osi i en defi finansyer. I pa en keksoz fasil dir. Me i kler ki en konponan ki nou bezwen sey met nou kouraz ladan pou nou kapab fer li vin en realite. Malgre nou

ava bezwen fer li par rezyon enn par enn. be nou bezwen fer li.

Mr Speaker lo dezyenm parti lo *national quota*. I en kestyon ki'n leve mon ava les *PS Barbe* ki en teknisyen dan sa laliny pou eksplik sa. Mersi bokou.

MR SPEAKER

PS silvouple?

PS DENIS BARBE

Mersi Mr Speaker. Onorab mersi pou ou kestyon. Kota nasyonal nou pli ou mwen get en pti pe stratezi ki mannyer nou apros li. Setadir ler nou pe fer nou bann miting preliminar pou alokasyon nou bezwen get en pti pe kantite *case* ki nou annan en pti pe partou, partou ki kritik.

E an menm tan get en pti pe dan *pipeline*, akoz nou deza konnen ki bann proze ki nou annan, ki bor zot ete. Eski sa bann *case* kritik ki nou annan pou kapab espere ouswa non? *And then* nou planifye li en pti pe.

Lanmenm ler ki ler nou pou zwenn avek Lotorite Distrik;- avan nou *even* komans prosedir alokasyon, pou nou kapab tonm lo en *consensus* konbyen lakaz nou pe keze dan kota nasyonal *or not*.

So ler ou pran kont son bann fakter i pa neser kot nou bann dimoun pou ganny plase par rezyon dan kota Nasyonal akoz i annan ki *desperate* pou solisyon.

So nou tant pou *focus* en pti pe lo solisyon ki pli, ki mars en pti pe pli byen anliny avek nou bann proze ki nou annan.

Dezavantaz avek sa Onorab avek Lasanble se ki ler ou'n stabiliz fanmir apre i annan en lot proze dan distrik respektif, sa dimoun i demann pou tournen. E sa i vin avek en kou ki *PMC* ennlér i abzorbe.

Me selman pou reponn ou kestyon Onorab sa lapros avek kota nasyonal. *Thank you*.

MR SPEAKER

Mersi *PS*. Avek sa nou'n ariv a lafen nou sesyon kestyon. Mon remersye Minis ek son delegasyon pou zot partisipasyon. E bann Manm pou zot kestyon.

Lasanble i ava pran poz e nou ava rebran travay 2er 15.

(BREAK)

MR SPEAKER

Bonn apre midi byenveni dan Lasanble, Vis-Prezidan Ahmed Afif e Msye Benjamin Choppy *PS* dan Departman Lenformasyon e Teknolozi Kominikasyon, Mr Jeffrey Dogley, Director Zeneral dan Divizyon Kominikasyon. E Mrs Irene Sirame *Legal Draftsperson* dan *AG's Office*. Mersi pou zwenn nou pou konsiderasyon *Communications Bill*. Onorab Sandy Arissol ou ki pou prezant Mosyon pou *Second Reading*?

Un instant. Ou annan en *point of order* Onorab Pillay?

HON SEBASTIEN PILLAY

Pa vremen Mr Speaker, me mon ti oule zis alert ou pou demann *staff* teknik pou regarde si nou sesyon antye bomaten in fini ganny *uploaded* lo *YouTube*. Akoz i annan dimoun ki'n *call* mwan, zot pe ganny en pe difikilte e ou bezwen *actually search* pou kapab ganny sa dezyenm parti sesyon.

Akoz apre premye sesyon apre sa lenteripsyon teknik ou'n demann bann dimoun ki pa'n ganny sans swiv pou zot swiv *recording* Lasanble. Zis pou ki nou fer sir poudir bann dimoun ki pe ekoute i kapab swiv, mersi.

MR SPEAKER

Lo mon kote sel keksoz ki mon'n fer, mon'n telefonn *Deputy CEO SBC* mon'n eksplik li poudir sa ti arive, e in promet mwan ki i pe al regarde akoz e kote lafot in arive.

Mon pa'n ganny plis kominikasyon avek sa. Madanm Clerk i kapab *follow-up* pou gete si tou zafer i annord. Mersi tou zafer i annord i paret. Onorab Sandy Arissol i a prosede avek Mosyon.

HON SANDY ARISSOL

Mersi Mr Speaker. Bonn apre midi Vis-Prezidan avek ou lekip, bonn apre midi tou dimoun ki a lekout.

Mr Speaker parey nou *Standing Orders* i fer provizyon, anba *Order 69 (2)* mon oule *move* ki *Bill Communications Bill, 2022* i ganny lir en Dezyenm Fwa. Mersi.

MR SPEAKER

Mersi. Mon a ganny segonnman pou sa Mosyon silvouple. Onorab John Hoareau.

HON JOHN HOAREAU

Bon apre midi Mr Speaker. Mon pe segonn sa Mosyon. Mersi.

MR SPEAKER

Mersi. Mon ava envit Vis-Prezidan pou prezant *Bill* avek Lasanble.

THE VICE-PRESIDENT AHMED AFIF

Mersi bokou Mr Speaker. Bonn apre midi Mr Speaker, *Leader* Lopozisyon tou ban Manm Lasanble, tou dimoun a lekout.

I fer mwan en gran loner Mr Speaker pou ozordi prezant Lasanble Nasyonal ek manm piblik pou sa *Communications Bill, 2022*.

Mr Speaker, an Mars sa lannen i a fer egzakteman 23an depi ki *Broadcasting and Telecoms Act 2000 BTA 2000*, ti ofisyelman vin sa morso Lezisasyon ki regulariz nou sekter *broadcasting* ek kominikasyon elektronik.

23an pli tar pa sirprenan ki i annan bokou devlopman dan sa 2 sekter. Mr Speaker bann tel devlopman i annan pou fer avek globalizasyon marse pou sa 2 sekter li menm.

Lavansman konsiderab dan teknolozi, sanzman dan lafason ki bann konsonmater i azir e fer zot swa. E logmantasyon dan lakantite lakonpanyen ki pe deservi sa 2 sekter isi Sesel.

Alors an prenon kont tou sa bann devlopman, i vremen enportan Mr Speaker, ki nou bann stati legal i ganny met a zour e adapte an prenon konsiderasyon tou sa bann devlopman ki'n arive e ki kapab arive dan lavenir.

Ozordi Mr Speaker i annan devan nou *Communications Bill, 2022*, ki pou sa nouvo Lalwa ki pou potansyelman ranplas sa *Broadcasting and Telecoms Act* lannen 2000.

Sa nouvo Lalwa pou asiste Gouvernman pou met an plas bann stati - savedir lankadremman legal pou ki nou a kapab akomod bezwen bann diferan partner kle dan sekter lenformasyon, kominikasyon ek teknolozi ozordi e bann lannen ki pe vini.

Mr Speaker sa i fer ki Gouvernman a kapab akonplir bann lobzektif ki'n ganny mete pou Sekter *Broadcasting* ek Kominikasyon Elektronik. Sa bann lobzektif i konm swivan:

Fasilit devlopman Sekter *Broadcasting* ek Kominikasyon Elektronik.

Promouvwar lenvestisman ek linovasyon dan bann fasilitate lenfrastruktir kominikasyon elektronik.

Ankouraz, promot e ranforsi konpetisyon soutenab dan Sekter Lenformasyon, Kominikasyon avek Teknolozi.

Promouvwar litalizasyon optimal bann resours natirel, limite ki enkli frekans e limero.

E finalman protez lentere bann konsonmater e asire ki zot ganny bann pli bon valer, an term kantite servis, kalite servis e bann pri ki pli konpetitiv.

Mr Speaker enn bann sanzman kle ki sa nouvo Lalwa pou anmennen, an term lafason ki sa sekter pou ganny regularize, se bann letablisman en regilater endepandan ki pou apel *Seychelles Communications Regulatory Authority (SCRA)*.

Mr Speaker sa nouvo Lalwa i klerman separ fonksyon sa Lotorite e sa ki pou Minister. Rol prensipal Minister se pou met an plas bann Polisi e regilasyon.

Sa Lotorite li i pou perform bann fonksyon pou regulariz sa sekter e pran bann desizyon pou promouvwar devlopman Sekter *Broadcasting* e Kominikasyon Elektronik Sesel.

Mr Speaker sa Lotorite pou ganny gouvernen par en *Board*, ki pou ganny apwente par Prezidan, parey i leka aktyelman pou lapwentman bann tel *Board*.

Sa *Board* pou annan 7 Manm, e Lalwa i detay klerman bann kriter ki sa bann Manm i bezwen e zot konm swivan:

En Seselwa oubyen en rezidan permanan Sesel.

E dezyenmman, annan konpetans atraver kalifikasyon leksperyans profesyonnel dan bann servis *broadcasting*, oubyen kominikasyon elektronik, lekonomi, finans, biznes, Lalwa, administrasyon piblik, konpetisyon ek proteksyon konsonmater, oubyen lenformasyon teknolozi.

Mr Speaker, en lot eleman enportan anba sa nouvo Lalwa, se letablisman sa ki nou apel en *Communications Tribunal*. Sa i en Tribinal ki son bi prensipal se pou ekout bann Rapel e determinen si i annan okenn merit dan sa bann Rapel anver bann desizyon, direksyon ek lord ki'n ganny donnen par sa Lotorite.

Sa *Bill* i osi don pouvwar sa Tribinal pou deside lo sonm, lanmann pou lofans ki Minis in anmenn devan Tribinal. Mr Speaker, lanmann pli o ki sa Tribinal i kapab enpoze i R4milyon.

Tou sa bann provizyon Mr Speaker, se pou anmenn plis latransparans e separasyon pouvwar ant bann fonksyon regilatwar pouvwar lenvestigasyon ek bann aksyon pou ranforsi lenplimantasyon sa Lalwa.

Sa nouvo Lalwa i anliny avek bann praktik enternasyonal dan sa sekter. I enkorpor bann konsepsyon enportan, tel ki konsiltasyon, konpetisyon, proteksyon konsonmater *number portability*.

Koneksyon ant bann operater dan sa sekter, akse avek bann servis. Lafason ki lenfrastruktir i ganny servi e partaze, ladministrasyon limero ek bann ladres elektronik. Zesyon konplent, rezolisyon bann diskisyon parmi bokou lezot ankor.

Sa *Bill* osi i fer li en drwa pou bann konsonmater bann servis telekominikasyon, i kapab mentenir zot limero telefonn dan lenstans ki zot deside al pran en servis avek en lot lakonpanyen.

Sa i pou bann limero *fixed* ki nou dir bann limero telefonn lakaz oubyen lofis, ouswa menm bann limero *mobile* ki asosye ek telefonn portab bann endividi.

Sa Mr Speaker i sa ki nou apel *number portability*. Lafason ki sa pou ganny fer, pou ganny preskrir dan en regilasyon swivan laprouvasyon sa *Bill*. I annan plizyer lannen deza ki Departman Lenformasyon Kominikasyon Teknolozi *DICT*, pe travay avek bann operater avek lentansyon pou enplimant *number portability*.

En regilasyon in deza ganny drafte avek lasistans Biro *Attorney Zeneral*, konsiltasyon lo sa dokiman pou komanse byento avek bann operater.

Mr Speaker, en lot laspe enportan dan sa *Bill* ki diferan avek *Broadcasting and Telecoms Act 2000*, se ki sa Lotorite pou aprezan vin sa antite ki pou responsab pou donn bann diferan kategori *license* pou sa 2 sekter, olye *Seychelles Licensing Authority*, (*SLA*) parey i ete ozordi.

I enportan note Mr Speaker ki ler sa bann *license* pou ganny donn, en lapros ki nou apel *Technology Neutral* pou ganny adopte. Sa i vedir ki pou napa okenn

favorizasyon lo kalite teknolozi ki ganny servi pou sa bann diferan *license*.

Mr Speaker, anliny ek Polisi Gouvernman pou anmenn latransparans dan lafason gouvrenans bann term ek kondisyon zeneral pou sa bann *license*, i ganny mansyonnen dan sa *Bill* li menm.

Par kont Mr Speaker i annan bann lezot term ek kondisyon, ki pou osi enkli dan sa bann *license*, an konsiltasyon avek sa bann lakonpanyen ki pou ganny sa bann *license*.

Mr Speaker, i enportan note ki aktyelman bann operater dan sekter *broadcasting* ek telekominikasyon, pa ganny en *license* separe pou bann frekans ki zot servi dan zot lenfrastruktir pou donn sa bann tel servis. Sa i kontrerman avek bann bon praktik enternasyonal.

Alors Mr Speaker sa nouvo Lalwa pou fer ki sa Lotorite i kapab donn sa bann operater en *license* pou bann frekans ki ganny *assign* avek zot, pou zot servi pou ofer sa bann servis partikilye ki zot in ganny *licensed*.

Mr Speaker pandan sa bann dernyen lannen i annan bokou lentera pou lenportasyon, lavant e lwe bann lekipman radyo, par bann endividi ou biznes isi Sesel.

Malerezman Mr Speaker, sa bann tel aktivite komersyal pa posib aköz nou bann Polisi Lalwa pa permet bann tel aktivite. Sa nouvo Lalwa Mr Speaker i met an plas bann provizyon ki pou adres sa.

I vedir ki bann endividi ou biznes ki ti a kontan enport bann lekipman radyo avek lentansyon pou lwe ou vann sa bann lekipman lokalman, pou kapab fer li par sa ki apel en *dealer license* anba sa nouvo Lalwa.

En lot laspe tre enportan dan sa *Bill* Mr Speaker, i lefe ki sa *Bill* i fer provizyon pou Lotorite pran bann mezir nesaser pou ankouraz e promouvwar konpetisyon dan sa 2 sekter.

Bann tel provizyon i limite dan Lalwa aktyel e sa pou sanze dan nouvo Lalwa. En konponan enportan se lentroduksyon identifikasyon sa operater, ki annan pouvwar signifikan konsiderab lo marse. Sa ki nou apel *significant market power*.

Sa nouvo Lalwa i fer ki Lotorite i kapab enpoz bann lobligasyon lo sa bann tel operater. Sa i a fer ki nou ava asire ki i annan sa ki nou apel en *level playing field*,

laplenn nivo e sa a diminyen labi par sa bann operater an servan zot pozisyon dominan lo marse.

Proteksyon bann konsonmater i en lot konponan enportan dan sa *Bill* Mr Speaker. Sa *Bill* i fer provizyon pou ede protez lentere bann konsonmater e i enskrir bann aksyon e mezir ki kapab ganny pran ek bann operater pou asir proteksyon bann konsonmater.

Sa bann provizyon i ganny mete pou etabli sa ki nou konsider koman bann *fair dealing practice*, pou dekouraz bann pratik ki enzis. E osi fer ki i annan letablisman en *General Consumer Code* - en dokiman ki bann operater i oblize swiv e ki i en lofans si zot pa swiv okenn ant sa bann provizyon ki dan sa dokiman.

En lot konponan dan sa laspe proteksyon, laspe proteksyon bann konsonmater se en provizyon pou annan regilasyon faver standar, kalite servis bann operater i ofer. Enn bann konponan ki kapab ganny mete dan sa bann regilasyon, i posibilite pou enpoz lobligasyon operater pou swiv, mezire e mentenir en serten nivo kalite servis.

Konsernan bann servis *broadcasting*, sa *Bill* pou aprezan kouver tou bann aktivite *broadcasting* e sa i enkli provizyon bann servis par satelit tel koman *DSTV*.

Ozordi Mr Speaker Lalwa pa fer provizyon pou *license* sa bann tel servis, akoz zot pa ganny kouver dan definisyon *broadcasting* dan Lalwa aktyel.

Mr Speaker, en lot provizyon dan sa *Bill*, se pou annan regilasyon an relasyon avek sa ki nou apel *Country code top-level domain*. Sesel nou *Country code top level domain* se, .sc.

Sa i ganny servi pou reprezant tou bann ladres elektronik Sesel lo *internet* par egzanp, www.ict.gov.sc. An se moman rezis .sc i ganny administre par en lakonpanyen prive, e se li ki an rezistre tou bann ladres .sc dan Sesel.

Par kont an se moman napa okenn Lalwa e Polisi ki govern ladministrasyon .sc. vi ki sa pa ganny kouver dan nou Lalwa aktyel. An vi ki .sc i en resours nasyonal e i reprezant Sesel koman en pei lo rezo *internet*, alor i enportan ki i annan en fason legal e drwat ki Gouvernman ki govern son ladministrasyon e pwennvi bann akter kle lo

lafason ki sa i merit ganny fer. I devret osi ganny pran an konsiderasyon.

Bann provizyon dan sa nouvo Lalwa pou regulariz .sc, i parey pou bann lezot pei. I donn pouvwar Lotorite pou fer Polisi pou Ladministrasyon .sc, e osi donn lotorizasyon en antite pou administre .Sc.

Sa i baze lo bann bon pratik enternasyonal ki'n ganny adopte par bokou pei. I annan bokou Pei ki'n met en tel provizyon dan zot Lalwa, sa i enkli *Singapore, Maurice, Cayman Islands, Finland, Irlann, Malaysie, Macaw* e Sid Afrik.

Mr Speaker konsernan bann sarz, sa i ganny klerman etabli pou sak lofans dan sa *Bill*. I annan menm bann lofans ki zot sarz in ogmante, e sa se pou dekouraz sa bann tel lofans ganny komet.

Sa bann sarz i bann sonm larzan e pou bann lofans ki bokou pli grav, sa i menm annan bann santans prizon. Pou konklir Mr Speaker, sa *Bill* i enn ki modern e konteni tou bann eleman ki reflekte bonn gouvornans.

Tel ki latransparans, konsiltasyon e rann kont. Sa *Bill* i oblize ki regilater i konsilte e prodwir zistifikasyon pou tou son bann desizyon ki i pran.

Apard ki bann lenformasyon ki ganny konsidere koman lenformasyon konfidansyel, regilater pou oblize met tou dokiman ki resevwar pandan en konsiltasyon dan domenn piblik.

Le moman ki sa *Bill* i ganny aprouve pou vin Lalwa, i ekspekte annan lezot regilasyon ki pou vin anfers. Sa se pou ede dan lenplimantasyon bann diferan provizyon dan sa *Bill*.

Mr Speaker an gro, vwala konteni sa *Communications Bill, 2022* ki devan nou ozordi. Alors mon ti a kontan remersye zot pou zot latansyon. Fotespere ki mon'n kapab donn en pe leklersisman lo sa *Bill*, e mon demann sipor tou bann Manm Lasanble pou vot an faver sa Lalwa. Mersi bokou Mr Speaker.

MR SPEAKER

Mersi Vis-Prezidan pou ou prezantasyon.

Lasal pou ouver pou deba, nou annan Onorab Hoareau ki'n lev lanmen. Mon ti a kontan ganny lendikasyon bann lezot Manm ki annan lide entervenir pou mwan enkli zot. Onorab Loze.

Tre byen mon annan 6 dimoun ki'n lev lanmen pou le moman. Donk, vi ki sa i en *Bill* ase masif. Mon a permet zot letan ki i nesese, mon a les li 30 minit pou le moman. Zot pa bezwen servi sa 30 minit an tou ka.

Me si zot bezwen zot kapab ariv sa, si i annan lezot dimoun ki lev lanmen apre la mon a kapab limit letan en pe pli seryezman. Onorab Hoareau ou annan laparol pou ouver deba.

HON JOHN HOAREAU

Mersi Mr Speaker. Bonn apre midi Minis ek ou delegasyon. Bonn apre midi tou dimoun ki a lekout.

Mr Speaker ler nou get en pti pe dan listwar, nou kapab konstata ki kominikasyon i en keksoz ki i mars avek limanite li menm.

Dapre listwar lo komansman ti petet en son tanbour pou anons en serten levennman, ti osi petet en lafimen a en serten pwen pou anonse ki pe arive dan serten vilaz.

Me isi Sesel nou kominikasyon formel ti koman avek lapos an 1861, ki ozordi in ariv nou 162an depi ler lapos in ouver.

Mr Speaker nou premye kab ki'n konekte Sesel, ti en premye kab telegrafik ki'n kolekte Sesel avek Zanzibar e ki'n permet nou ganny kominikasyon atraver telegraf.

Ti an 1893 e sa ti ganny fer par *Eastern Southern African Company*, ki pli tar ti vin *Cable and Wireless Seychelles*. E dan li menm i annan 130an depi ler sa aktivite in komanse isi Sesel.

Alor depi tou sa letan in zanmen annan en *Bill*, oubyen en Lalwa ki fer provizyon pou en regilater endepandan. Nou'n annan *Bill* dan lepase oubyen Lalwa dan lepase ki kouver *broadcasting telecommunication*, me sa parey *VP* in anonse i annan 23an de sela. E sa Lalwa pe al ganny *repeal* e ranplase par sa nouvo *Communications Bill* ki nou pe anmennen ozordi.

Mr Speaker an term striktir, sa *Bill* i parey bokou bann lezot *Bill* ki nou'n vwar avan, kot i pe entrodwir en nouvo regilater, ki pou ranplas fonksyon *DICT* ti pe fer. I donn deskripsyon kwa ki pe ganny regilarize.

E osi i donn konsekans ek penalti si bann morso Lalwa i ganny kase. I fer

provizyon pou en Tribinal, pou *adjudicate* lo bann ka ki vin devan li. E parey nou konnen ler nou pe annan en regilater pou kontrol serten keksoz, i annan osi son lot parti ki ganny afekte, alor i toutafe normal pou donn li en *right to be heard* e en *fair justice*.

E sa *Bill* i al dan sa direksyon. I fer osi provizyon pou en *appeal mechanism* ki atraver *Supreme Court* i kapab donn en desizyon en finalite, si en ka pa'n ganny satisfere par Tribinal.

I en Lalwa ki annan bokou merit sirtou letan nou pe get bann laspe konpetisyon zis. Sa Lalwa li menm i anpes en operater servi okenn pozisyon dominan. E pozisyon dominan anba sa Lalwa e pou determinen atraver en *market research* ki sa regilater pou *conduct*.

Pou fer sir ki bann operater pa servi zot lavantaz, oubyen zot pozisyon dominan pou zot afekte lezot biznes ki dan menm, ki pe fer menm loperasyon avek zot.

Mr Speaker i pou osi fer ki dan sa domenn telekominikasyon, nou vwar en lapros profesyonnel e piblik pou benefisy avek bann tarif ki pli abordab.

Mon konpran ki Gouvernman in mazin tre byen, ki fason i pou akonpli son bann *socio economic objectives*, alor in pran kont tousala e fer sir ki sa regilater i pou kapab regle tarif bann operater dan sa domenn.

Mr Speaker i touzour lobzektif sa Gouvernman, pou fer sir ki pri *internet*, e lezot prodwir kominikasyon i desan. Sa i nou travay kontinyel ki nou pe fer, pou fer desann pri lavi li menm.

Sa *Bill* pe promot egzaktman sa. Sa regilater pou kapab entrodwir sa ki nou apel en *price cap* lo bann servis ki bann operater pe donner. Mon le fer osi remarke ki sa *Bill* ti vin kot nou depi lannen pase, me nou'n bezwen fer li retourneren, akoz ler nou ti pe komans fer nou *scrutiny* nou ti vwar ki Minis ti annan tro bokou pouvwar. Sirtou lo kote sa lendepandans sa regilater li menm.

Alor mon fyer poudir sa in ganny ekoute e ozordi sa in ganny retire. E si nou pou get dan *clause 5* li menm, *establishment of the authority* i kler poudir sa Lotorite pou vin en *body corporate* e i pa pou depan lo Bidze Gouvernman. E alor i pou kapab zer son prop finans atraver bann lisans e bann lezot servis ki i ofer.

E sa pou fer ki i napa okenn kontrol direk anba okenn Minis. Minis pou la zis pou met bann Polisi Gouvernman an mars an plas, e promote lavansman teknolozi e an konsiltasyon zisteman avek sa *Body*. Ki sa *Body*, ki sa regilater.

E tousala i ganny definir anba *clause 7* dan sa *Bill*. Sa dan li menm i promote parey mon'n dir lendependans e i annan pa posibilite ki Gouvernman i enterfer, dan louver sa Lotorite.

Par kont Mr Speaker mon annan serten konsern lo trwa pti kalite e lenplimantasyon sa Lalwa, ki mon ti a kontan leve e ki mon oule Minis petet dan son *summing-up* i tous en pti pe lo la pou eklersi serten dout.

Premyerman lo a size portabilite. Portabilite i vadir ki ou kapab servi ou menm limero, menm si ou sanz *network*. Mon konsyan ki i enportan pou bann biznes, aköz *once* ki ou annan serten limero kontak, ou limero ki petet i kapab pe ganny servi enternasyonalman.

E si ou pe sanz operater, i vin en problem pou sa biznes li menm, aköz son limero pou bezwen sanze enternasyonalman e dimoun ki konn li lo sa limero, i en pe en domaz pou li kapab kontinyen fer son biznes avek.

So, sa dan li menm i pou *improve ease of doing business*. Me selman avek sa sistenm portabilite, parey nou'n dir i pou anmenn plis konpetisyon. Parski si en dimoun pa satisfè avek en operater, i kapab fasilman *migrate* al lo en lot operater.

Me selman parey mon pe dir i vin avek en kou. Dan mon resers ki mon'n fer. Sa bann *software* i kapab kout apepre \$7 milyon pou enstale par pou sa bann lakonpanyen ki pe *provide* sa servis.

Alor i en kou signifikan ki pou enpakte lo kou operasyonnel sa bann operater li menm. Nou tou nou konnen poudir en dimoun i vin dan biznes, i pa vin dan biznes pou li perdi i vin dan biznes pou li fer en pti pe larzan osi.

Me mon ti a kontan konnen ki fason, ki mekanizm ki sa nouvo regilater pou kapab met an plas pou zisteman kapab *tag* sa bann pri oubyen fer sa bann pri reste abordab.

Kalite keksoz i pe vin avek oubyen i decide pou vin avek pou *enable* sa prosedir. Dezyenman nou konnen osi ki, ler bann operater pou *operate* anba sa Lalwa,

posibleman zot pa pou bezwen neserman aste zis en *license*.

Zot pou bezwen plizyer *license*, zot bezwen en *dealers license*, en lot *license* pou zot kapab *operate*, en lot *license* petet pou serten kalite *spectrum of waves* ki zot pe servi. Alor sa osi i pou kout sa lakonpanyen en pti pe plis, an term bann *license fees*.

E i pou fer ki i pou met sa bann lakonpanyen dan en pozisyon kot zot pou bezwen vwar en pe plis larzan pou met dan zot loperasyon zot menm. Eski sa li menm i pa pou defet sa bann nide ki nou pe sey fer telekominikasyon vin en keksoz pli abordab, oubyen vin en keksoz ki - aköz sa bann dimoun zot pou pas sa kou pou sey pas sa kou lo konsonmater?

So, eski nou pa pe an menm tan pe fer en keksoz dan en kote, pou anmenn plis konpetisyon pou sey fer desann pri, me a lot kote nou pe *increase the price the cost* pou loperasyon sa bann dimoun li menm?

E ki sa kou finalman i bezwen ganny mete lo sa ki servi sa bann servis. Mr Speaker bokou bann operater pa kapab rekouver zot det, aköz bann *bad debts*. Par egzanp dan bann statistik ki mon'n konstate *Airtel* par egzanp i annan apepre R67milyon deor atraver *bad debts*.

E ankor mon ti a kontan ki Minis i donn nou en pe lide lo si sa bann operater pou kapab ganny mete lo *CIS* -vedir *Credit Information System*, pou ki zot kapab konn zot bann kliyan en pe plis, oubyen konnen si sa kliyan i serye i pa pe bouz *from one telecommunication operator to another*.

Mr Speaker, mon osi ti a kontan ki Minis petet, i donn nou en pti pe detay an vi ki sa *new regulator* i pou bezwen osi regulariz bann teknolozi ki rantre dan domenn telekominikasyon.

An vi ki i pou bezwen fer sa i form parti son travay e nou konnen poudir *technology 5G*, in deza pe antre dan domenn telekominikasyon Sesel, eski i pou annan en form ledikasyon pou ansanm avek sa regilater, avek petet Lasante, pou kapab koz avek Seselwa pou eksplik Seselwa lo lefe ki sa bann, teknolozi i annan lo lasante - si i annan -e pou fer sir ki tou dimoun i kapab konpran byen ki sa teknolozi e ki fason sa teknolozi i ganny aplike.

Finalman, Mr Speaker pou lenformasyon piblik, petet si zot ti kapab

eksplike akoz SBC, koman en *national broadcaster* i pa tonm anba sa Lalwa?

Mwan mon konpran sa, me selman mon ti ava kontan ki zot, zot eksplik piblik li menm anvi ki SBC i pa pe sarz okenn larzan piblik pou sa ki li i pe donnen pou sa *broadcasting* ki pe donnen, oubyen pou sa bann servis i pe donnen.

Mr Speaker mon pou siport sa Lalwa mwan, e mon pou demann lezot Manm pou fer parey. Akoz mon krwar sa Lalwa i li menm en keksoz istorik ki pe arive pou nou. Petet si nou pa fer li nou pou tre pe pei lo lemonn ki pou napa en regilater endepandan pou *telecom*.

Sa Lalwa pe met annord bann aktivite e pratik enternasyonal, e pe fer sir ki i anmenn plis komers zis konpetisyon ek konpetisyon dan sa sekter. Anvi ki fasil pou sak sa sekter annan en tandans pou vin en *gro cartel*.

Alor nou bezwen en Lalwa ki pou kre sa lespas e pou regilariz laspe kominikasyon ki pou zet en lizye lo proteksyon konsonmater. Pou osi met anliny bann standar enternasyonal e pou fer sir ki *telecom* i donn en bon servis - bann operater *telecom* i donn en bon servis, lo kote konpetisyon pou fer sir ki bann kondisyon i favorab e laplenn i nivo pou tou sa ki anvi antre dan sa *field*.

E osi lo kote proteksyon lenformasyon nimerik, i enportan ki sa i tonm en laspe prensipal anba zot fonksyon. E alor Mr Speaker, mon kapab dir sa Lalwa i enn ki pe al dan bon direksyon. I pe kre osi en mekanizm pou ed sa bann diferan operater servi fasilite kanmarad dizon bann *antennas* ki ganny mete.

So ki nou pa vwar en kantite antenna partou dan tou kwen pei. So, i pe al dan sa direksyon pou anmenn telekominikasyon en lot nivo. Mr Speaker avek sa mon pou remersi ou.

MR SPEAKER

Mersi Onorab. Prosen entervenans Onorab Loze.

HON JOHAN LOZE

Mersi Mr Speaker. Mr Speaker koman en Manm *Bills Committee* mon ti a kontan dabor komans par remersye Mr *Vice-Chair Bill Committee*, pou son prezantasyon ki in fer. Remersi li e felisit li akoz mon krwar in

carry pozisyon *Bills Committee* ase byen. E la mon ava demann Madanm Clerk osi, petet pou get dan son *welfare* dan le fitir.

Mon oule osi remersi *panel* ki devan lo latab espesyalman reprezantan *DICT* e osi *AG's Office*. Prose pou sa *Bill* ariv devan nou Lasanble in enn ki'n ase long, in pran letan in annan en kantite *back and forth*.

Zot in annan pasyans avek nou e mon bezwen remersi zot pou sa. Nou'n annan kantite diskisyon, kantite deba lo bann premye fwa ase banal, e zot in toultan apre pou *indulge* e *engaged* avek bann Manm Lasanble Nasyonal.

E i pa'n en travay ki'n fasil e pou sa nou bezwen osi *acknowledge* e met nou remersiman anver bann zofisye Gouvernman. *Having said all that* Mr Speaker, *societal control*. Kontrol en sosyete i en keksoz ki'n la depi later e later, depi ki imen pe fer bann groupman antre nou pou viv ansanm koman sosyete.

E in toultan en faz e en staz enportan dan imen kot nou kapab *monitor* e *regulate* konportman swa formelman oubyen enformelman *of* bann manm nou sosyete.

E bann mekanizm kontrol sosyal ki annan, i bann ki pou viv avek toulezour, san menm realize ki zot la. Par egzanp Lalwa li menm, Lakour, Lapolis, tousala i bann mezir e mekanizm ki ganny servi pou aport en poz kontrol sosyal lo nou imen, le moman ki nou decide viv ansanm koman en sosyete.

Bann lezot mekanizm kontrol ki pli *subtil* ki petet nou pa realize, i annan ou krwayans personnel, ou larelizyon e bann norm kiltirel avek lekel ki ou, ou swazir pou atas ou lekor e *adhere to*.

Akoz sa i ou panse e ou krwayans. Me par kont enn bann laspe tou sosyete modern, se lilitizasyon *science-based technologies* koman en mwayen pou *engineer* kontrol sosyal. E se la kot nou kapab retrouv serten danze ozordi.

Le 30 Zen 2014, *United Nation Human Rights Council* ti depoz en rapor avek Konsey Zeneral Nasyon z-Ini. Rapor ti entitile "*The right to privacy in a digital age.*"

Mon pou al en pti bout dan dezyenm paragraf son lentrodisyon kot i dir, "*The state now has a greater capability to conduct simultaneous invasive targeted and broadscale surveillance than ever before.*"

In other words, the technological platforms upon which global political,

economic, and social life are increasingly reliant are not only vulnerable to mass surveillance, they may actually facilitate it.”

Nou pe viv ozordi dan en sosyete kot sitwayen viv en parti zot lavi atraver teknolozi;- swa bann protokol kominikasyon senp oubyen medya sosyal li menm, ouswa tou bann lezot form kominikasyon elektronik, ki nou annan ozordi dan sosyete modern ki nou pe itilize e ki parey sa rapor Nasyon z-Ini in dir i kapab menm fasilite pou ou *privacy* ganny anvair.

Now, it is incumbent upon the state to protect the right to privacy of each and every single sitwayen Sesel. To protect the right to home and family.

Be kot danze i vini la, parey sa rapor pe dir nou *the right to your home* i kapab ganny proteze. I kapab in *violate*, me selman ou, ou pe nepli viv lavi zis dan ou *home* ou. Akoz nou pa pe viv lavi *strictly in real life*.

Nou pe viv lavi dan bann *mahjong* vertyel, e se laba ki fasil pou ganny anvair. Kot mon konsern i vini mwan, sa morso Lezislasyon ki devan nou i *heavy* lo kontrol, i *heavy* lo regilasyon, i *heavy* lo met kontrol dan lanmen Gouvernman, kot i pou kapab ganny akse avek sitwayen atraver bann diferan *platform* elektronik, kot sitwayen i kapab inosaman viv son lavi.

I leze dan bann fason definisyon e son fason ki i dir keksoz. Letan mon dir i leze akoz si ou al dan Lartik 90 kot i pe dir ou en *threat*, kapab ganny raporte pou en *threat*, ki sa i *declenche monitoring*.

E mwan personnelman mon annan konsern. Mon annan konsern ki demen sitwayen pou trouv li dan bann parkour normal son lavi, dan bann parkour normal son bann enteraksyon, swa in dir en keksoz, swa in al fer en keksoz, swa en parol in sap li.

E sa i *declenche monitoring*. Sa i *declenche* bann *invasive practice* ki fer si ou annan en Gouvernman - pa zis sa enn Gouvernman mon toultan dir zot - mon pa pe koz zis pou *LDS*, be mon pe koz pou *any* Gouvernman ki kapab vin apre.

Nou bezwen *careful* ki groser roten ki nou met dan lanmen leta, ki i kapab servi kont sitwayen. *We have to be very careful of that.*

E nou kapab trouv nou dan bann sityasyon kot demen sitwayen li i pe fer son bann parkour, e nou bezwen admet nou

Kreol nou tou. Nou annan bann manni ki nou annan koman Seselwa. I annan keksoz ki nou, nou dir ki nou, nou fer. E demen ou ale ou dir sa elektronik an e deswit ki ou vwar ki ou *privacy* i ganny anvair. Mon annan konsern.

E mon annan en konsern serye lo en size ki Onorab Georges ti leve, mon krwar dan 4enm ou 3enm Lasanble, konmkwa ki *back then* i ti pe dir sa an relasyon avek Gouvernman presedan. Ki Gouvernman pe *over legislate*. I pe *legislate* tro bokou i pe *legislate* tou keksoz. Sa osi i en konsern pou mwan. Eski nou pe *over legislate* isi Sesel? Eski nou annan nou en Gouvernman ozordi ki trouv li pou en rezon ou en lot, anvi kontrol tou keksoz? Tou laspe dan lavi sitwayen?

Sa i bann pwen refleksyon ki nou, nou pe bezwen fer. E en lot keksoz, e en kantite fwa Lezislasyon i vin devan nou Lasanble e nou, nou dir avek bann *bodies* ki vin devan nou, ale al *educate*, fer dimoun konnen e konpran ki pe arive, ki annan dan ou Lalwa.

Apre en *few months down the line* ou tande Labank pe fors tou dimoun ki pe *withdraw* R300 dir kote, ki i pe al fer avek? Ki manner ou pe al depans sa larzan? Ouswa en dimoun pe *bank* en larzan, dir.

Basically, sitwayen li i pa'n ganny *educate*, *but even worse* sa *stakeholder* li labank li osi i pa'n ganny *educate* li. Li osi i pe mal enterpret Lezislasyon ki Lasanble in fer.

So, nou annan bokou konsern. *Now*, letan mon lev sa pwen, eski nou sosyete in pas atraver en deba? Eski nou Nasyon nou bann zenn marmay ki pe leve, nou'n pas atraver en deba kot nou'n vreman konpran tou sa ki pe al arive an rezilta tou sa bann Lezislasyon ki'n vini resaman?

Eski nou Nasyon i konnen e i konpran tou konsekans e reperkisyon ki kapab annan *from* bann travay ki Lasanble pe fer. Nou'n napa sa ledikasyon.

Nou pe anmenn en morso Lezislasyon kot li i laba devan. E ou annan ou la Nasyon Seselwa ki i pe *blissfully* viv son lavi trankilman laba deryer li, i pa neserman i annan move lentansyon.

I annan okenn form kriminalite dan li, pe zis viv parey Kreol i viv. E souvan sa ki nou fer *online* i sa ki nou fer an realite. *Now*, eski pou annan dimoun ki pe al pri la? An

konsekans bann Lezislasyon ki nou, nou pase?

Eski i annan dimoun ki zot aksyon pou la pri zot an konsekans bann Lezislasyon ki nou, nou pase san ki zot menm annan move lentansyon? Wi, zot a tor. Zot a tor fas a Lezislasyon ki'n ganny pase par Lasanble e zot pa tor a annan move lentansyon, me i zis nou vilen manni Kreol.

So, nou annan sa. Mon egalman annan en lot konsern letan Prezidan resaman in debout devan nou Lasanble, in dir nou pou dir li i pe anvoy tel dosye devan Konmisyoner Lapolis e i pe al demann Konmisyoner Lapolis pou pran tel ou tel aksyon.

This is something that is very telling, e sa i konsernan pou mwan. E sa ki Prezidan ti pe dir ti an relasyon avek *Cyber Crime Act*. Me la ou *Cyber Crimes Act* la prezan, la i ganny kapasite la. La i a ganny zouti la, la i a ganny fason pou li fer sa *invasive surveillance* dan lavi sitwayen.

Mon lensten pou mwan personnel koman en imen, e mon rol koman en lezislater fas avek bann lobligasyon konstitisyon. Mon lensten pou mwan i pous mwan dan direksyon pou protez sitwayen kont labi Leta.

E mon repete, pou protez sitwayen kont labi Leta. *Whether* labi i *perceived* ouswa i kapab ganny komet, ouswa i pou ganny komet, *The onus is incumbent upon me* koman en Lezislater pou touzour akt pou protez sitwayen kont labi Leta.

E *le chose* avek bann keksoz parey sirveyans, sa bann zafer ki bann Lazans Sekirite i fer - zot o - i bann keksoz ki deroul dan fernwar sa. I bann keksoz ki pa pas dan lagete.

Li Lasanble letan in fer sa Lezislasyon in met dan lanmen Gouvernman, i napa fason pou li *monitor* sa li. Nou pe esansyelman pran nou pouvwat, met dan sa morso Lezislasyon donn Egzekitiv e apre nou napa okenn kapasite sirveyans lo sa bann sirveyans nou.

Nou napa en fason fer *oversight*, akoz sa i bann keksoz ki deroul dan fernwar. So mwan, sa i bann konsern ki mwan mon annan e *they are genuine concerns*, zot mon bann konsern pou mwan personnel. E ki pou gid mon fason ki mon vote lo sa morso Lezislasyon.

E i pou annan zis en keksoz ki pou determin mon vot, se proteksyon lendividi kont labi par Leta. Se tou. I pa en kestyon mwan kont *LDS* - i proteksyon endividi.

E mon pa konnen si dimoun pou admet, *but* Gouvernman dizour i annan en *long way* pou ale pou zot *win back* konfyans e krwayans dimoun. Zot annan en kantite travay pou zot fer pou zot *win back* konfyans sa Nasyon ki apel Seselwa.

E ozordi sa morso Lezislasyon ki la, i konmsi mon pou pran mwan en bwat zalimet avek en pe bennzin, mon pe al met dan lanmen en zanfann 5an. E on pa pe siperviz sa zanfann mwan. Mon pa kapab *monitor* li, mon pa konnen ki i pou fer avek sa ki mon'n met dan son lanmen.

Mon pran mon donn li e an tout bonn konsyans mon *walk away*, mon dir i *ok*. Non, i pa *ok*, i pa *ok*. *Both* legzanp lepase e legzanp ki pe arive and en kantite pei an deor Sesel, espesyalman bann swadizan pli gran demokrasi o monn, i montre nou poudir sa bann keksoz koumsa i bann zwe danzere. Espesyalman letan ou annan ou en Nasyon ki pa'n ganny anmenn a zour lo nivo mezir ki Lezislasyon pe al ganny pran.

So, Mr Speaker an tout bonn konsyans mon bezwen enform ou, enform Minis e delegasyon, *in spite of* sa kantite travay, sa kantite zefor ki'n ganny fer, ki'n ganny envestir dan sa morso Lezislasyon, mwan *as of now* mon pa pe kapab garanti mon sipor.

Mon ava ekout deba, mon ava ekout repons ki Minis i donner, *I will allow myself to be guided* selman mon'n met mon bann konsern devan. *Hopefully* si mon mal, mon mal, mon ava ganny gide e dirize dan bon direksyon.

Be as it stands now, mon pa santi ki sa morso Lezislasyon dan son antyerte parey i ete la - son bann bout teknik *fine*, i *ok*. Selman i annan sa bann konsern ki mwan mon pa santi i al dan lentere la Nasyon Seselwa.

E mon pa pe fer zistis mon pozisyon. Mon pa pe fer zistis mon Nasyon, si mon lev mon lanmen an faver sa morso Lezislasyon an se moman. Mersi Mr Speaker, mon remersye Lasanble pou ekout mwan.

(APPLAUSE)

MR SPEAKER

Mersi Onorab. Mon donn laparol Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun.

Mr speaker an Avril 2018, Lasanble Nasyonal ti dan son 6em sesyon, e sete ansyen ladministrasyon dirize par Prezidan Faure ki ti o pouwar. E US menm si zot ti minorite dan Lasanble, se zot ki ti parti Gouvernman dan Lasanble Nasyonal.

An Avril 2018, *Cabinet* dirize par Prezidan Faure i aprouv pou ki sa Lotorite ki son Lalwa i devan nou ozordi i ganny kree e Biro *Attorney Zeneral* i dir ki sa Lalwa pou vin devan Lasanble Nasyonal;- setadir 6em Lasanble Nasyonal dan 2em kar 2018.

Si zanmen Gouvernman avan ti anmenn son *Bill*, dan 2em kar 2018 (nou pe koz 5an pase la) eski *US* ti pou rezete, lo *ground over legislation*? Eski *US* ti pou rezete, lo *ground* proteksyon sitwayen kont labi Leta?

Sa *Bill* ki devan nou, Prezidan lot zour dan son Leta Lanasyon in eksplik nou byen. I annan bann keksoz ki en ladministrasyon i komanse lot i pran. Akoz pei i bezwen sa bann striktir legal. *It is not our legacy though* me selman pei i bezwen.

E koman en Lasanble serye nou bezwen tonm dakor ki nou pa fer per dimoun, nou pa senm mansonz e lafreyer, pou dir la en lot Lalwa ki pe *over legislate*. Ouswa en lot Lalwa ki pe al abiz sitwayen e pa protez zot kont labi leta.

Parski sa Lalwa ki devan nou, mon repete *Cabinet* ti aprouve, pou li ganny enplimante an Avril 2018. E apre *PS Choppy* ansanm avek Sekreter *D'état Afif* ti koz lo la avek medya, e donn son rezondet ki nou ava retourn lo la en pti pe pli tar. Alor nou kler lo la.

I en keksoz ki pei i bezwen e ki nou bezwen zis fer sir ki son laplikasyon i byen. E akoz pei i bezwen. Onorab Hoareau dan son prezantasyon in dir nou sa nou, Sesel i ti enn bann rar pei dan lemonn ki ti napa sa Lotorite.

Maurice depi 1988, zot in etabli zot *Communication Authority* atraver *Mauritius Telecommunication Act, 1988*. *Madagascar* depi 1996, atraver *Malagasy Office for the Study and Regulations of Telecommunications*. *Comore* i annan pou li

ki apel *National Regulation Authority of ICT*, ki labank mondyal zot ti al laba e ed zot akoz *Comore* ti enn bann pei kot Leta ti kontrol sekter telekominikasyon.

Sri Lanka depi 1991 i annan pou li ki ti vin atraver zot 25em Lalwa *Telecommunication Act* an 1991 e amande an 1996. Alor dan larezyon malgre ki nou en pei ki en *high income country*, malgre nou pe tonm premye dan nou rezyon dan tou nou bann lezot Lendeks enternasyonal. Me nou ti enn bann pei ki ti an aryer avek lenplimantasyon en tel striktir legal.

E Mr Speaker dan *sustainable development goal*, i egzize ki bann Pei i al dan sa direksyon. *Goal 9* i koz lo bon planifikasyon bann lendistri, linovasyon avek lenfrastriktir.

Alor mon war poudir sa Lalwa i pe zisteman ed nou koman en pei pou *achieve* sa bann target 2030. E ler nou regard Sekter Telekominikasyon, i enportan pou nou koman en pei partikilyerman pou nou lekonomi koman en Pti Leta Zil.

Dapre rapor *SRC* pou 2021 7.23poursan *tax* lakantite *tax* ki *SRC* i kolekte i sorti dan Sekter Telekominikasyon. E bann *tax* ki nou apel *pay as you go*, sa i 12poursan sorti dan telekominikasyon. E ler ou get la poursantaz *tax* ki kontribye lo sa trwa zil, setadir Mahe, Praslin, La Digue telekominikasyon i egalman o akote konstrikasyon ou *wholesale*, i pa zwenn tourizm parey lo Praslin, lo La Digue.

Me savedir nou vwar poudir i vremen enportan. Alor, lavansman dan Sekter Teknolozi, Lenformasyon e Kominikasyon ouswa sa ki nou apel *ICT* an Angle, i en konponan enportan pou nou pei koman en Pti Leta Zil.

Akoz lavites ki sa sekter pe devlop avek e agrandi i enportan ki pei i met an plas bann regleman nesese pou zer diferan laspe sa sekter. Bann regilasyon i dwatet kouver proteksyon konsonmater, asire ki i annan konpetisyon, zer rezolisyon ant dan bann dispit. E donn bann frekans radyo ki mon pe mazine a lavenir nou kapab annan ankor bokou plis ki sa 4 stasyon ki annan an se moman.

Sa ki mon pli konsernen avek Mr Speaker, se manda nouvo *Seychelles Communications Regulatory Authority*, se ki i asire ki Sekter *ICT* i reste konsistan dan son

performans. So, si nou en oter nou bezwen monte nou pa kapab redrese.

E sa sekter i dwatet ankouraz plito sa Lotorite merit an kouraz inovasyon dan sa sekter e ki nou kontinyen avanse. Sa Lotorite osi bezwen asire ki sak endividi Seselwa, biznes e Gouvernman, i annan akse avek bann servis ki inovativ. Me ki pri osi i abordab.

E Mr Speaker zofisye ki pou ganny konfyete sa responsabilite, zot pou bezwen zer sa antite, e ki pou zer sa antite i travay sanses pou asire ki konpetisyon dan sa sekter i fleri e drwa konsonmater i ganny proteze.

La aprezan ki i kler, ki avek letablisman *Seychelles Communications Regulatory Authority*, *DICT* ki pou bokou letan in zwe rol regilater, a kapab li konsantre lo son misyon e fonksyon ki prensipalman pou siport Gouvernman dan lenplimantasyon bann Polisi, Lalwa ek regilasyon.

Ki a permet *full* litalizasyon *ICT* lo nivo nasyonal dan benefis nou pep. E zisteman se sa ki *PS Choppy* ti dir avek lapres an Avril 2018. I ti eksplike ki apre ki *Cabinet* dirize par Prezidan Faure sa letan, ti'n tonm dakor ki sa Lotorite i ganny kree. Sa Lalwa i ganny anmennen devan Lasanble dan dezeyenm kar 2018.

Ki li *DICT* i a konsantre lo Polisi ki annan pou fer avek *ICT*. I ava *spearhead* avek sa proze *electronic government*. I ava devlop en antretenir bann *software* ki servi dan Gouvernman. E lezot lenfrastruktir pou siport e siport bann *service delivery* dan Gouvernman. Tandis ki li sa Lotorite i ava konsantre lo bann zafer regilasyon. Alor nou kler lo la.

So, nou pe swete Mr Speaker ki sa nouvo Lotorite i asire ki bann resours limite, parey later pou enstal bann lenfrastruktir *ICT* i byen ganny zere. I annan konsern ozordi dan pei par egzanp ki i annan tro bokou sa bann lema partou, bann operater pa pe tonm dakor pou zot servi bann lema kolektivman. E alor pou nou protez osi lanvironnman pei sa mon krwar i ava en latas pou sa nouvo Lotorite, kapab trouv en lagreman konvenab pou tou bann operater.

Zot merit pe protez konsonmater kont bann pratik ki pa zis, e osi bann fo lavertisman ouswa fo lenformasyon ki konsonmater i kapab pri ladan. Etabli

standar ek kalite servis, me pli enportan asire ki bann lakonpanyen i konform avek sa bann legzizans.

Rezourd okenn problem;- dispit antre bann parti dan en fason transparan, zis, vit, e dan en fason efektiv. *ICT* Mr Speaker i telman enportan ki i pe anmenn plis reveni, dan pei atraver *SRC* e osi mon krwar performans bann lakonpanyen parey *Cable and Wireless*, *Intevision* e *Airtel*, nou merit pe ankouraze.

Akoz apre zot re investir dan kominote, kot nou bann Manm nou sorti e alor *it is a win-win situations* pou tou dimoun.

Donk, sa Lotorite i bezwen siport lagrandisman sa sekter ekonomik, par fasilite *the ease of doing business* pou zot, e enplimantasyon sa Lalwa ouswa bann regilasyon ki ava vini a lavenir, mon pe swete ki i anmenn Lalwa ou regilasyon ki *straight forward*, senp, targete e fasil pou enplimante ouswa swiv.

Se sa bann pwen swivan Mr Speaker ki letan mon'n lir sa Lalwa e nou'n menm diskite avek bann *sponsors* atraver *Bills Committee*. I pa ti neserman bann pwen banal, parski nou ava avoue poudir sa sekter i en sekter tre teknik. E ou bezwen lantrennman, ou kalifikasyon neser pou konpran li, i pran bokou lannen.

E dabor mon ava felisit *panel* bann ki ti prezan dan *Bills Committee*, mon krwar zot in montre nou poudir, *this is the standard* ki nou ti ava rekomande dan *Bills Committee*, letan nou enterakte avek bann *sponsors*. Me nou'n anmenn konsern ki bann *constituent* in leve.

Enn sa konsern se keston sa Tribinal e kalifikasyon bann dimoun ki pou kapab kalifye pou servi lo sa Tribinal. E en konsern ki nou ti leve dan *Bills Committee* se kalifikasyon i kapab en pe tro o, e baze lo grander *labour market* Sesel, i kapab difisil pou nou trouv dimoun kalifye pou kapab antre dan sa bann pozisyon.

E i posib ki demen nou kapab war nou pe bezwen reviz sa Lalwa pou *lower the qualification* ki i pe demande. *Size domain name* Mr Speaker, Vis-Prezidan in adres sa dan son lentervansyon e wi nou lo kote *LDS* nou'n diskite sa dan nou *caucus*, nou siport pozisyon ki ou pe pran. Akoz i telman i presi dir en aki nasyonal e nou ti ava prefere vwar ki sa i dan lanmen - pa neserman

Gouvernman - me omwen en Lotorite, en *Body* en *Council*, whatever me selman ki annan konsansis nasyonal lo la.

100poursan pa dan lanmen prive, akoz i en kestyon nou pa anvi pei i ganny *highjack*. Ou sinon ki mon krwar ki nou bezwen trouv en fason pou dir avek bann konsernen deza pou dir *ok*, zot in zourir pou osi letan, me in ler aprezan pou nou tonm dakor ki mannyer nou bouz de lavan e ki sa i vi en keksoz pou en aki nasyonal, olye ki dan lentere lanmen prive.

Mr Speaker san ki mon *preamp* deba lo en lot Lalwa me letan nou ti'n zwenn pou diskrit *Utilities Regulatory Bill*, enn bann parol ki'n ganny dir par bann *sponsors* an pasan se ki, sa enn Lotorite li demann i kapab elarzi *beyond the traditional utilities* e pran bann lezot sekter, par egzanp transportasyon e kominikasyon ti vin ladan.

Eski sa i en posibilite? Eski nou pas en Lalwa la me ki demen sa *Regulatory Body* i ganny *phase out*, ki annan *one super regulatory authority* dan Sesel?

I en pwen deba, akoz grander nou pei bann keksoz koumsa, i en pwen ki mon oule met devan. Me an menm tan ki mon pe dir, li sa enn Lotorite i nou pe kree i kapab ganny abzorbe a lavenir. *What about* nou donn li en responsabilite adisyannel?

Ozordi i annan *postal regulatory* ki mon krwar i napa en dirizan an se moman ki nou pe koze akoz Mr Nolin in ale - mon krwar la i en landrwa atraver ou Mr Speaker pou mwan dir avek *VP* dan konsolidasyon lekonomi sa pti larzan ki nou annan, i en landrwa ki mon krwar ki nou kapab met li.

Pou li reglemant *postal services*, akoz mon war li en tonm ansanm avek kominikasyon, ouswa telekominikasyon, telekominikasyon e alor pei i ava kapab fer *slim down*, koup en pe bann *excess fat* dan servis piblik.

Lo size 5G ki mon koleg Onorab Hoareau in leve, mon'n vwar poudir *DICT actually* in deza pibliy en lartik lo sa size. So, mon krwar i deza annan serten dokiman dan domenn piblik lo sa size.

Me i touzour en konsern pou n group nou popilasyon in annan petisyon, bokou nou bann *MNA* in ganny aproz par diferan dimoun e la ankor mon pou *challenge* nou *national broadcaster*. Mon krwar ki zot merit donn en koudmen *DICT*.

Akoz *DICT* li i annan son bout ki pou anmenn ou ziska en kote, apre Minister Lasante i ava pran lot, apre se pa man lekel lot Sekter Lanvironnman ouswa Transpor.

Me solman zot fer diferan program konmela, gran reportaz oubyen "Eski ou ti konnen?" Bann keksoz koumsa. La en moman en size pou zot depouye. Ale rode *what is 5G?* Ki son konsekans? Ki son lavantaz? E alor mon krwar i ava en size ki mon pe propoze zot met lo lata.

Kestyon *SBC* i pa ganny kouver. Petet si *SBC* ti ganny kouver enn bann keksoz ki *Bills Committee* ti koz lo la, se kestyon en *levy* ouswa en *fee*, ki piblik Seselwa i merit peye pou servis televizyon.

Nou pa pou premye pei pou fer - sa *set top box* i donn pou naryen. Me pa'n aste pou naryen sa, so mon pa war naryen mal ki dimoun i kontribye. Ozordi, mwan par egzanp mon napa *set top box* kot mwan, mon get *SBC* swa lo *Cable TV Cable and Wireless*, or lo *Intelvision*.

E mon pey tou lede servis, so mon pey en lakonpanyen prive pou ganny en keksoz gratwit ki mwan koman en *taxpayer* mon peye pou li fonksyonnen. I fer nou pei pas koman en (ki term mon kapab servi)? En?

Non, mon pa poudir sa bourik ki krwar i en zoli seval, non. Definitivman non. Be solman i en keksoz pou nou reflexir. E si alor sa zafer *SBC* ti vin dan sa Lalwa kekfwa la zot ti ava ganny ankouraze pou *think*.

Nou tande ki *SBC* i bezwen R30milyon pou bouz dan son nouvo *SBC House*, ki nou napa pou donner. *Unless* nou koup bann *allowances* dan Biro Dirizan Lopozisyon, me i pa pou tro oule nou fer sa.

So, selman Mr Speaker sa bann pwen ki mon'n mansyonnen la an term kalifikasyon Tribinal, *domain name*, *powers* Lotorite, swa pou li ganny abzorbe ouswa pran nouvo *powers* pou *postal regulatory*, 5G avek *SBC* i bann size mon krwar ki tonm byen pou nou al de lavan, regard li de pre, avek kreasyon sa Lotorite. E avek sa mon ava siport son kreasyon. Parski i en lot lenfrastruktir modern ki nou pe azout avek Sesel koman en Pei ki pe devlope.

E alor avek sa mon ava termin lo sa note Mr Speaker. Mersi bokou.

MR SPEAKER

Mersi Onorab. Mon a propoz en poz la, pou ed nou resarze. Nou a rebran 4er.

(BREAK)

MR SPEAKER

Byen nou a kontinyen avek deba. Mon a envit Onorab Sebastien Pillay pou son diskour.

HON SEBASTIEN PILLAY

Mersi Mr Speaker. E bonn apre midi Vis-Prezidan avek ou delegasyon e bonn apre midi tou dimoun ki a lekout e ki pe swiv nou sesyon Lasanble.

Souvandfwa dan Lasanble nou ganny bann deba ki vreman enteresan. E nou ganny bann komanter ki osi enteresan e ki fer nou reflekte lo bokou keksoz ki nou tande.

E mwan lentervansyon mon pou prefes li avek bann keksoz ki mon'n tande avan ki nou pran deva lo sa Lalwa, akoz sa i al ver si oule leker, merit e prensipal zeneral ki sa Lalwa pou ganny enplimante anba la.

Me osi bann keksoz ki mon fek tande, ki fer mwan reflekte lo bokou keksoz e lo bann desizyon e bann swa ki koman en pep nou'n fer, petet dan navite e petet atraver koreksyon, ki nou'n krwar serten keksoz pou dan en lot fason.

Premye keksoz Mr Speaker mon ti a kontan petet fer en refleksyon ler mon'n tande ki sa Lalwa ti pe vini an 2018. E ki li ti Gouvernman presedan ki ti sipoze komans sa Lalwa, ti pou vin devan Lasanble.

I enteresan Mr Speaker ki mon tann sa sorti kot en Onorab ki ti fermeman par deryer, oubyen bat lanmen ler nou ti deside pou nou blok Bidze *DICT* a en moman ki sa bann *staff* ti pe fer en travay difisil.

A en moman difisil dan en letap nou pei osi, zot ti deside blok Bidze *DICT* e Vis-Prezidan ti enn bann Manm Lasanble sa letan. Me ozordi nou'n vwar poudir sa bann teknisyen pe fer en bon travay. So i byen parfwa nou fer sa meakoulpa.

Dezyenm keksoz se ki nou'n ganny dir poudir i en nouvo Gouvernman ki bezwen kontiny sa program. Me kestyon fondamantal ki ou Seselwa ki pe ekout mwan la, se eski ou ti elekte en Gouvernman *LDS* pou enplimant en program Gouvernman *United Seychelles*?

Akoz se sa ki'n ganny admet par Onorab Henrie atraver ou Mr Speaker, ki *no less than* Sekreter Zeneral Parti *LDS* ozordi in admet ki zot pe enplimant program parti *United Seychelles*, letan i ti dan Gouvernman. Se sa ki i ti pe ganny i ozordi.

Pa ankoler ou'n koze mon'n ekout ou. I annan en kantite keksoz ki nou bezwen reflesir lo la. E sa i bann keksoz ki nou'n tande la apre midi ki'n ganny dir.

Nou'n osi ganny dir ki i annan serten endividi Manm Onorab in admet ki li i kapab pey 2 servis. I pey en servis *Intelvision* e i pey en servis *Cable and Wireless* e pour kwa pa nou komans pey en servis *SBC*?

Mon pa konnen deza sa pep pe soufer avek sitan kantite presyon finansyel e ou koman *MNA* oule met ankor enn lo li. Mon demann mon lekor ki kantite konekte nou konekte avek sityasyon nou pei ozordi?

E sa Lalwa i pas dan sa konteks, dan sa largiman ki nou pe fer otour sityasyon ki nou pep i ladan ozordi. E mon'n ekoute - mon'n ekout le 2 premye entervenans ki'n konsantre zot lentervansyon lo en baz plito teknik dan sa Lalwa.

E zot in war zot bann pwen opoze dan en largiman plito teknik. Dan plas sa enn ki'n vin apre ki li in sey fer largiman politik, me ki mon krwar in *fail* mizerableman pou fer en largiman politik e mon pou eksplik li akoz in *fail* pou fer en largiman politik otour sa Lalwa.

Premyerman Mr Speaker, sa Lalwa in vin dan en konteks kot Prezidan Larepublik in vin devan nou e dir ek nou koumsa poudir i annan bokou sabotaz dan nou pei. I annan bokou trenn lipye e sa size *cybercrime* in vin en size ekstrememan enportan pou li. E sa ki dimoun i dir fer, e panse, i en keksoz ki al drwat o bi bann keksoz ki konsernen avek.

Enteresan e sa Lalwa ki la le nou lir li dan son totalite i pe konpoz kreasyon en Komite ,en antite ki pou ganny apwente par *no less* par Prezidan li menm an eksklizivite!

Se Prezidan ki pou apwent sa Lotorite ki pou *regulate* kominikasyon dan nou pei an eksklizivite! *There would be no check* - napa person ki pou kapab kontrol son pouvwat pou apwent dimoun ki li i anvi lo sa Komite.

E zisteman ki mon krwar ki pou ganny fer, baze lo sa ki in dir nou dan son ladres lo Leta nou Nasyon, se pou kontrol telekominikasyon dan nou pei! Se sa ki pou

arrive. I pa mon ki'n dir se Prezidan li menm ki'n koz lo la fason ki Gouvernman i bezwen egzers serten kontrol.

E an plis ki sa *Leader Zafer* Gouvernman dan Lasanble, ti admet ki zot pou servi zot 2 tyer mazorite pou fer pase sa panse annan kontrol lo sa ki dimoun i dir dan nou pei. Se sa ki pe arive dan nou Lasanble ozordi! Se sa ki mazorite i oule fer avek nou ozordi bomaten, ozordi apre midi.

Annou regard bann fe ki parey i egziste dan sa Lalwa par egzanp. Premye fe Prezidan in dir ek nou koumsa poudir bokou *Board* e bokou antite pe trenn lipye malgre ki pandan sa pres 3an ki in o pouvwar li ki'n apwent la mazorite dimoun ki lo bann *Board* e lo bann antite.

Ankor en fwa se Prezidan ki pou al apwent tou bann dimoun ki pou lo sa *Board*. Be ler sa *Board* pou trenn lipye oubyen keksoz pou ganny fer lekel ki Prezidan pou blanmen?

Se pour sa rezon ki dan mon repons mon ti dir ki si i ana en dimoun pou blanmen dan lafason ki lenplimantasyon bann keksoz i ganny fer *it will be the President* li menm, akoz se ki liki pe fer sa bann lapwentman an konteks avek sa bann Lalwa. E sa seksyon Lalwa i kler.

Me dezyenm keksoz ki primordyal e ki montre en dekoneksyon dan lafason ki nou pe panse ozordi, nou koz lo en Lotorite ki sipoze endependan. Me se eski nou'n lir Lalwa?

Seksyon 7 sa Lalwa i koz lo Minis pou donn direksyon sa Lotorite ki sa Lotorite i bezwen *comply* avek. Me seksyon 151(7) sa Lalwa i dir sa *Board* i ava *regulate* son bann prop prosedir. Ki kalite lendependans ou annan kan se Minis ki pe donn ou direktiv?

Oli lendependans sa *Board*? Mon pa vwar sa i endependan. E lekel ki Minis ki responsab pou telekominikasyon? Se No.2 dan nou pei Vis-Prezidan.

Alors mon ti a kontan Lepep Seselwa i sey konpran ki mon pe sey dir zot ozordi apre midi. Pou mwan sa i montre en lenterferans direk ki Leta i oule annan dan bann servis telekominikasyon.

Me i al pli lwen, si nou regard bann definisyon an sa ki konsern bann kominikasyon elektronik, sa i enkli osi bann *podcast* oubyen sa mon annan en legzanp la sa radyo la ki sa msye la (dir mwan son non)

manner i apele sa msye Mr Sullivan Onorab Larue i konn li byen atraver ou Mr Speaker.

Ki Mr Sullivan i fer le mon gete sa msye pou bezwen aret fer son radyo. Akoz baze lo sa ki pe ganny dir lo sa Lalwa, i pou pe lotreman oubyen i pe al kont sa bann prosedir dan sa Lalwa.

Me sa ki li i pe fer se en legzersis dan son *free speech*. Alors eski tou dimoun ki pe fer legzersis dan *free speech* dan nou pei, pou bezwen aret *exercise* zot *free speech*?

E se sa Lalwa ki prekoniz atraver son bann diferan lofans ki kree, ki dir ou anba seksyon 147 kwa ki sa bann lofans e kwa ki *constitute* bann telekominikasyon, ki enkli dan diferan laform, *moving pictures*, *still pictures*, parol ki ou pou dir lo sa ki ou pe fer koman en *broadcast*.

Oubyen atraver lezot metod kominikasyon elektronik. E pou ou fer sa ou bezwen ganny aprouvasyon en Konsey ki Prezidan Larepublik li menm ki pou apwente. E Prezidan in fer kler poudir li i annan en problem ek sa ki dimoun pe dir, alors i pou *allow* en dimoun ki oule fer son *free expression* pou fer li?

Nou bezwen regard byen konteks. Me si nou regard lezot seksyon sa Lalwa pou nou konpran en pti pe pli byen kote pouvwar Lotorite i antre. Nou a konpran en pe plis kwa ki mwan mon pe koz lo la.

Par egzanp dan Seksyon 90. Seksyon 90 i koz lo en dimoun ki santi ki i annan en alegasyon - en alegasyon ki en dimoun in fer en keksoz kont li atraver *means of electronic communication*. En alegasyon. Enteresan sa - en alegasyon.

Me sa ki vin enteresan avek Seksyon 90, se sa bout kot sa bann antite ki pe *provide* sa servis pou bezwen devlop kapasite pou fer lentersepsyon *electronic communication*.

Savedir sa bann antite pou bezwen devlop en kapasite pou entersepte mon kominikasyon elektronik ki sa i enkli en *mobile carrier*, ki sa i enkli mon kominikasyon atraver *internet*. Akoz i pou bezwen dan Lalwa i dir li i pou bezwen annan sa kapasite akoz dan lenstans ki Lotorite pou vin rod sa lenformasyon ek li i pou bezwen kapab *provide*.

Savedir mon bann telekominikasyon mon bann keksoz pa prive. I pa *private*. Akoz ler nou regard bann definisyon malgre nou, nou pe regard zis teknikalite dan

lenplimantasyon sa Lalwa, sa bann definisyon i *open-ended* dan lesans ki i kre kondisyon pou en antite kapab ozordi Sesel entersepte mon kominikasyon. E la se Leta ki pou determinen atraver kondwit son bann Lazans ki annan an plas son bann Lazans sekirite, lo si mwan mon pe komet en lofans.

Be mwan sa ki mon war tou dezyenmman mon napa okenn, okenn lanvi *trust* Leta avek mon telekominikasyon. Mon napa. Se pour sa rezon ki mon krwar poudir dan en konteks ki nou pe viv aktyelman, ti devret annan - ti devret annan en *checks and balance* pou asire ki Leta napa kontrol total lo sa ki pe ganny fer.

Me nou bezwen apresye en keksoz - nou pe viv dan en Sesel ozordi kot nou fer bokou keksoz, san ki nou mazin en ki mannyer sa i kapab annwi nou sitwayen. Ler nou regard anba Seksyon 8 an sa ki konsern lenformasyon konfidansyel e ki mannyer sa pou ganny retenir anba sa Lalwa?

Ankor enn fwa mwan mon konsernen ek pouvwar Leta akoz ozordi mwan mon santi poudir Leta i annan kontrol Lasanble Nasyonal. Mon santi poudir Leta *apparently* i paret i annan kontrol Zidisyer. E alors i kapab servi tou son kontrol lo bann antite Leta pou li rod lenformasyon lo nenport ki endividi ki i santi i devret rod lenformasyon lo la!

When the State has so much power lekel ki pou vin en *checks and balance* lo son pouvwar? Si ozordi Mr Speaker en lasezi drog nou pa kapab war kot in ganny fer, i pa kapab ganny rikorde e nou ganny dir 3mil met anba lanmer, ki mannyer nou kapab trust Leta avek nou lenformasyon konfidansyel e lenformasyon elektronik ki nou pou esanze avek lezot endividi?

Sa i en konsern mazer ki nou bezwen regarde. Akoz sa Lotorite ki nou pe kree i en *super entity!* I en Lotorite avek bokou pouvwar. Me sa ki mon konsernen avek parey mon'n dir lo komansman se, refleksyon ki Minis prezan i retenir en pouvwar sibstansyel dan direksyon ki sa Lotorite pe ganny pran.

Mon'n ekout Onorab Hoareau Vis-Chairman Bills Committee mon ti ava'n apresye tande ki si nou pe koz lo en Lotorite Endependan, ki sa pouvwar ki Minis i annan pou donn direksyon sa Lotorite i ganny *tempered*. Me par kont sa pa'n ganny fer,

akoz lentansyon Gouvernman se zisteman pou annan en Lotorite ki kapab kontrole.

Prezan annou vin lo seksyon 128. *Ok*, i annan en morso ki koz lo "*prohibition of broadcasting service any matter which prejudices public interest.*" Lekel ki pou fer sa determinasyon of *public interest*? Se Leta. Eski senserman ozordi nou pou *trust* Leta? Kan i pou fer son determinasyon of *public interest*?

Dan lepase nou tou nou realize poudir Konstitisyon in fer son mye pou asire ki *public interest* i ganny serten definisyon, en serten paramet legal ki kontrol li.

Me malerezman ozordi nou vin ek en Lalwa e kominikasyon i a labaz nou *freedom of speech*, akoz nou tou nou servi bann metod oubyen nou ganny lenformasyon atraver bann *means* ki *provide electronic communication*. Atraver *broadcasting*, atraver lezot metod.

E enn bann *Clause* dan sa Lalwa ki enteresan, se sa enn ki koz lo pandan letan ki annan en size nasyonal - en *issue of national urgency* or en size dan *national interest* Leta i kapab pran kontrol tanporer. Leta i kapab pran kontrol tanporer bann antite ki pe fer *broadcasting* oubyen pe donn lenformasyon.

Savedir Leta ki pou dir nou ki mannyer nou devret ganny lenformasyon, si i annan en dezas si i annan en keksoz ki'n arive. Dan lezot pei napa sa. Par egzanp Lanmerik ler i annan en dezas *CNN* i ganny drwa raport dan son fason, *Fox News* i raport dan son fason.

Me Sesel nou, nou pe dir se Leta, Leta i kapab pran kontrol. Savedir pou annan en kontrol lo lenformasyon ki nou pou gannyen vizavi keksoz ki pe pase. E i deza pe arive, kot i annan kontrol lo lenformasyon ki nou pe gannyen koman manm piblik lo serten keksoz ki pe pase!

Mr Speaker mon krwar i annan serten keksoz ki nou bezwen seryezman armonize avek lafason ki nou pe panse ozordi e si nou oule koz lo laliberte lekspresyon dan nou pei. E mon krwar nou bezwen *être* realis poudir ki nou pei a sa moman nou annan nou en sistenm laliberte lekspresyon ki ancor pe grandi. Me i pa ancor ni grandi oule anmar son lipye?

I pa byen. E mon pa konnen akoz Lasanble i krwar poudir akoz Gouvernman avan ti'n anmenn sa Lalwa zot bezwen

enplimant programn Gouvernman avan. Sa zot ki pe dir wi, be eski Lasanble pou pe fer zistis pep Seselwa ozordi si nou les sa Lalwa pas parey i ete *without* en *checks and balance*?

E mwan Mr Speaker mon pa an faver bann prononsman dan bann Lalwa ki koz lo bann regilasyon, ki bezwen ganny fer par Leta ozordi akoz mon pa *trust* bann regilasyon ki Leta i fer.

Par egzanp regilasyon pou bann *boat owners* an sa ki konsern lasirans e bann pti bato. Leta i mont lo televizyon i fer gro programn, i koz lo sa ki pe pase apre i dir in bezwen *repeal*, me letan ou demande i dir personn pa konnen lekel ki'n fer regilasyon atraver relasyon ek sa bann bato.

E prezan mwan mon sipoze sispekte en regilasyon mon pou vwar li aparet devan Lasanble. E pou mwan sey anpes li pase, mon pou bezwen vin lager avek Speaker Lasanble Nasyonal *on whether the matter is of urgency or not! This is not acceptable!*

we are- Nou pe zwe avek laliberte lekspresyon e Vis-Prezidan parey son labitid i kapab dir mwan poudir mon vwar sa akoz dan Gouvernman avan ti annan. Me li i ti en O Zofisye dan Gouvernman avan li. I ti la li.

Mon pa'n zanmen ariv sa nivo ki li i ti ete dan Gouvernman avan. So in parmi bann gran, gran diskisyon ki'n pase en pe partou, partou. I konn byen bann keksoz ki'n pase li.

Mwan sa ki mon oule met devan Lasanble *ok*, mon war *Deputy* Speaker pe anvoy mesaz Vis-Prezidan Mr Speaker, mon war zot pe konsilte konmsi. Enteresan. Mwan mon konsernen- mersi Mr Speaker. (Ki fer rann dra?) *Sorry* mon pa'n konpran.

Mr Speaker mwan mon konsernen avek serten propozisyon dan sa Lalwa ki pe met tro bokou kontrol dan lanmen Leta Sesel ozordi. E mon santi poudir *without* bann *proper checks and balances*, *without* bann Lotorite ki kapab fer zot travay san lenterferans then nou dan en problemn.

Rezon mon dir sa Mr Speaker, set akoz si ozordi pou *Ombudsman* avek *Bar Association* i kapab anmenn en *case* Ankour kot menm Zidisyer i oule blok sa *case* pou vin Ankour, *apparently* i paret, be mon annan en problemn.

Akoz napa personn apard ki Lasanble Nasyonal ki kapab koz lo la. Me avek en mazorite absoli lo kote Gouvernman,

mon pa pe vwar lekel ki pou vin en *checks and balance* pou Gouvernman, apard ki nou Lopozisyon ki bezwen lager *tooth and nail* pou nou kapab fer en keksoz pase.

So mon krwar poudir i bezwen retourn lo *drawing board*. E pou nou kapab ganny en fason kler, en keksoz ki ganny eksplik e ganny dir avek nou, ki mannyer bann pouvwar ki nou pe donn Gouvernman Sesel ozordi sa L'Egzekitiv ki la, pou ganny mezire, pou ganny servi dan en fason ki pa a vin en vyolasyon pou bann Drwa Konstitisyonnel ki ou bann sitwayen i annan.

Se sa ki nou bezwen konsernen avek apriyori Mr Speaker. Akoz *otherwise* ler ou pe dir mon anba Seksyon 92 ki ou pou annan *storage of traffic data* ou pou annan *storage of* lenformasyon ki mwan mon annan, e ki demann letan i annan akse ek mon lenformasyon, kwa ki dir ki Leta pa pou rode kwa ki'n ganny dir sa ki'n ganny fer akoz mon enn son oponan politik?

Mon konsernen Mr Speaker, akoz se sa ki pe kre kondisyon ki pe kre sa later mou pou fer sa kalite plant, mannyer lagrenn reglis parey *Leader* Zafer Gouvernman ti dir pou pouse. E sa i danzere pou nou pei Mr Speaker.

So alors mon krwar i bezwen annan en lot prosedir ki nou bezwen fer, pou nou regarde ki i pe vin devan nou devan Lasanble egzakteman e ki mannyer nou Gouvernman pou enplimant sa?

E mwan apriyori mon pa dakor ki Prezidan ki pe apwent sa *Board!* E dan lepase menm si nou'n lager pou sa, lo kote *LDS* mazorite i toultan vot an faver sa propozisyon pou Prezidan apwent tou *Board* me apre nou tann konplent ki bann *Board* pe trenn lipye. So mon konnen lekel ki responsab me mwan mon pa dakor ek sa.

Dezyenmman mon pa dakor ek Minis ki i pou donn direksyon en antite ki annan pou fer ek telekominikasyon. Akoz par lepase tou bann Parti Lopozisyon enkli *LDS* e enkli *SNP* pa'n zanmen an faver ki Minis lenformasyon i annan kontrol lo okenn antite ki Leta ki annan pou fer avek regard bann antite oubyen bann lorganizasyon i annan pou fer oubyen *broadcast* okenn lenformasyon.

Akoz ozordi lemond teknoloji in evolye. E mannyer mon regard sa Lalwa mannyer nou pe koz lo *electronic*

communication, sa definisyon i gran. Nou pe koz lo tou kalite keksoz la. E nou pa kapab *afford* la pou nou fer en derapaz lo kot nou'n arive ozordi Mr Speaker.

Mr Speaker nou bezwen pran konsyans 2 keksoz dan Lasanble Nasyonal. I nou rol pou protez lentere pep Seselwa. E i nou rol pou asire ki sa ki ganny fer dan Lasanble i dan lentere pep Seselwa. Sa Lalwa ki mannyer in ganny ekrir avek bann propozisyon ki ladan.

Teknikman i annan keksoz ki korek, me par kont son lenplimantasyon avek bann lezot eleman Polisi ki'n antre dan sa Lalwa i pa bann keksoz ki nou kapab dakor avek ozordi a sa moman. E se pour sa rezon ki mon kapab krwar ki ozordi sa Lasanble i devret vit an faver tel Lalwa.

Unless, ki i ava annan bann sanzman mazer ki ava ganny propoze dan lafason e lendependans sa Lotorite ki pou *regulate* e kontrol bann antite ki pou fer bann *tele broadcasting*, *broadcast* oubyen pas lenformasyon elektronik oubyen *provide* platform pou pas lenformasyon elektronik.

Si sa pa arive Mr Speaker *then* mon pa war rezon akoz ou devret vot an faver sa Lalwa.

Mon konklizyon Mr Speaker - mon konklizyon i senp, si ozordi Mr Speaker i komans vin difisil pou en parti politik ganny en *Live Press Conference* parey i ete lanmerik, Langleter, Moris en bon pe pei SADC i fer koumsa avek nou *broadcaster* nasyonal, pou mwan nou annan en problemn serye dan nou pei.

E sa zafer i en *case* Ankour *so* i en *matter* ki *subjudice*. So mon pa anvil dan plis detay, me selman nou annan en problemn serye.

Alors nou'n bezwen regarde ki mannyer nou fer sir poudir ki ankor enn fwa nou pa may nou lekor zanbet, pou met en Lalwa an plas e kre en Lotorite ki pou annan sitan kantite pouvwar e pou kapab fer sitan kantite aksyon anba kontrol en Minis.

E ki *no less* parey mon'n dir dan sa konteks i Vis-Prezidan ki No.2 dan Gouvernman ozordi aktyel. So sa i bann rezon ki nou lo sa kote latay nou pa pou siport sa Prozedlwa ozordi.

Be i annan en lot keksoz ki'n ganny dir Mr Speaker, mon ti a kontan fer en pti refleksyon lo la. Ou konnen i annan en refleksyon ki ganny fer ki'n ganny fer ki koz

lo bann *allowances* ki tonm anba mon lofis, napa problemn Mr Speaker si zot oule pran zot pran.

Me nou kapab osi pran bann lezot *allowance* bann palto, ledan, linet. Nou kapab osi pran en pe *allowance* ki ganny servi pou bann *travel*. E la nou ava kapab ganny larzan pou donn *SBC House* ou a note pa mwan ki'n komans sa.

Petet si Prezidan i aret *travel*, nou pran en pe sa larzan *travel* nou met dan *SBC House* i a kapab bouz pli vit. Me selman Mr Speaker mon bezwen dir an pasan ki mon war i annan en dekoneksyon.

Akoz Prezidan Larepublik ti dir nou poudir byento nou pou al fer en nouvo lopital. E pou fer en nouvo lopital in deza annan en miting avek bann *staff* dan Minister Lasante ki ler *SBC* i bouze zot pou bouz anler Hermitage.

Si Onorab Henrie Sekreter Zeneral *LDS* pe dir ek mwan ozordi- in dir poudir napa larzan pou donn *SBC*, ki mannyer alors administrasyon lopital pou bouz Hermitage si Gouvernman *LDS* pa pe met larzan pou zot bouze pou *SBC* bouz dan *SBC House*?

Ou vwar, mon krwar i annan keksoz ki ganny dir dan Lasanble par ler nou pa realize ki nou dir. So Mr Speaker avek sa mon ti a kontan dir avek bann teknisyen serten teknikalite zot Lalwa sert i byen, akoz i al avek tandans modern.

Be sa bann Polisi ki sa bann teknikalite i al anba la bann kreasyon bann Antite ki pou fer sa bann teknikalite ganny enplimante oubyen fer li marse ozordi mannyer leta Sesel i ete nou pa kapab war nou pe siporte. Mersi Mr Speaker.

MR SPEAKER

Mersi Onorab. Laparol i aprezan al pou Onorab William.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker permet mwan fer sa de pti komanter avan ki mon al direktaman lo *Bill*.

Premye komanter ki mon anvil fer se ki enn;- nenport dimoun sitwayen Seselwa ki vwar poudir i annan en Prozedlwa ki pe vyol son drwa, i annan drwa al devan Lakour Konstitisyonnel, premyerman.

Dezyenmman Mr Speaker nou *Standing Order* Lartik 72 i fer provizyon dan

ki fason bann amannman i kapab ganny fer atraver en *Bill* e i donn son kantite erdtan e i donn bann prosedir ki devret ganny sivre vizavi bann lamannman.

E Mr Speaker mon note ki napa okenn lamannman sibstansyel ki'n vin devan nou Lasanble sorti kot lot kote latab. So mon'n fer sa de komanter Mr Speaker pou met keksoz en pti pe dan konteks.

Mr Speaker lo sa Prozedlwa prezan, sa Prozedlwa i annan bi pou retir *Bill* Telekomunikasyon 4(19) ek en nouvo Lalwa ki fer provizyon pou en regilasyon konpreansiv pou reglemant e administre konpetisyon dan Lendistri Teknolozi, Lenformasyon e Kominikasyon.

Reglemantasyon efektiv sa sekter elektronik kominikasyon e *broadcasting* i nesaser pou zwenn bann lobzektif, plan nasyonal devlopman sosyoekonomik pei.

Mr Speaker ek en langazman, sa Gouvernman pou transform aktivite ekonomik Sesel, atir lenvestiser, fasilite nouvo tandans e panse dan sa vilaz global, sa Prozedlwa i annan son merit.

Dan lot mo sa Prozedlwa pe ganny propoze ver met pei azour ek devlopman dan sa sekter e lendistri ki pe arive globalman.

Sa Prozedlwa i fer provizyon pou en reglemant servis telekominikasyon elektronik, servis *network* telekominikasyon elektronik e *broadcasting* e fer provizyon osi pou en rezim teknolozi kominikasyon e lenformasyon.

Mr Speaker ler nenport transformasyon pe arive ouswa pou arive, i bezwen annan nouvo Prozedlwa ouswa lamannman pou siport sa bann sanzman dan fasilite servis ouswa itilizasyon nouvo prodwi teknolozi parey dan kad sa Prozedlwa.

Mr Speaker i fer provizyon osi pou administre resours tel parey *spectrum* frekans radyo, nimerotasyon kominikasyon elektronik, tou ki annan pou fer ek laspe kominikasyon elektronik e lezot size dan sa *genre* ki pe ouswa kapab ganny itilize.

Sa Prozedlwa Mr Speaker i osi definir pouvwar e fonksyon ant pozisyon Minis e sa Lotorite, dan konteks en desizyon Minis koman sa Lotorite. Minis pou desarz fonksyon stratezi Polisi, fer regilasyon e lareg fonksyon pou *broadcasting* e Sekter Kominikasyon Elektronik.

Sa Prozedlwa pe osi fer provizyon pou etablisman en Tribinal kominikasyon pou dil ek bann lapel kont desizyon ki Lotorite in pran. Tribinal pou osi responsab pou determin e enpoz penalti pou kontrovansyon e lofans.

Sa Prozedlwa pe fer provizyon pou konsonmater ek drwa portabilite telefonn mobil e telefonn fiks e met lobligasyon lo operater pou okenn *Scheme* limero portabilite. Sa Prozedlwa Mr Speaker i form parti 24 seksyon;

Premye, i konpri tit lenterpretasyon e aplikasyon sa Lalwa.

Dezyenm, se pou pouvwar e fonksyon Lotorite e pou Minis.

Trwazyenmman, pe apel kont tou bann desizyon.

Katriyenmman, se kalite *license* ki pou ganny donnen.

Senkyenmman, sa konpetisyon zis ki ganny kouver anba la.

Seksyon 6 se proteksyon konsonmater.

Seksyon 7 se enterkoneksyon ant bann operater.

Seksyon 8 i pe donn governans avek akse.

Seksyon 9 se pou travay konstrikasyon e akse ek teren e fasilite prive ek piblik.

Seksyon 10 i kouver laspe tarif.

Seksyon 11 i kouver ladministrasyon lenformasyon personnel e proteksyon *privacy*.

Seksyon 12 i koz lo akse iniversel e provizyon servis iniversel.

Seksyon 13 Mr Speaker i koz lo ladministrasyon *spectrum* frekans radyo.

Seksyon 14 i kouver ladministrasyon limero sant lenformasyon non e ladres.

E seksyon 15 i koz lo standar e teknik.

Seksyon 16 i kouver servis *broadcasting*.

Seksyon 17 i kouver rezolisyon konfli.

Seksyon 18 lenpozisyon penalti Mr Speaker.

Seksyon 19 sanksyon e ranforsisman Lalwa.

Seksyon 20 lofans e penalti.

Seksyon 21 i kouver Lotorite *Board*.

22 finansman, kont e rapor.

Seksyon 23 Tribinal e kominikasyon.

E dernyen seksyon 24 i koz lo bann lezot size.

Finalman an konparezon ek meyer lezislasyon an pratik, Prozedlwa pe konsider sanzman pou asir lazistis, lefikasite e konpetisyon soutenab anver sa kalite marse ozordi avek devlopman.

Mr Speaker sa Prozedlwa mon konstate pou fer operater ki pe ofer servis pou etabli standar e mentenir standar.

Piblik deor ki pe ekoute e Manm isi dan sa Lasanble a dakor ki standar i manke lo serten bann lenfrastriktir e lekipman transmision dan distrik, kot nou pase nou vwar en dezord total dan la fason serten laliny tele kominikasyon ki i anpandan diferan oter e i annan serten ki ater.

E mon espekte ki letan sa *Bill* i pase, sa bann standar ki pe ganny egzize i ava ganny transformen avek *PUC* osi tou ki met bann poto.

Mr Speaker mon panse osi ki konsiltasyon antre bann *service providers* a osi angaz *PUC* e *Land Transport* pou lev zot standar lo zot bann poto ek bon mazorite in kabannen pe pouri e zot en menas pou lavi avek propriyete prive ouswa piblik.

Mr Speaker dan sa monn modern Sesel i bezwen bouz devan e tou byen anba sa lespri e dezir senser pou anmenn transformasyon dan Sesel e priyorite bann sekter kle tel parey dan teknolozi e servis telekominikasyon ek lenformasyon.

Avan mon terminen, mon anvi ganny pwennvi *panel* lo sa eleman proteksyon drwa endividi ki pe servi serten lekipman e *service provider* ki ganny prodwir dan serten pei tel parey *La Chine, Korea* e lezot pei e bann lakonpannyen Les Lazi.

Mon anvi ki zot asir nou ki bann risk potansyel pou ganny sivre ek teknisyen osi lokal pou ganny bann *training* ki zot reste azour sirtou avek sa *cyber threat*.

Mr Speaker avek sa de pri mo, mon ti a kontan reasir Vis-Prezidan ki mon pou donn sipor sa Prozedlwa aköz Sesel i bezwen transformen. E si ou pe regard anba bann *goals SDGs* Mr Speaker Sesel napa swa.

Me dan modernizasyon i pou toultan annan sanzman. I pou toultan annan bann nouvo Lalwa ouswa bann amannman ki bezwen ganny fer. Mersi.

MR SPEAKER

Mersi Onorab. Mon ava apel Onorab Flory Larue.

HON FLORY LARUE

Bonn apre midi Mr Speaker. Mersi Mr Speaker. Bonn apre midi Vis-Prezidan avek ou *panel*.

Mr Speaker mon'n tann en Onorab ki'n koze avan mwan lot kote latab ki'n koz lo lager, *Press Conference live* avek *SBC* ki sa i Ankour.

Me i annan lezot stasyon televizyon ki on krwar sa parti lot kote ki minoriter, i kapab aproz pou sey fer pas zot *Press Conference* ki plen avek en kantite keksoz ki Seselwa i anvi ekoute mon asire. Alor si i ti kapab apros zot mon krwar ti ava en bon *advice* ki ti kapab pas *live* lo sa *channel*.

Mr Speaker devan nou, nou annan en *Bill* avek plizyer paz i ase gro e i sa teknik. Se pour sa ki nou annan sa group dimoun devan ki bann teknisyen dan sa *field*.

En lot referans ki'n ganny fer avek sa *panel* i lo kote *DICT* ki nou'n tande ki nou koman en parti dan Sizyenm Lasanble nou ti blok Bidze *DICT* e an relasyon avek sa Mr Speaker i ti pirman avek en ka spesifik ki ti arive.

E letan *screensaver* Prezidan ti aparet lo tou *computer*, dan tou biro ti annan serten dimoun ti santi zot in ganny afekte par sa. E sa ti ganny pase dan bann letan ki nou it pe fer kanpanny e ti en labi pouvwar sa parti ki ti o pouvwar, pou servi zot Lotorite pou kontrol tou *computer* dan biro piblik.

Alor annou pa distort laverite an dizan ki letan nou ti blok Bidze nou ti fer li aköz nou pa ti kontan *DICT* e nou ti annan problem ek teknolozi e bann lezot kalite leksplikasyon, ki nou ganny donner letan zot koz lo blokaz Bidze *DICT* ki ti pase dan Lasanble.

Mr Speaker letan nou pe get sa *Bill* nou pe get lo modernizasyon ki mannyer nou pou moderniz nou pei, dan i mannyer nou donn sa servis. E i en sekter ki bokou dimoun i servi ozordi teknolozi i form par nou lavi toulezour. E i en keksoz ki nou bezwen koman en pei donn li son lenportans dan lavi Seselwa.

Ozordi sa lezislasyon ki deva nou, i pe adres en Lotorite ki pou ganny formen spesifikman dan sa Lalwa. Me parkont Mr Speaker sa Lalwa i fer kler ki i pe regiliz bann operater. Dan parti 4 sa Lalwa, nou vwar ki

i dir nou i pou *regulate* bann *operators* e dan klarifikasyon bann mo en operater i vedit mon pou lir li an Angle Mr Speaker parey i aparet dan *Bill*.

I dir nou "*any person*", savedir nenport dimoun ki ganny en *license* ki'n ganny *granted* anba sa Lalwa en dimoun ki'n ganny en *license* anba sa Lalwa pou li konstrir *deplway*, *mentyen*, *annan propriyete* "*own and operate an electronic communications network or electronic communications network facility.*"

Sa Lalwa i aplik pou sa bann dimoun koman en Antite ki en operater. Me non pa endividi ki servi telekominikasyon ouswa kominikasyon. Sa i en premye keksoz ki mon santi i ganny distorte lot kote latab, letan in dir nou ki sa Lalwa pou aplik avek endividi dan en serten lot konteks.

Mr Speaker bann servis ozordi bann *services*, bann *network*, bann *operators* ki nou annan ozordi i *Airtel* e *Cable and Wireless*. Koumsa Seselwa i kapab byen konpran ki kalite dimoun e antite ki nou pe koz lo la ki pou servi sa Lalwa e pou aplik pou zot.

Mr Speaker en lot keksoz ki mon'n bezwen fer referans avek avan ki mon kontinyen, i sa zafer *SBC House* e sa Bidze ki i pou koute. Mwan koman en manm *Media Youth Sport and Culture*, nou'n zwenn delegasyon *Board SBC* ki'n vin vwar nou pou demande dan bann letan Bidze lannen pase pou nou kapab fer en *plea* avek Gouvernman pou kapab trouv sa gro Bidze R30ekek milyon pou *SBC* kapab sorti *Hermitage* pou li vin la *English River*.

Mr Speaker annou pa distort laverite;- nou Gouvernman in erit *SBC House* ki ti ganny planifye sepa konbyen lannen pase, ti en monstrosite batiman, en gro batiman.

Sa i en antite piblik, i ganny zere avek larzan taks. Ozordi nou annan en nouvo Gouvernman ki met en kantite lanfaz ki mannyer larzan Leta i ganny depanse Mr Speaker.

E sa kou pou nou kapab bouz *SBC* dan sa nouvo *building* i vreman o e i pa'n kapab ganny mete dan sa enn Bidze ki'n pase. Gouvernman i konnen ki *SBC* i enportan e nou annan en fason ki nou regard li ki nou anvi donn li sa privez pou li bouze dan son nouvo batiman.

Me Mr Speaker letan zot ti planifye zot gro monstrosite, zot pa ti mazinen konbyen i pou koute dan larzan taks? Akoz sa keksoz i pa zwe larzan li, *SBC* i pa zer larzan. Alor letan i pa zer larzan, sa larzan i bezwen sorti dan pos pep Seselwa pou kapab bouz li dan son gro *building*.

Sa ki mon'n konpran Onorab Henrie in dir Mr Speaker, i ki lefe ki i annan bann *providers* kot ou bezwen pey zot e la nou pe koz *operators*, nou pa pe koz dimoun prive. Parey *Airtel* ek *Cable and Wireless* ki ou pey li en larzan tou le mwan, pou ou ganny televizyon kot ou akoz ou bezwen en pti pe pli kler ou ganny li kot ou.

Lo sa bann *channel Cable* avek *Intelvision* ou gannyen *SBC* Mr Speaker. *SBC* avek ou *set-top-box* ou kapab ganny li *free*. Sa ki mon pe konpran Onorab Henrie pe sey dir ki nou bezwen regarde si i annan en fason ki sa de antite sa 2 operater i pey *SBC* lefe ki li i sarz kliyan pou li kapab montre sa servis.

Alor sa i en kominikasyon ki kapab en fason ki nou kapab fer li zer larzan pou nou kapab bouz li dan son gro *building* ki nou'n erite, ki kot sepa konbyen milyon pou nou *maintain* li par an. Sa i en nide.

Olye donn nou solisyon Mr Speaker zot detourn tousala e apre zot dir ki Onorab Henrie in dir en lot keksoz. Alor sa mon krwar i en fason pou klarifye, akoz nou, nou'n zwenn.

E i annan Manm *Media and Youth Sports and Culture Committee* ki'n zwenn ki sorti dan *US* ki'n zwenn *SBC* ki kapab klarifye *Leader Parti Minoriter* pou dir li ki ti arive dan sa miting e kwa ki ti ganny diskite.

Mr Speaker an sortan lo operater mon'n tann sa menm Onorab koz lo *podcast*. Mr Speaker mon pa konnen ki *Bill* ki li i lir, mwan sa *Bill* ki devan mon ki mon'n ganny prezante sorti kot *Lasamble* avek 137paz mon'n rode *podcast*, *pod* mon pa war Mr Speaker dan sa *Bill* "*podcast*" mon pa war kot i pe target en endividi ki'n fer son *podcast* or nenport ki *platform* ki in servi.

So sa osi i en distorsyon pou kre limozite e mon non i ganny mansyonnen Mr Speaker konmkwa mwan mon zanmi sa msye ki'n fer son *podcast* ki en sitwayen Sesel, ki lib pou li dir sa ki i anvi - se sa ki mon krwar mon parti in lager pou don l son laliberte, se sa la demokrasi.

Me solman sa Lalwa pa aplik avek sa sityasyon. I pa ankor ganny bate, ni disparet i ankor pe asize byen trankil se li pe fer son *podcast*.

Mr Speaker parey mon'n dir sa Lalwa i pe fer referans avek operater. Alor i pa pe fer referans avek en sitwayen ki pe itiliz en platform tel ki *Facebook*, pou fer en seri program. Sa i dan en lot kad e non pa dan sa Lalwa.

Si i annan okenn Lalwa ki pe kase i ava dan en lot landrwa, me Onorab *Leader* Parti Minoriter pa pou vin rod li dan sa enn Lalwa. Al fer sa kankan en lot landrwa.

Mr Speaker en lot keksoz ki nou vwar dan sa Lalwa letan nou pe mazin kominikasyon, *well* nou pa vwar li dan sa Lalwa, i pa ganny mansyonnen. Me solman lefe ki nou pe koz lo telekominikasyon ek modernizasyon bann sistenm ki pe ganny servi pou kominike swa par telefonn, i bann sistenm 5G.

E sa i en keksoz ki'n ganny entrodwir ase resaman dan lemond depi dan bann lannen 2019 e pli ale i pe ganny servi bokou plis e i ganny dir ki i en keksoz ki pli vit e i fer ki nou bann lekipman ki nou annan i donn nou en servis pli vit.

Me parkont lefe ki nou, nou pe servi li isi Sesel, nou bezwen ganny en konpran ki savedir sa teknolozi. E la mon krwar ki sa *Bill* i bezwen kouver en kote ledikasyon pou kapab edik piblik lo lizaz sa teknolozi e osi sirtou kote ki sa teknolozi pe ganny de plwaye.

Akoz sa bann teknolozi i servi sa bann lema. E nou bezwen konnen ki son to ki i pe frekans ki i pe donner, ki son to. E ki son lefe i annan lo swa lasante swa lanvironnman lo kote zannimo dan lanvironnman, pou nou konnen si i annan en lefe e ki mannyer pou nou i fonksyonnen e a ki to i pe fonksyonnen. Mon krwar sa piblik i bezwen konnen.

Sa nou bezwen regarde si sa Lotorite ki pou gard en fason pou li oblize fer kek mezir e kek tes an mezir letan i pase. Alor mon ti a kontan ki *panel* i dir mwan si i annan okenn legzersis ki'n ganny fer depi le nou pe servi 5G Sesel pou dir nou si okenn sa bann tes in ganny fer e si osi zot kapab dir nou si piblik i kapab trouve kote sa bann eleman ki pe emit bann transmisyon 5G zot ete.

Parey mon'n dir ledikasyon i enportan, pour ki napa okenn bann lenformasyon ki ganny *misconstrue* e dimoun i konpran byen kwa ki zot pe antre ladan.

Sa bann lema i kapab ganny trouve obor bann landrwa rezidansyel e sa bann dimoun ki reste dan sa bann lanvironnman i bezwen osi konnen ki zistans kekfwa zot lakaz i ete avek sa lema e ki bann lefe ki i kapab annan - si i annan - lo zot lasante ouswa zot fason viv. E sa osi i en keksoz ki Lotorite i bezwen klarifye pou sa bann dimoun ki reste obor sa bann landrwa.

Letan nou pe get bann lokalizasyon kote sa bann fasilite i ete nou vwar dan parti 9 sa Lalwa ki i koz lo "*construction work and access to land and facility*" i donn nou dan seksyon 75 ek 76 lo bann klarifikasyon ki mannyer nou kapab ganny akse - ki mannyer bann operater i kapab ganny akse pou met zot bann lekipman - pou fer sa bann transmisyon pou nou ganny sa bann teknolozi.

Nou vwar ki poto elektrik in ganny nonmen par Onorab William. I ganny servi pour anmenn ba laliny telekominikasyon pa zis elektrisite. Me parfwa ou vwar ki i annan en dezord dan zot estetik.

E lefe ki nou en pei touristik, i en keksoz ki bezwen ganny regularize en pe pli strikteman. Akoz letan en lakord in anpandan lo semen pou sepa konbyen zour ouswa i pas vreman ba, i kapab en danze me solman i annan son kote estetik ki bezwen ganny regarde.

E si zot anvi lasistans piblik, kekfwa i ava en bon nide pou regarde ki sa bann distrik i annan en fason ganny idantifye swa par en kouler. Menm si i nwanr me solman en kouler a en serten zistans ki ou kapab war sa enn i rouz, sa enn i zonn, sa enn i en kouler nou a kapab konnen ki servis ki i pe anmenn.

Koumsa piblik i a kapab annan en fason pou fer kek rapor e i pli fasil. Akoz ozordi mannyer i ete ou *call* ou dir i annan tel poto, en keksoz i anpandan lo la, enn i dir ou pa li, lot i dir ou pa li, person pa konnen pour ki. So i en pe difisil annandler pou determinen ki mannyer pou met en lord dan sa dezord difil.

Lefe osi ki i annan sa *access to private land*, alor mon krwar se ki sa i ganny fer direktteman avek sa sitwayen me eski nou

bezwen al en pe pli lwen pou protez sa sitwayen letan i fer son lagreman avek sa operater, pou li annan kek fasilite, kek potou ouswa leman lo son later.

Sa nou pe koz lo kote lasante ankor si pou annan okenn lefe eski sa sitwayen i ganny serten *requirements* ki fodre i ganny dir ouswa i ganny donn e ouswa kek rapor ki bezwen ganny fer ase souvan, pou li kapab *update* son lekor lo sa ki pe pase ek son propriyete e sa lema ki i pe mete lo son propriyete.

Dan parti 11 sa Lalwa "*processing of personal data and protection of privacy.*" Nou vwar ki en manm in koze lot kote in koz lo lafreyer, ki i annan akoz i santi ki en kantite keksoz kekfw pou ganny fer dan fernwanr e pou napa *oversight*.

Mr Speaker nou tou nou konnen apre *TRNUC* ki nou'n tande osi dan listwar, ki nou pei in pas dan en kantite sityasyon kot ti annan vre lafreyer dan sitwayen, kot zot ti ganny ekoute, zot telefonn ti ganny ekoute.

Zot bann papye ti ganny pas ladan pou regarde, zot let, zot bann zafer ti ganny pas ladan pou regarde ki zot pe gannyen koman dokimantasyon. Zot lavi prive ti ganny get an detay par bann dimoun ki ti asize ti vey zot zakasyon kote zot ale lekel ki vin kot zot ki miting ki zot pe fer.

So sa bann lafreyer ti reel, me la sa lafreyer ki mon santi in ganny dir lot kote latab, mon krwar i en egzazasyon ki vreman pe ganny servi pou fer bann politik bon marse ki nou pa bezwen sorti dan sa pei.

Akoz letan nou anmenn en lafreyer nou bezwen en pe pli spesifik lo kwa ki nou per. Si nou per en keksoz nou bezwen spesifik dan sa Lalwa 300ekek paz nou bezwen kapab dir Seselwa kwa ki ou per ladan, ki laliny, ki bout, ki mo, pou nou kapab konpran kote ou lafreyer i sorti.

So sa mon santi i en pe egzazere. Me pou nou sey klarifye en pti gin nou pou pas ladan apre lo *Bill*, me selman la mon krwar ki *panel* i bezwen donn e pti pe latansyon lo sa kote sa bout Lalwa ki koz lo entersepsyon kominikasyon.

Dan 90 i dir nou ki sa Lotorite ki pou ganny formen dan sa Lalwa, letan i pe egzers son pouvwar i kapab fer *monitoring*, entersepte ouswa *stall* kominikasyon. Sa i dan 90(1).

Me Mr Speaker 90(1) pa ganny lir li tousel. En kantite fwa nou tan de ki en Lalwa i ganny lir antye. Dan parti (2) seksyon 90 i dir ou;

Letan en dimoun ki pe servi sa servis sa operater i resevwar en *threat* en dimoun in *threaten* li kot i pou servi vyolans kont li, ouswa en lot dimoun, ouswa si ou pe fer ekstorsyon ouswa en lot dimoun.

Sa dimoun ki pe ganny- ki pe servi sa i kapab demann son- Lotorite i kapab servi sa lotorizasyon pou kapab *monitor* sa bann-pou entervenir pou *monitor* sa bann keksoz ki pe pase avek sa bann keksoz spesifik. Alor Lalwa i spesifik lo ki mannyer Lotorite pou entersepte en *call* ou *monitor* en *call*.

Me sa i selman si sa dimoun ki pe servi sa operater i vin devan an ekrir e i fer demann en lenvestigasyon lo Lotorite ki konsernen pou fer sa lenvestigasyon.

Mon pa vwar sa distorsyon kot sak operater i bezwen al servi, al rod en serten group dimoun pou vin *investigate* ki pou *set up* en lot kalite sa ki'n ganny eksplike laba lot kote Mr Speaker. Mwan mon le lir li an nwanr ek blan mon pa pe war ki bor ki dir ki sa operater pou bezwen *setup* tou sa bann lezot keksoz ki zot in dir laba lot kote.

Dan parti 14 Mr Speaker nou vwar ki seksyon 119 i koz lo *number portability* e la dan sa ka nou war ki *number portability* lo kote son letan i pe eksplik nou son *meaning*, i dir nou ki i abilite sa dimoun ki pe servi sa servis pou li kapab retenir son limero letan i bouz avek en lot operater.

Me mon ti a kontan demann *panel* si zot ti a kapab klarifye si sa osi i kapab enkli bann servis ki entern dan en lot pwen operater. Par egzanzp si ou avek en operater ki donn servis *prepaid*, me ou'n servi sa limero *prepaid* pou plizyer letan.

Me solman prezan ou anvi fer li vin *postpaid* eski sa i osi *what you mean by number portability?* Eski i pou *service* sa servis sa *package*, ki pou kapab *allow* ou pou *alter* sa *package* ki ou lo la pou li vin en *prepaid to* en *postpaid within* sa servis sa operater. Eski sa i *also mean number portability* lo kote kliyantel, eski i pou enkli sa?

Dan parti 16, nou vwar bann i apel bann *broadcasting services* dan seksyon 134. I dir nou ki bann operater in bezwen edik son kliyan lo bann prosedir konplent. E sa mon krwar i en bon keksoz ki nou vwar

dan sa Lalwa, ki fer ki en operater i oblize met devan son kliyan ki i kapab anmenn en konplent ver li.

E si li koman sa operater i pa fer naryen avek sa konplent sa dimoun ki pe servi sa servis i kapab al kot Lotorite e fer en konplent kont sa *broadcasting service operator* pou li ganny en remed si son konplent pa'n ganny *entertain*. E sa mon krwar i byen ki sa operater i ganny forse pou li edik son kliyan dan sa fason.

Mr Speaker mon'n tann osi *Leader Lopoziyon* dir nou ki parey Onorab William in dir i annan en ta problem avek sa *Bill* 100ekek, 137paz. En kantite problem in nonmen, kantite lafreyer son Manm in nonmen napa ki zot pa'n nonmen Mr Speaker.

Mr Speaker nou Lasanble i en Lasanble serye, nou Lezislater, nou vin fer Lalwa. Lo sa kote latab bann Manm in al dan distrik zot i demann popilasyon pou donn zot en konfyans, en konfidans ki koman en parti e koman en dimoun zot pou reprezant zot e zot pou fer en travay dan zot lentere.

Mr Speaker en group laba ki *half* i proporsyonnel parey mwan menm, zot vini zot dir koumsa ki tou nou lentansyon pa bon, nou pe zwen kouk kasyet ek Seselwa, nou pa enterese avek- Mr Speaker sa bann kalite propagann koumsa sa bann kalite politik bon marse, son letan in fini sa, Seselwa in fatige avek sa Mr Speaker.

Nou annan en *Bill* ozordi sa kote pou en mazorite, in annan mazorite nou *Bill* pou pase nou asize nou'n lir li lo *Bills Committee*. E Manm in lir e nou vwar ki i kapab pase mannyer i ete. Si Lopoziyon pe fer son louvraz i telman pa bon, nou pou telman vin foy dan lavi prive Seselwa e napa ki nou pa pou fer Mr Speaker, be oli bann amannman?

Mr Speaker ozordi si zot fay lo zot kote lo kote *numbers* akoz zot pa al kot *Bar Association*? Ekrir en let dir *Bar Association*, "ou konnen, mon konnen dernyen fwa ou'n anmenn en *case* Ankour la, mon annan en *Bill* devan mwan mon pa tro konpran ki annan ladan.

Alor mon santi i annan en ta lafreyer-mon per." Akoz i pe demann *Bar Association* pou anmenn, pou get sa Lalwa pou li akoz zot pa tro konpran, donn zot bann amannman pou tir zot lafreyer apre zot ava anmenn tou sa bann amannman kot Lasanble apre nou a debat lo la.

Be Mr Speaker ou pa kapab zis vini vin fer bann gran, gran *statement* dan vid ou per, ou per kwa?

Sa Mr Speaker napa zis *Bar Association* Mr Speaker i annan *Human Rights Commission* osi in met son lipye ater in anmenn nou Ankour. Napa problem si i-Lakour i la i en demokrasi e zot in dir nou, nou pe manipul Lakour.

Mr Speaker zot ti kapab al kot *Human Rights Commission*, demann en pti rapor dir zot koumsa get sa *Bill*, fer en pti rapor pou mwan *US* mon fay, fay mon napa bokou nou, ed nou. Prezan zot ti ava anmennen, zot ti ava dir nou avek *backing Human Rights Commission* nou en pe fay, fay nou pa tro konpran ki annan dan *Bill*, nou'n anmenn nou propozisyon.

Nou pa war sa Mr Speaker!

Mr Speaker si nou, nou pe fer en louvraz pou pep Seselwa nou bezwen aret gognard zot, servi en bann parol ki fer Seselwa krwar personn pa konpran ki annan dan *Bill*, zis zot ki konpran. Nou, nou pa konpran, *panel* la devan pa konpran. *VP* in travay dan Gouvernman avan la i pa konpran naryen, akoz i dan sa Gouvernman.

Mr Speaker sa bann kalite komanter koumsa nou pa kapab kontinyen aksepte si nou dir nou serye, si nou dir nou vin travay pou pep Seselwa.

Si nou travay pou pep Seselwa *LDS* pe servi son mazorite pou pas en Lalwa ki pa bon ki bankal, anmenn sa ki bon, anmenn zot amannman lo sa 137 paz, dir nou kwa ki bankal kwa ki pa bon, kote nou pe fouye ki nou pa devret fouye. Ki lot pei i dir fodre pa fouye napa sa, premye fwa Sesel pe servi Lotorite pou fer-

Be dir nou kote i ete Mr Speaker! Sansan aret koze Mr Speaker! Arete koze in dir si nou napa naryen pou dir pa dir naryen! Mersi Mr Speaker.

MR SPEAKER

Mersi Onorab. Mon annan 2 manm ki'n lev lanmen apre premye *round*.

Alor mon pe propoze donn zot 15 minit e nou kapab termin deba ozordi. Mon annan Onorab Lemiel e apre Onorab Woodcock. Onorab Lemiel ou annan laparol.

HON SYLVANNE LEMIEL

Mersi Mr Speaker. Bonn apre midi Mr Speaker, *VP* avek ou delegasyon e tou

dimoun ki a lekout. Mr Speaker, devan nou ozordi, i annan en Lalwa 137 paz, ki letan mon regarde i anna bokou nou, lo tou lede kote latab nou'n koz lo la. Nou'n fer sorti nou pwen, si i bon, si i pa bon.

I toultan pou annan serten keksoz ki nou pou vwar dan Lalwa letan i vin kot nou, ki petet i annan son serten defayans. Oubyen ki ler in anmennen i annan de nou, nou war i byen, me kekfwa son defayans dan sa Lalwa i pa'n ganny fer sorti letan i ganny eksplike.

Alors i byen ki nou annan bann deba ki fran. Bann deba ki Manm i eksprim son lekor, ki i dir ki mannyer li i santi lo sa Lalwa. E ki petet napa personn de nou ki ofanse, akoz la fason ki serten nou bann Manm i koze e in eksprim li, e in dir kot son lenkyetid i ete.

So, akoz parfwa Mr Speaker, nou'n vwar i annan bokou Lalwa ki'n pase o paravan, ki par anba i pa'n al ase *in-depth* pou nou eksplik dimoun. Apre, ou tande pou dir en lot zafer ki monte. I zis parey sa Lalwa ki nou ti fer pase pou *Pension Fund*. Apre la nou war en lot *S.I* ki vini, in dir ki laz pansyon, laz sekirite sosyal bann dimoun in vin 65an i osi. E ler ou pe gete, i annan ki dir ti diskite, i ti dan Lalwa Fon Pansyon, kan i pa ti ladan. *Ok?* So, i enportan ki nou tou nou ekout kanmarad. Pa ganny kriz. Pa kriy welele.

(laughter)

HON SYLVANNE LEMIEL

Annou nou tou ekout kanmarad. Annou nou tou *share ideas*. Annou nou tou deliber byen lo en keksoz ki sa Lalwa devan nou i sitan enportan Mr Speaker. Nou pe koz lo en Lalwa ki pou moderniz kominikasyon dan Sesel. Pou nou vin *at par* avek bann Lalwa enternasyonal.

Mon pa dir i mal! I byen! I byen i annan bann keksoz parey. Me selman, ki nou devret gannyen la nou, letan nou koman bann Lezislater nou pe debat lo sa Lalwa. Petet *VP* ler in vin eksplike. *VP* in eksplik an gro li, akoz i toultan koumsa. *VP* pa pou al *in-depth* konmsi.

Par egzanp, mwan, ki mon ti pou kontan? Lepep Seselwa deor i tande dan leksplikasyon sa *Bill*. Dan bann enterpretasyon, si nou al byen. Ler ou pou get enterpretasyon kot i dir ou, *broadcasting*.

I annan diferan keksoz ki vin anba *broadcasting*. Wi bann dimoun ki dan telekominikasyon ek dan *broadcasting* i konnen ki pe dir. Be eski sa pti sitwayen laba, i konnen ki pe sey dir? Pa dir nou pe pran Seselwa pou bet. Seselwa pa bet li.

Nou ozordi nou osi, konbyen fwa nou, bann Manm Lasanble nou'n dir nou bezwen *form* parti dan edik sa pep deor i osi? Donn li plis lenformasyon. Akoz la letan ou pe get *broadcasting* li menm ki i pe enkli, ki petet mon pa pou al an detay, be i enkli en kantite keksoz. I pe koz ou *text*, i pe koz ou portre, i pe koz ou son, i pe koz ou diferan keksoz, *ok?*

Sa Lalwa nou konnen li menm i plis pou *broadcasting services*, apre telekominikasyon. So, letan nou pou al pli *in-depth*, ki mon pa pou pran bokou plis letan Mr Speaker, me kot mon santi i annan serten keksoz dan sa Lalwa ki petet la popilasyon deor i merit konpran en pti pe plis.

Akoz i annan bokou Manm la ki'n al bokou an detay. *Ok*. I pa sa pou fer repetisyon. Me selman kot ou pou al en pti pe pli an detay, an sa ki konser- Mwan mon konsernen ek sa Seksyon 90 an desandan mwan, en?

Entersepsyon dan kominikasyon. So, mwan mon santi ki sa bout ki annan en pti pe plis keksoz a fer avek piblik an deor, *ok*. Petet *VP*, letan ou pe fer ou *summing-up*, ou ava al en pti pe pli an detay lo sa Seksyon 90 an desandan, *or* bann seksyon ki tous plis ki lefe ki annan lo ou sa piblik an zeneral anba sa Lalwa.

Sa Lalwa mon santi osi ki, i annan en koneksyon avek sa *Cybercrime Act* ki'n pase. I annan en serten koneksyon avek kanmarad, ki si i annan en serten lofans, en serten keksoz *as an* endividi ki ou santi, sirtou mon telefonn, *whatever*, mon pe ganny en *text* ki pe *threaten* mwan.

So, i mon drwa petet anba sa Lalwa, kot pou mwan al kot sa bann dimoun pou mon fer zot konnen. E laba kot i annan en lenstriksyon kekfwa ki pou gannyen, ki pou dir. Be nou pou bezwen, avek bann aprouvasyon definitivman, nou pou bezwen entersepte telefonn Sylvanne Lemiel, pou nou regarde en pti pe sa bann *threat*, sa bann mesaz. Mon pou bat ou, mon pou touy ou, mon pou *whatever* ki mon pou fer ek ou. Si ou pa arete ek mon tel zafer, ou pou war

ki mon pou fer ek ou. Ki demen apre ou war i annan serten *case* i ariv ankour.

Me ki nou, nou pou bezwen fer la, mon santi, *VP*, ki ou pou bezwen petet fer sa piblik la an deor konnen, anba sa Lalwa ki ou'n anmennen la kot nou ozordi, *Communications Act, 2020*, ki mannyer apart ki i annan son pli gro fonksyon a fer avek *broadcasting*, telekominikasyon, ou sa pti endividi laba deor, ki lenpak sa Lalwa i annan lo ou?

E apre sa mon ti pou kontan osi konnen, Mr Speaker, atraver ou, *VP*, petet bann mwayen, nou bann lezot Manm in koz lo la tou lede kote, i enportan ki dimoun i ganny *sensitized*. Dimoun i ganny bokou plis lenformasyon.

So, i enportan ki sa Lalwa ler i sorti, nou war ki i en Lalwa tre konpreansiv. 24 Seksyon, 137 paz. Me i demann bokou koze, bokou ledikasyon ki ganny donner a bann piblik. Sirtou mon re tous ankor an sa ki konsern zot, sa piblik, sa endividi *down the line there*, ki li osi i kapab ganny afekte avek en tel Lalwa.

So, apre mon ti annan en pti pe konsern osi. En *broadcasting* - En lakonpanyen i decide pou li fer en, donn en *broadcasting service*, e li kot i le fer son batiman *or whatever*, i kapab akse mon later. *If I'm not right, ok. If I'm getting it right.*

Dan bann ka kot petet i war mon kare later i sa landrwa *or part of* mon later, i sa landrwa en pe pli ideal, pou li met son batiman, oubyen met en lema, oubyen met en nenport ki striktir ki pou amelyor, swa kominikasyon, swa bann lezot keksoz. Dan sa bann ka koumsa, mon pe regarde, ki bann osi... *Anyway*, sa petet i a vin dan zot Polisi.

Me selman petet i enportan osi pou bann dimoun sey ganny en nide deor, petet kwa ki vin avek? Eski mwan si mon pa anvi en lema *or* en keksoz i ganny mete la lo mon later, ki konsekans? Ki arive? *Ok*. Akoz, ou a krwar napa gran keksoz ki ganny dir la, ki kapab arive si mon refize ki en *antenna* i ganny mete lo mon later pou ki kapab donn bon resepsyon. Akoz parey in ganny dir, sa bann keksoz i annan bann sistenm avek ki kapab annan lefe lo lasante dimoun, e lefe advers.

So, alors i enportan pou nou konnen en pti pe, si mwan mon pa pe dakor *or* en endividi laba deor i pa pe dakor, ki arive

anba en tel Lalwa, ki mannyer kekfwa i ganny kouver?

So, avek sa, Mr Speaker, mon panse, mon santi ki in annan bokou deba. Sakenn in sey depouy sa Lalwa dan en fason ki'n kapab anmenn serten pti ledikasyon kot bann dimoun. E nou ava ekout *VP* atraver son *reply* ki i pou donner, kot petet i ava fer en pti pe plis leklersisman an sa ki konsern nou bann piblik an deor, *versus* sa Lalwa ki pe ganny anmennen ozordi. Mersi Mr Speaker.

MR SPEAKER

Mersi Onorab. Laparol pou Onorab Wavel Woodcock.

HON WAVEL WOODCOCK

Mersi Mr Speaker. Mr Speaker, enterven an avan mon in dir en keksoz vreman, vreman enportan. Onorab Lemiel. I dir i enportan, nou koman Lasanble Nasyon, pou nou edik Lepep Seselwa ki la deor, sak fwa en *Bill* i vin devan Lasanble. I nou responsabilite pou nou osi ede dan ledikasyon Lepep Seselwa ki la deor.

Me sa ki enportan Mr Speaker, se pou edik Lepep Seselwa, me pa pou konfiz zot, Mr Speaker. Si ou anvi en leson lo ki mannyer pou *mislead* Lasanble, ouswa *mislead* Lepep Seselwa la deor, zis ekout *Leader* Lopoziyon sak fwa i fer en lentervansyon.

Mr Speaker, en keksoz ki Onorab *Leader* Lopoziyon in dir ki i vreman *misleading*, ki mon pou bezwen koriz sa, se ki in koz lo rezo sosyal, lo *broadcast*, lo *Facebook*. Annefe in mansyonn Mr Bernard Sullivan. Mr Speaker, me i enportan pou fer re sorti pou dir sa Lalwa ki devan nou la ozordi, napa naryen pou fer avek kontrol, *Facebook content* ouswa okenn *podcast* lo *Facebook*.

Sa Lalwa ki devan nou i annan pou fer avek bann *operators* telekominikasyon. Savedir zis pou mansyonn ou enn de sa bann *operators* Sesel. Nou annan nou *Airtel*, nou annan *Cable and Wireless*, nou annan *Intelvision*. Napa naryen pou fer avek rezo sosyal. Sa ki i pe dir Mr Speaker, i *completely misleading*.

Onorab Lemiel osi in dir en keksoz enteresan ki mon dakor avek li. In dir pou dir li i war serten defayans dan sa Lalwa. E

Onorab Loze osi in mansyonn serten defayans, bann keksoz ki zot pa dakor avek. E menm Onorab *Leader* Lopoziyon osi in fer sorti serten keksoz dan sa Lalwa ki zot pa...Dan sa *Bill* ki zot pa dakor avek.

Me ankore enn fwa, parey Onorab Larue in fer resorti, se ki zanmen zot pran zot responsabilite koman bann Manm Lasanble responsab, pou anmenn bann amannman, pou zot **dil** avek sa bann defayans ki zot war dan Lalwa. I annan en gran diferans avek *Leader* Lopoziyon ozordi, avek *Leader* Lopoziyon dan 6em Lasanble.

Onorab Wavel Ramkalawan, ki ozordi i Prezidan Sesel, ler i ti war defayans dan bann *Bills*, dan bann Lalwa, i ti propoz bann lamannman. Me sa *Leader* Lopoziyon ki la, ler i war bann defas, bann keksoz ki i pa dakor avek, i zis konplent, konplent, mangonnen, mangonnen! Me zanmen, Mr Speaker, in anmenn en lamannman pou dil avek sa bann keksoz ki i pa dakor, ki li i santi i mal dan sa bann *Bill* ki vin devan nou Lasanble Nasyonal.

Mr Speaker, sa *Bill* ki devan nou parey mon'n dir, i en *Bill* ki vreman enportan. Sa *Bill* napa naryen pou ... Sa *Bill*, parey zot pe dir pou dir sa *Bill* pou *infringe* lo drwa bann dimoun, lo zot drwa lekspresyon, *freedom of speech, freedom of expression*.

Mr Speaker, sa *Bill* pa pe fer sa. Nou drwa lekspresyon i garanti dan nou Konstitisyon. *Of course*, nou annan nou drwa lekspresyon, me selman, nou pa pou servi nou drwa pou nou *threaten* dimoun, ouswa pou *blackmail* dimoun. Parey zot, zot ti fer ler zot ti met lo *Facebook*, zot pou pran bekir Onorab Zialor, zot pou kraz son ledan! I annan Lalwa ki dil avek sa Mr Speaker. Sa i pa normal ditou.

Sa Lalwa ki devan nou Mr Speaker, i pe fer en senp keksoz sitan enportan. Se pou *“repeal and replace, the Broadcasting and Telecommunications Act”* avek en nouvo Lalwa *Communications Act*. Be sa *Bill* parey Vis Prezidan in dir, se pou anmenn devlopman dan *ICT* Sesel. *Information Communication Technology*. Avek lobzektif prensipal, parey *VP* in fer sorti detrwa, mon pou mansyonn zis trwa.

Fasilit devlopman *broadcasting* e kominikasyon dan nou pei. Dezyenman, ranforsi konpetisyon soutenab. Se pou

ankouraz konpetisyon. E se konpetisyon ki ede fer kou lavi desann, ki fer pri desann. Kot bann konsonmater i kapab ganny sa bann servis a en pri bokou pli labordaz.

E trwazyenman, ki pri mondyal se pou protez lentere konsonmater. Kot zot pa war zot pe ganny *overcharged*. Zot pa pe war zot ganny eksplwate. Zot pe ganny valer pou zot larzan ki zot pe depanse Mr Speaker. E sa Lalwa i osi fer provizyon pou etabli en *General Consumer Code*. Kot i dil avek standar e kalite servis ki bann konsonmater, ki bann *end users* i gannye Mr Speaker.

Mr Speaker, ler Onorab *Leader* Lopoziyon in koze avan, Par lefe ki sa *Bill* i kouver tou tranzaksyon *broadcasting* e telekominikasyon, in fer referans avek ler nou ti dan 6em Lasanble kot nou ti blok Bidze *DICT*. Mon pa al an detay lo la.

Mon rapel sa letan nou ti annan serten konsern ki ti piblik, kot bann *civil servant* dan zot lofis, zot vin travay bomaten. Ler zot *log in* zot war portre Danny Faure lo zot lekran. E sa ti partou dan tou biro Gouvernman, avan eleksyon, portre Mr Danny Faure lo ou lekran. E sa ti en vyolasyon drwa sa bann dimoun, sa bann travayer dan *civil service*. E sa ti en konsern pou nou, e bann rezon akoz ki nou ti blok Bidze *DICT*.

E sete pa zis sa rezon akoz ki nou ti blok Bidze *DICT* sa letan, sete akoz ti annan bokou konsern dan piblik, ki *DICT* pa ti pe met ase presyon lo bann *operators*, pou fer sir ki Lepep Seselwa pe ganny *value* pou zot larzan. E nou, nou ti enpoz, nou ti met serten lobligasyon, serten presyon lo *DICT* pou fer sir ki zot ede dan sa demars pou fer desann kou bann servis ki bann *telecommunication operators* i ofer Lepep Seselwa.

E apre ki nou'n fer sa, Mr Speaker - e menm si zot pa'n fer naryen, menm si sa *Bill* pa'n zanmen vini, ki nou'n war Mr Speaker? Ler nou *LDS*, nou'n antre dan Gouvernman, deswit nou'n war en transformasyon dan *DICT*. Nou'n war presyon in ganny mete lo bann *telecommunication providers*. Ki nou war Mr Speaker?

Le premye Zanvyè 2022, *the “per second billing regulation”* ti vin anfers. Kot avan, en dimoun ti pe ganny sarze par minit ler i fer en *phone call*. Ozordi, en dimoun i ganny sarze par segonn. Si ou koz pou 10

segonn, ou ganny sarze pou 10 segonn. Si ou koz pou 5 segonn, ou ganny sarze pou 5 segonn. Pa si ou koz pou 5 segonn ou ganny sarze pou 1 minit! Sa ti en - mon kapab dir ti *daylight robbery!*

E sa i enn de bann transformasyon ki nou Gouvernman in anmennen, ler nou, nou'n antre, ler nou nou'n ganny elekte koman nouvo Gouvernman. Nou'n fer sir nou komans pran bann mezir pou ede soulaz en pe sa bann difikilte ki nou pep pe fer fas avek. E ki nou pou kontinyen pou ede dan sa demars, pou nou kontinyen fer sir ki bann konsonmater pe ganny *value for money*.

Mr Speaker, non selman sa. Ti annan plizyer konplent dan le pase kot, si ou'n pey *data, let's say 10gb data, e 10gb* i fini, i kontinyen marse. *At the end of the day*, ler lafen dimwan in arive, ou war ou pe drwa R20mil, R10mil, R15mil ou bezwen peye pou *extra data* ki ou'n servi.

Me ozordi, Mr Speaker, i annan provizyon. Mon pou servi legzanp *Cable and Wireless*. Ozordi ou kapab ganny *unlimited data 12mbps* pou selman R999. E i depan kantite *mbps* oule. Si oule *25mbps unlimited internet*, then ou a pey R2mil99. I depan lo kantite *mbps* ou anvi. Tousala, i bann reform, bann keksoz ki'n ganny anmennen ki pe ed Seselwa pey pli mwens ki i ti pe pey avan.

Mon konnen i annan ankor serten zefor pou ganny fer. I annan serten konplent ki menm si ou pe pey *25mbps*, i annan *still* ennler ou pa pe ganny sa *25mbps*. Sa i bann keksoz ki sa *regulatory body* i ava get ladan.

Mr Speaker, sa Lalwa pou osi koz dil avek *collusion and price fixing*. Sa i en keksoz ki mwan dan lepase mon'n koz lo la, non, selman dan telekominikasyon, me dan lezet sektè, kot i annan serten *collusion* parmi plizyer bann, sa bann *telecommunication operators*, kot ou war zot pri i preski parey. Ou pou sorti kot enn ou pou al lo lot. Konmsi i mank en pe sa konpetisyon. E ki sa *Bill* pe fer, se pou ankouraz konpetisyon, pou tir sa bann zafer *collusion or price fixing* ki egziste, ki'n egziste dan lepase.

Mr Speaker, mon pou bezwen - aköz mon santi poudir i annan serten konfizyon ki *Leader* Lopoziyon pe sey kree, kot i konsern entersepsyon bann kominikasyon. E mon pou al lo *Clause 89*, kot i koz lo *“measures to ensure privacy of*

communication”. Mon pou lir sa byen, aköz nou pep la deor zot konpran tre byen Angle. Pou zot ganny an kler kwa ki sa *Bill* i dir.

Clause 89(1) i dir koumsa, *“An operator shall take appropriate technical and organisational measures jointly with other operators, if necessary, in order to block any unauthorised attempt to intercept, store or monitor communications transmitted and any related traffic data and to prevent any unauthorised or accidental access to communications transmitted and any related traffic data”*.

So deza i lobligasyon lo bann operators pou fer sir ki napa okenn *unauthorised interception of* okenn kominikasyon, swa atraver *internet*, swa atraver telefon. Sa i en lobligasyon ki lo zot Mr Speaker. E kan *interception of communication is allowed, its allowed only by the end users of a subscriber*.

Clause 90 (1) i dir koumsa *“The Authority, when exercising powers conferred relating to radio frequency monitoring, may monitor, intercept or store communications. When an end user or subscriber alleges receiving a threat of the use of violence against the end user or subscriber or any other person; or blackmail of the end user or subscriber or any other person”*.

E even went as far, saying “the end user or the subscriber may authorise, in writing”, sa subscriber i pou donn lotorizasyon, an ekrir, “the relevant investigating authority”, i kapab lapolis ouswa FCIU, “or an operator to intercept telephone conversations, other electronic communications, traffic data and location data, electronic mail messages and other form of communications to investigate and identify the person involved in such communications within the period mentioned in the authorisation by the end user or subscriber”.

Mon a donn ou en legzanp. *Let's say*, en dimoun in anvoy en mesaz kot Onorab Naddy Zialor. En dimoun dan *US* petet ki pa kontan Onorab Zialor aköz lentervansyon ki'n fer dan Lasanble Nasyonal, e in dir li koumsa, mon pou touy ou, mon pou kraz ou ledan avek ou bekir.

La Onorab Zialor la, i kapab ekrir en let. Se li ki pou donn lotorizasyon pou sa *telecommunication provider*, ouswa sa *investigative authority of the operator* pou la

entersepte, pou get sa kominikasyon ki sa dimoun...Petet li i pa konnen lekel sa dimoun ki'n anvoy sa *threat* pou fer li ditor.

Ouswa si en dimoun pe *blackmail* li. Kekfwa i konn en keksoz lo li prezan i pe servi sa pou *blackmail* li pou larzan, la sa *end user*, Onorab Naddy Zialor, i a kontakte sa *investigative authority*, or sa operater pou li dir, get sa, i annan en dimoun pe servi *death threat* la, i dir i pou touy mwan.

La li an ekri i demann zot, *ok*, pou sa bann *high investigative authority*, pou entersepte sa kominikasyon pou konnen lekel sa dimoun ki pe *threaten* pou kraz son ledan avek son bekir, parey *United Seychelles* ti fer Mr Speaker. Vwala ki manner sa Lalwa la i vin an fors.

Mr Speaker, so ou konnen i annan bokou bann keksoz ki zot pe dir ki i pa fer sans. La parey sa bann zafer kot nou Gouvernman pou fer parey zot ti fer dan lepase, kot zot pou entersepte bann kominikasyon. Mr Speaker, nou, nou Gouvernman nou, nou Prezidan Wavel Ramkalawan ler pou sorti *State House*, i pa pou *bug State House*, Mr Speaker - pou sa Prezidan ki antre pou li veye ki sa Prezidan i fer, ouswa i dir. Mr Speaker, kantmenm dan sa gro lili ki zot ti annan dan lofis Prezidan ki'n ganny tire, ti annan *bug* dan sa lili, Mr Speaker.

(laughter)

HON WAVEL WOODCOCK

Telman zot pe vey zakasyon kanmarad, zot pa *trust* kanmarad, ziska ozordi Mr Speaker, *bug* i ankor pe ganny tire *State House*. Sa bann zafer Mr Speaker, zot ki ti fer sa Mr Speaker. Pa nou. Konplo 412 zot ki ti fer Mr Speaker. Pou touy Gérard Hoareau, zot ki ti pe entersepte kominikasyon Mr Speaker.

Zot Prezidan Albert Rene dan en *rally* ti fer en *speech*, Mr Speaker, kot i ti dir "Sa ki zot koze nou konnen! Tou sa ki zot *plan* nou konnen! Ler zot pete nou konnen!". Prezidan Albert Rene ti dir. Sa i bann keksoz ki zot, zot ti fer ler zot ti pe entersepte, zot ti pe ekout telefonn zot kanmarad. E sa bann keksoz Mr Speaker, nou Gouvernman pa *believe* ladan! Nou pa parey zot, e zanmen nou pou parey zot Mr Speaker.

Mr Speaker, sa Lalwa sa *Bill* ki devan nou, i enn ki enportan. Nou bezwen fer sir ki nou protez nou konsonmater. Nou bezwen

fer sir ki bann servis ki sa bann *operators* pe donnen, i bann servis ki a la oter, ki pou benefisye tou Seselwa. *At the end of the day* sa ki nou anvi. Se ki nou pep i ganny *value for money*. E ki sa bann standar servis ki zot gannyen i lo en oter, i lo en nivo ki akseptab.

Mr Speaker, avek sa 2 mo, mon Onorab Wavel Woodcock, Manm Elekte pou Grand Anse Praslin, mon pou siport sa *Bill* ki devan nou, akoz i en *Bill* ki bon, en *Bill* ki depi lontan ti'n merit vin devan sa Lasanble. Avek sa 2 mo, mon dir ou mersi Mr Speaker.

MR SPEAKER

Mersi Onorab. Onorab Pillay, deba in terminen. Eski ou anvi koriz en keksoz?

HON SEBASTIEN PILLAY

Wi, Mr Speaker. Mon le koriz serten mis apreansyon ki'n ganny fer lo lentervansyon ki mwan mon'n fer e serten komanter ki'n ganny fer a mon propo. Mon'n war ki ou'n les mon kondwit ganny trennen dan labou, kontrerman avek *Standing Order*. Mon napa problem ek sa. Ou aplik Lord ki manner i sipoze ganny fer.

Me selman mon ti a kontan koriz de misapreansyon. Premyerman, i annan en *statement* ki'n ganny fer ki nou pa'n zanmen anvoy lamannman vizavi bann Lalwa. I pa korek. Nou'n anvoy plizyer lamannman. E toultan nou bann lamannman pa'n zanmen ganny aksepte par kote mazoriter dan Lasanble.

Dernyen lamannman ki mon ti anvoye, sete lo Lalwa pou fer Eleksyon pou Mer Laval. *Bill* in ganny tire. Mon pa ni konnen kwa ki'n pase pou sa lamannman, i pa'n vini. Dezyenm lamannman ki mon ti anvoye ti an relasyon ek Lalwa Pansyon. Mon ti anvoy en lamannman pou pa sanz laz pansyon. Mon lamannman ti tonbe.

Trwazyenm travay ki mon ti fer se relasyon avek en regilasyon pou anpes laz pansyon monte, pou vin 65an. Ti tonbe, *LDS* ti vot kont. E la, mon annan enn ki mon pa ni sir i irzan, oubyen i pa irzan, akoz dapre ou, ou pa ankor kapab dir mwan. Prezan mon annan en pti kestyon ki mon ti a kontan...

MR SPEAKER

Wi Onorab, Onorab, silvouple!

HON SEBASTIEN PILLAY

Anba *Order* 8 Mr Speaker, mon ti a kontan...

Ok.

(*Mic switched off*)

HON SEBASTIEN PILLAY

I kler sa!

MR SPEAKER

Onorab ekout mwan! Ekout mwan, ekout mwan, silvouple. Wi, mon konpran oule fer serten... Koriz serten *statement* ki'n ganny fer. Lo *amendment* ou'n korize. Ou pa bezwen al dan, konmsi, tou legzanp. Ou pe zis pran en letan pou ou koriz en bout diskour ki'n ganny fer. Fer li bref, dir nou ou bann pwen, e nou a kapab met li lo rikord. E, apre i a terminen.

MR SPEAKER

Bon. Mersi. Bon, nou a termin deba la. Nou a rezerv repons *VP* lo deba pou demen *matin*, koumsa i a donn nou en posibilite pou nou repran bann pwen ki'n ganny fer, e remet nou *focus* lo sa size. Mon remersye bann Manm pou zot lentervansyon, e remersye *panel*, sirtou *VP* ki'n fer son prezantasyon, pou zot partisipasyon. Mon dir zot tou bonswar e Lasanble a *adjourn* la, e nou a repran demen *matin* 9er. *Adjourn*.

Me selman mon pe envit ou, pou pa komans antre dan en diskisyon lo ki sa ki mon'n fer, ki sa ki mon'n deside. Sa i napa naryen pou fer avek *speech* la. Silvouple, terminen. Koumsa nou a kapab terminen. Mersi.

(ADJOURNMENT)

MR SPEAKER

Mersi Mr Speaker. Parey mon'n dir, mon'n anvoy plizyer lamannman ki'n toultan ganny rezete. Dezyenmman mon oule koriz en mis apreansyon vizavi bann seksyon Lalwa ki mwan, mon'n site. Mon oule fer kler ki mon, mon pa an faver okenn antite, ki ava annan mon lenformasyon personnel, ki kapab ganny akse avek par en Lotorite. Menm si i an relasyon avek en lenvestigasyon, kontrerman avek sa ki'n ganny dir dan Lasanble.

Sa ki mon'n dir Mr Speaker, e mon reste ferm lo la. Mon pa *trust* Gouvernman pou pa servi son Lotorite ...

MR SPEAKER

Ou pe repet ou deba la.

HON SEBASTIEN PILLAY

Wi, be ki oule mon fer? Mon bezwen dir sa ki mon'n dir!

MR SPEAKER

Ou pe repet ou deba. Terminen silvouple.

HON SEBASTIEN PILLAY

Ou war, be sa problem. Sa ki mon'n dir i senp Mr Speaker. Ou pa kapab annan en Lotorite ki pou ganny akse avek mon lenformasyon personnel. Se tou.

MR SPEAKER

